

ASO LUA, 21 APERILA 2015

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2015.

Tatalo.

FOFOGA FETALAI: I lou agaga faaaloalo tele ou te faatalofa atu i le paia ma le mamalu maualuga o le tatou Palemene i le alafai mai i faguga lelei i lenei taeao fou, e foi pea le viiga i le Atua ma le tatou faamanu ona o lea ua tatou potopoto faatasi i le tatou Maota Fono i lenei taeao manuia. Faamalo atu le folau faamalo foi le onosai i sui usufono mamalu uma o le tatou Maota. Sa tatou taumavae i lena masina ua tuana'i atu, ia ae tofu foi le itutino o le Malo ma le Palemene ma le afaigaluega atoa ma agai e faatino tulaga pei ona i ai a tatou Fonotaga ua tuana'i atu, o le agaga faafetai i lenei taeao, o lea ua maitauina ua toe aofaga potopoto le tatou Palemene i le manuia. Malo le folau, malo le onosai mai, faafetai le taumafai mai i le tatou Fono i lenei foi masina, ma e i ai le faamoemoe ua tatou amatamea i le aso ananafi aua le faatulagaina o tatou polokalame ma le amataina o tatou Fonotaga ma de-briefing sa tatou feagai ai, faafetai i le Atua o lea ua tatou taunuu mai i lenei taeao manuia.

E le mafai foi ona faagaloina le tapuaiga mai a lo tatou atunuu i le paia maualuga aua Aiga ma a latou Tama, o Tama ma o latou Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. Le paia lava lea aua le tapuaiga i Lana Afioga Mamalu, O Le Ao o le Malo ma lau Masiofo, le Sui o le Fono a Sui Tofia, aemaise le tapuaiga a lau Afioga i le Faamasino Sili ma le Ofisa o Faamasinoga. O lenei ua tatou feiloai fiafia i lenei taeao i lau Afioga i le Taitai o le Malo ma lau Kapeneta mamalu, aemaise foi le Afioga i le Taitai o le Itu Agai ma sui usufono mamalu uma o le tatou Maota Fono.

E le mafai ona faagaloina lo tatou va faafeagai ai ma le Motu i Sasae, e pei ona silafia o le vaiaso na tea atu nei, sa faamanatuina ai le sisiina o le Fua a o tatou uso i Amerika Samoa, i le agaga aloaia, e molimoli atu moomooga alofa e fai lou leo ma fofoga taumomoli o lenei Palemene, matou te faamanuia atu ona o le aulia manuia o le 115 tausaga talu na sisi ae le Tagavai o Amerika Samoa, ia o le tatou pale feagai lena. Pei lava o se faamatalaga e faaoo atu ai se leo i le paia maualuga aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele ma le Faleagafulu o le Motu, Tootoo o le Faleula ma le Laau na Amotasi. Afio lava lea aua le afio i le Kovana Sili, aemaise lau Afioga i le Lutena Kovana mamalu i le Kapeneta, afio foi le Afioga i le Peresetene ma le Afioga i le Fofoga Fetalai a sui usufono mamalu uma o le Maota o Sui i le paia i tupu ma ee, o tamalii ma failauga o faletua ma taus, sa'ao ma tamaitai, ma le loaloa o lena itu o le vai i lo tatou aiga i le Motu i Sasae.

21 APERILA 2015

Malelega mai le Sui o le Fono a Sui Tofia

O le a foi sa matou faamatalaga na tuuina atu, leai e le tau fofola so tatou fala, o Samoa o le lauti ua uma ona lalelei, e le na o se atunuu po o na o se faigamalo, o tatou o le Aiga, afio atu ai Lana Afioga Mamalu, O Le Ao o le Malo, aemaise le Afioga i le Palemia, ma lou savalivali atu foi, ia e moni le alofa o le faaeaea aemaise foi o le auai faatasi, ia ona o tatou o le Aiga e faamalumalu ma avatu faamanuiaga aua lo outou alofaiva. O manu na o la outou folauga. E momoli atu foi moomooga alofa, ma ia outou manatua pea Ta o i Atua, o lo o matou olo pea le mulipapaga ma matou tapuai atu i lo outou alofaiva aua le faafeagai ai ma le Malo tele, ia o manu na o le tatou folauga i lenei foi tausaga.

Ia ua tatou taunuu mai lo tatou Palemene i lenei taeao, e i ai le talitonuga o lena ua i lumamea polokalame o lenei aso, ia sagai maia ai o le tai, e manatu foi e le umi le tatou Fono ua tele ina malamalama Tulafono na ala ai ona tatou potopoto i le aso ananafi. Ia tatou faamama mea mamafa, tatou faapupuu mea uumi, tatou faafaigofie mea faigata, ia ona vave lea ona tatou malolo. Ia o le talosaga lena ua faatulaga atu mo le silafia e lo tatou Maota Fono ae alo maia i lenei aso.

MALELEGA MAI LE SUI O LE FONO A SUI TOFIA

Na fofogaina e le Fofoga Fetalai Malelega Mai Le Sui o le Fono a Sui Tofia.

1. "TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloaina ai ia Tulafono Tau Faaofi ua faaalua iinei:

1. Tulafono Tau Faaofi o Taulumaga tau Solitulafono 2015.
2. Tulafono Tau Faaofi o le Faletupe Tutotonu o Samoa 2015.
3. Tulafono Tau Faaofi o Faamasinoga Faaitumalo 2015.
4. Tulafono Tau Faaofi o Teuteuga o le Tulafono o le Faafoga o Kasino ma Taaloga Eeseese tau Tupe 2015.
5. Tulafono Tau Faaofi o Teuteuga o le Tulafono o Faiga Palota (Nu. 2) 2015.
6. Tulafono Tau Faaofi o Teuteuga o le Tulafono o Kamupani Faava o Malo 2015.

21 APERILA 2015

Malelega mai le Sui o le Fono a Sui Tofia

TUUINA ATU i lou nei Lima i lenei aso 17 o Aperila i le tausaga 2015.

(Sainia): Tuimalealiifano Vaaletoa Sualauvi II
SUI O LE FONO A SUI TOFIA.

2. **TUSI FAAMAONIA O LE TULAGA FAANATINATI.**

E tusa ai ma aiaiga o le Tulafono Tumau 99(2) **O AU, TUIMALEALIIFANO VAALETOA SUALAUVI II, SUI O LE FONO A SUI TOFIA,** ua ou tuuina atu nei le Tusi Faamaonia o le Tulaga Faanatinati o Tulafono Tau Faaofi ua faaali atu iinei mo le tagofia e le Fono Aoaofa o le Fonotaga o le a usua i le Aso Lua, 21 Aperila 2015.

1. Tulafono Tau Faaofi o Teuteuga o le Tulafono o le Faafoga o Kasino ma Taaloga Eeseese tau Tupe 2015.
2. Tulafono Tau Faaofi o Teuteuga o le Tulafono o Faiga Palota (Nu. 2) 2015.
3. Tulafono Tau Faaofi o Teuteuga o le Tulafono o Kamupani Faava o Malo 2015.

TUUINA ATU i lou nei Lima i lenei aso 17 o Aperila i le tausaga 2015.

(Sainia): Tuimalealiifano Vaaletoa Sualauvi II
SUI O LE FONO A SUI TOFIA."

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P. 2014/2015 Nu. 224, Lipoti Faaletausaga a le Ofisa o le Pule Faatonu mo le Tausaga Faaletupe 211.
2. P.P. 2014/2015 Nu.225, Tali atu a le Malo i le P.P. 2014/2015 Nu. 172, Lipoti a le Komiti o Faafoga tau Pulega a le Malo i le P. P. 2014/2015 Nu. 51, Lipoti Faaletausaga a le Ofisa o le Loia Sili mo le Tausaga Faaletupe 2012/2013.

21 APERILA 2015**Tuuina atu o Lipoti a Komiti Filifilia**

3. P.P. 2014/2015 Nu. 226, Tali atu a le Malo i le P.P. 2014/2015 Nu. 134, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 25, Lipoti Faaletausaga a le Pulega o le Suavai mo le tausaga 2012/2013.
4. P.P. 2014/2015 Nu. 232, Lipoti Faaletausaga a le Faalapotopotoga o Eleele Tumaoti a le Malo 2012-2013.
5. P.P. 2014/2015 Nu. 233, Lipoti Faaletausaga a le Faalapotopotoga o Eleele Tumaoti a le Malo 2013-2014.
6. P.P. 2014/2015 Nu. 243, Tali atu a le Malo i le P.P. 2014/2015 Nu. 223, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Lipoti o le Toe Iloiloina o le Tulafono o Faiga Palota 2015.
7. P.P. 2014/2015 Nu. 244, Lipoti Faaletausaga a le Pulega o Tinei Mu ma Faalavelave Tutupu Faafuasei 2012/2013.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T. 51.

1. P.P. 2014/2015 Nu. 227, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le Tulafono Tau Faaofi o Taumafa 2013.
2. P.P. 2014/2015 Nu. 228, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o le Fasimateina o Manu ma Aano o Manufasi 2014.
3. P.P. 2014/2015 Nu. 229, Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014.
4. P.P. 2014/2015 Nu. 230, Lipoti a le Komiti o Tupe Maua ma Tupe Totogi i le P.P. 2014/2015 Nu. 126, Faamatalaga o Sini Autu a le Kamupani o Pulega a le Faaputugatupe Teufaafaigaluega o Mavaega Tausi a Samoa 2015-2017.
5. P.P. 2014/2015 Nu. 231, Lipoti a le Komiti o le Toe Iloiloga o Tulafono Faatonutonu i S/R 2014/5 & S/R 2015/1 i le S/R 2015/5.
6. P.P. 2014/2015 Nu. 234, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2014/2015 Nu. 59, Lipoti Faaletausaga a le Matagaluega o Tina ma Tamaitai ma Atinae o Afioaga ma Agafesootai mo le tausaga 2013.
7. P.P. 2014/2015 Nu. 235, Lipoti a le Komiti Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 94, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2012/2013.

21 APERILA 2015

Lafo mo le Faataatiaese o Tulafono Tumau

8. P.P. 2014/2015 236, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 111 & P.P. 2014/2015 Nu. 193, Lipoti Faaletausaga a le Iunivesite Aoao o Samoa mo Tausaga Faaletupe 2012/2013 & 2013/2014.
9. P.P. 2014/2015 Nu. 237, Lipoti a le Komiti o Mataupu tau le Va i Fafo, Fefaatauaiga ma Tupe Maua i le P.P. 2014/2015 Nu. 198, Lipoti Faaletausaga a le Matagaluega mo Tupe Maua mo le Tausaga 2013/2014.
10. P.P. 2014/2015 Nu. 238, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2014/2015 Nu. 156, Lipoti Faaletausaga a le Robert Louis Stevenson Museum mo le tausaga 2013.
11. P.P. 2014/2015 Nu. 239, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 183, Lipoti Faaletausaga a le Pulega o Fale ma Malae Taalo a Samoa mo le tausaga 2012/2013.
12. P.P. 2014/2015 Nu. 240, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2014/2015 Nu. 181, Lipoti a le Komisi o le Toefuataiga o Tulafono a Samoa i le Tulafono o Faamasinoga 1961, Lipoti Mulimuli 03/11.
13. P.P. 2014/2015 Nu. 241, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2014/2015 Nu. 182, Lipoti a le Komisi o le Toefuataiga o Tulafono a Samoa i le Tulafono o Manaoga Faavae ma le Puipuiga o Tamaiti - Lipoti Mulimuli 11/13.
14. P.P. 2014/2015 Nu. 242, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 127, Faamatalaga o Sini Autu o le Fuafuaga Autasi 2015-2017 a le Pulega o Faailoga ma Tusi Pasi Tauloa a Samoa, Iulai 2014-Iuni 2017.

LAFO MO LE FAATAATIAESE O TULAFONO TUMAU

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, ou te tulai atu ma le agaga faaaloalo e faatu le lafo, *Mo le faataatiaese o Tulafono Tumau ina ia auala ai le tatou agai atu i se tulaga faanatinati o le tagofia o Tulafono Tau Faaofi taua e tataua ona tatou faamaonia i se tulaga faanatinati i le taeao nei.*

Lau Afioga i le Fofoga Fetalai o le lafo lena.

Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

21 APERILA 2015

**Tulafono Tau Faaofi o Taulumaga Tau Solitulafono 2015
- faitauga muamua**

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TAUALUMAGA TAU
SOLITULAFONO 2015 - faitauga muamua**

Afioga Hon FIAME NAOMI MATAAFA (Minisita mo Faamasinoga ma Mataupu tau Faamasinoga): Lau Afioga i le Fofoga Fetalai ma le mamalu o le Fono, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Taulumaga tau Solitulafono 2015 i lona faitauga muamua*

Faaluaina e le Sui Palemia ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE FALETUPE TUTOTONU O
SAMOA 2015 - faitauga muamua**

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faletupe Tutotonu o Samoa 2015 i lona faitauga muamua.*

Faaluaina e le Sui Palemia ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O FAAMASINOga FAAITUMALO 2015
- faitauga muamua**

Afioga Hon FIAME NAOMI MATAAFA: Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Faamasinoga Faaitumalo 2015 i lona faitauga muamua.*

Faaluaina e le Sui Palemia, Minisita mo Tupe Maua ma le Minisita mo Galuega tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

21 APERILA 2015

**TULAFONO TAU FAAOFI O TEUTEUGA O LE TULAFONO O LE
FAAFOEGA O KASINO MA TAALOGA ESEESE
TAU TUPE 2015 – faitauga muamua**

**Susuga Hon TUILAEPa FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai ou te tulai atu
e faatu le lafo, *Ina ia faitauina nei le Tulafono Tau Faaofi o Teuteuga o le
Tulafono o le Faafoega o Kasino ma Taaloga Eseese Tau Tupe 2015 i lona
faitauga muamua.*

Faaluaina e le Sui Palemia.

*Na faamaonia le lafo ma faitauina le Tulafono Tau Faaofi i lona faitauga
muamua.*

**TULAFONO TAU FAAOFI O TEUTEUGA O LE TULAFONO O
FAIGA PALOTA (NU.2) 2015 – faitauga muamua**

Afioga Hon FIAME NAOMI MATAAFA: Lau Afioga i le Fofoga Fetalai
ou te tulai atu e faatu le lafo, *Ina ia faitauina nei le Tulafono Tau Faaofi o
Teuteuga o le Tulafono o Faiga Palota (Nu. 2) 2015 i lona faitauga muamua.*

*Faaluaina e le Sui Palemia, Minisita mo Tupe Maua, Minisita mo Galuega
tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga
muamua.*

**TULAFONO TAU FAAOFI O TEUTEUGA O LE TULAFONO O
KAMUPANI FAAVA O MALO 2015 – faitauga muamua**

**Susuga Hon TUILAEPa FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai ou te faatu le
lafo, *Ina ia faitauina nei le Tulafono Tau Faaofi o Teuteuga o le Tulafono o
Kamupani Faava o Malo 2015 i lona faitauga muamua.*

Faaluaina e le Sui Palemia.

*Na faamaonia le lafo ma faitauina le Tulafono Tau Faaofi i lona faitauga
muamua.*

21 APERILA 2015

**TULAFONO TAU FAAOFI O TEUTEUGA O LE TULAFONO O LE
FAAFOEGA O KASINO MA TAALOGA ESEESE
TAU TUPE 2015 – faitauga faalua**

FOFOGA FETALAI: Talu ai ona ua ou taulimaina nei le Tusi Faamaonia o le Tulaga Faanatinati ma ua maea foi ona sainia e Lana Afioga Mamalu o le Ao o le Malo. O le a sagai atu loa mo le faitauga faalua o Tulafono Tau Faaofi e pei ona masani ai.

Tulai mai lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Amata mai e lau Afioga na ou tulai muamua atu e faitau faalua, o le a ou toe tulai atu e faitau faalua.

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese tau Tupe 2015 i lona faitauga faalua ma ou te fia faamalamalamaina.*

Faaluaina e le Sui Palemia ma le Minisita mo Galuega tau Alamanuia ma Atinae a le Malo.

FOFOGA FETALAI: Tulai mai lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ua faagasolo nei ona faatino lenei Tulafono Tau Faaofi sa tatou pasia i nai tausaga talu ai. O le tausaga na tea nei na tatala aloaia ai le Kasino lenei i le nofoaga autu o le Faletalimalo lenei o le Aggie Grey o lo o i Faleolo, peitai ane sa le i manatu i le taimi na pasia ai le Tulafono Tau Faaofi lenei o le a toe faaleleia atoa le hotel po o le Faletalimalo i le taulaga ona o tulaga foi na tutupu ma le afaina o le Faletalimalo i le taulaga, o le ala lena na toe faaleleia atoa ai ma toe faatele ma faaopoopo potu fou. O le a silasila i ai le mamalu o le Palemene pe a outou malaga atu i Vaiasigano ona outou matauina ai lea o se tupe tele ua faaalu e lenei foi aiga, i le atinae o le Lala i Apia, ma ua faatupu manatu foi ia i latou e lelei ona fai foi se lala o le latou Kasino mo le taaalo ai o tagata o lo o nonofo i le taulaga i lo latou Faletalimalo, leaga e mamao pea tau agai atu i inei i o i Faleolo. Atonu o se mataupu e mafai ona faatino pe a na faapea o lo o aiaia i lalo o le Tulafono Tau Faaofi e mafai ona fai se latou lala i lalo foi o se lala o le latou faletalimalo. Peitai ane e le mafai ona faatino lea faamoemoe i lalo o le Tulafono Tau Faaofi, a o lalo foi o le Tulafono Tau Faaofi ua faamutaina o le lua lava Kasino e mafai ona faatino e se Kamupani e tasi. O lona uiga e le mafai ona faatino lo latou faamoemoe i aiaiga o le Tulafono Tau Faaofi o lo o i ai nei. O le mafuaaga lea ua toe fautuaina ai e tatau lava ona aumai pea i le Palemene ina ia mau alafia ai lo latou lala lona lua i totonu o le latou lala i totonu o le capital o le taulaga i Apia nei.

21 APERILA 2015

**Tulafono Tau Faaofi o Teuteuga o le Tulafono o le Faafoga o Kasino
ma Taaloga Ecese Tau Tupe 2015 - faitauga faalua**

Lau Afioga i le Fofoga Fetalai, o le faapuupuuga atoa lava lena o le Tulafono Tau Faaofi lenei, ma o lea foi e aumai ai ma Teuteuga e faatatau i le Komiti o le TAB, ina ia mafai ona latou faaauauina pea, i latou ia sa faafoga mai nei mea o taaloga e aafia ai mea tau tupe a o faatino foi la tatou Lotto. O lea la e toe fautuaina ai ona o lea tatou te i ai i le piriota o le tau faamasani, o le transition period. O lea la e i ai le agaga o le Malo o i latou ia ua i ai le potu masani i le vaiga o le taaloga lenei, ina ia mafai ona faatonutonu i le tulaga e tataua ona faatonutonu ai. Ona o le tasi lenei atinae ua tele i ai upu a le atunuu ona e i ai lona afaina o o tatou tagata i mea nei o taaloga tau tupe. O lea foi la na o i latou e sitiseni o isi atunuu e mafai ona taaalo ai ina ia taofia ai o tatou tagata. O le ala foi lena o le isi vaega lena o lo o aumai i totonu o le tatou Tulafono Tau Faaofi, ina ia mafai ona faaauau pea i latou nei mo le isi tolu tausaga i le taimi lea o le faamasani, amatamata, transition period, ina ia faatonutonu tataua ai gaoioiga o lenei ituaiga atinae i totonu o le tatou atunuu.

Lau Afioga o lo o i ai foi ma le vaega lena o lo o aumai faatonutonu ai faale-Tulafono taaloga ecese tau tupe e faaoga ai fesoootaiga faatekonolosi, o le isi lala o nei mea o taaloga tau tupe e mafai ona faatino e i latou. Ma e talu mai ona faatino gaoioiga o lenei foi atinae faapitoa, o lo o matauina le alualu i luma o seleni o lo o mafai ona latou maua mai ai a le tatou Faalapotopotoga lea o lo o nafa ma le pulea o le Taaloga lenei o le Kasino ma faigofie ai ona maua seleni e fai fuafuaga a le Komiti lenei e fesoasoani atu ai i tatou taaloga, e faapena foi ma nisi o sikolasipi mo a tatou tama fanau mai aiga e le o lava lo latou tamaoiga, e faaaua atu i sikolasipi faapitoa a le tatou NUS.

Lau Afioga i le Fofoga Fetalai, o le tulaga lena atoa o lenei foi Tulafono Tau Faaofi. O lo o i ai le faamoemoe e le o toe umi ona tatala lea o le lala lea i Apia ona faataunuu ai lea o a latou taaloga, o e foi o le a mafai ona nonofo i faletalimalo i Apia ona le tau o mamao lea i o i Faleolo, a o latou foi e i Faleolo, o le a nonofo ai lava i o e le tau omai i Apia.

Lau Afioga i le Fofoga Fetalai, o le faamalamalamaga lena o le Tulafono Tau Faaofi.

FOFOGA FETALAI: Malo faafetai i lau Afioga i le Palemia, e manatu ua faafoga ma le manino le tatou Maota i lenei taeao e tusa ai ma le faamalamalamaina o Tulafono. O le aso foi ananafi sa tatou faafoga ai foi i Faaululuga o Matagaluga o lo o faafoga lenei foi Matagaluga taua a le tatou atunuu, sa aumai avatu foi le tofa ma le faautautaga ma taatia i lagatonu lenei Tulafono Toe Teuteu ona o le tulaga pei ona faamalamalamaina e le Afioga i le Palemia. O le tatou tulaga masani, o le Tulafono Tau Faaofi lenei, o le Tulafono Toe Teuteu, 1, 2, 3, 4, 5 Fuaiupu o lo o teuteu, ua manino foi le faamalamalamaga a le Afioga i le Palemia ae o lo o i ai pea le avanoa mo felafolafoaiga pe a i ai se isi e fia saunoa, ae a leai, o le a tuuina atu loa le tatou fesili.

Ia, o le a avatu pea le avanoa i le sui usufono mo Faleata Sasae, tulai mai Aveautau.

21 APERILA 2015**Tulafono Tau Faaofi o Teuteuga o le Tulafono o le Faafoga o Kasino
ma Taaloga Ecese Tau Tupe 2015 - faitauga faalua**

Tofa AVEAU TUALA LEPALE NIKO PALAMO (Faleata Sasae): Lau Afioga i le Fofoga Fetalai, faafetai lava mo le avanoa, faafetai atu foi i le Afioga i le Palemia mo le Tulafono Tau Faaofi. E lagolago foi i le Tulafono Tau Faaofi ona o fesoasoani pei ona saunoa i ai le Afioga i le Palemia. Ae tasi se vaega lea sa ou fesili ai ananafi lau Afioga ae le i maua se malamalamaga lelei. O lea la ou te fia fesili atu ai i lau Afioga i le Palemia, i le vaega lea e faapea mai ai le Tulafono Tau Faaofi e ave ai le laisene e faaoga ai le peti lea i luga o le telefoni, lea e i ai le Amendment 88A. O lea ou te fesili atu ai ma le faaaloalo, e aafia ai le taaloga lea e fai nei a le Digicel ma le Blue Sky i le vaega lea? Afai foi la o le vaega lea, ua faamatuu atu la se laisene i lalo o le TAB e faatino ai vaega ia e lua, i kamupani ia o lo o faia lea vaega faamolemole lau Afioga ma le faaaloalo lava.

FOFOGA FETALAI: O lea ua maua le fesili. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E le mafai ona faia ni laisene i ituaiga taaloga e leai Tulafono o i ai. O lona uiga la a fai loa le laisene ua mafai loa ona control taaloga faapena. O le tali atu lena lau Afioga.

FOFOGA FETALAI: Malo faafetai. Tulai mai le sui usufono mamalu Motuopuaa, sui usufono mo Vaisigano Nu.2.

Tofa MOTUOPUAA UIFAGASA AISOLI VAAI (Vaisigano Nu.2): Faafetai i lau Afioga i le Fofoga Fetalai mo le avanoa, faafetai foi i le Afioga i le Palemia ona o teuteuga ua i ai nei i lea Tulafono Tau Faaofi. Ia, so o se Tulafono lava e fai, ia lelei ma faatino ona puipuia pe police ma faaauau e le o solia e se si le Tulafono Tau Faaofi. Ae na pau lava o lea lau Afioga i le Palemia, faafetai mo le Tulafono Tau Faaofi. Na o se tuualalo atu ona o tagata ia e o e taaalo i lenei taaloga faapea seiloga o le tusifolau foi lea mai se atunuu i fafo. E lelei, ia, o le isi, manatua o le isi mea na sau ai i le Tulafono tuai, na o e o nonofo i hotels. Lau Afioga i le Fofoga Fetalai, o ita foi ta te fia alu i o e ta te fia matamata, ae ta te vaai atu, o isi foi aualii i Samoa nei e nonofo i inei, e fai foi o latou passport Niu Sila, e i ai foi aualii o le matou au tapolo. O le mea lena ou te fai atu ai.

Lau Afioga i le Palemia, e manaia pe a aua nei toe i ai le mea lea faapea na o e nonofo i hotels, tatala i e fai o latou tusifolau mai nuu i fafo, pei o le Taitai o le Itu Agai, o matou uma lava nei, ma au. O lea la e talosaga atu ai i lau Afioga i le Palemia, ae a pe a tuuese le mea seiloga e... ona e vaai lea i ai i le tele o tupe a le Malo o le a maua ia matou. O le talosaga atu lena i lau Afioga ma le faaaloalo lava.

FOFOGA FETALAI: Malo. O lea ua ou maua le talosaga. Se i tulai mai le faauilavea a le Afioga i le Palemia.

21 APERILA 2015

**Tulafono Tau Faaofi o Teuteuga o le Tulafono o le Faafoga o Kasino
ma Taaloga Ecese Tau Tupe 2015 - faitauga faalua**

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le a ou tali vave atu nei tei ua matau mai e tagata ai sa e solitulafono. E leai, o outou uma lava na, tou te o loa i o logo mai au, o a mea a tama na e fai i ina? O la e matamata, ia o lena la na o le tou o lava tou te matamata tou te le o solia le Tulafono. Ae talu ai o lena sa i ai lou passport Niu Sila, e leai la o la e taga oe ma Palusalua, o la e i ai lona passport Ausetalia.

FOFOGA FETALAI: Ia, tulai mai le Afioga i le Taitai o le Itu Agai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, ou te fia lauga i le Tulafono Tau Faaofi, aemaise la o lea ua taua ai ma au.

FOFOGA FETALAI: Ia saunoa ia lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, faafetai i leni taeao ua tatou feiloa pei ona sii le viiga i le Atua e lau Afioga.

O le mea muamua lau Afioga o le mea e fia faasao, e tusa lava pe i ai sou tusifolau, ou te le alu lava i nei mea o casino iinei, leaga na faaalua lava i le Maota leni lou le taliaina o nei mea o casino i le atunuu. O le mea la lea, e i ai taimi ou te fia alu ai e tafao i o, aua e muamua lava tau atu i le casino, ona ou toe liliu mai lea. E tumau pea lena tulaga ia te au lava ia, ou te le taliaina nei mea o casino i le tatou atunuu. Peitai, o lea ua pasia le Tulafono Tau Faaofi, ua leai se mea e toe mafai i ai. Na pau lava lau fautuaga....

FOFOGA FETALAI: Malie lau Afioga i le Taitai o le Itu Agai se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E leai se mea e popole ai le Taitai o le Itu Agai, aua o le isi lava sui usufono lea e nofo mai sa talanoa mai foi i totonu o le Palemene i le taimi na tau faasao ai le mea lea, o la e lava e fai a outou taaloga faa-casino i totonu o le isi faletalimalo. E leai la se mea e te popole ai, pe e te taalo i o ae sau taalo i tua, o le mea lava e tasi, e leai se mea e te popole ai i lena mea, ua ou faamagalalo atu ia te oe.

Afioga Hon PALUSALUE FAAPO II: Lau Afioga, leai na o sau fautuaga i le Afioga i le Palemia, se i onosai mai, o lea na ona faataoto atu o le amataga o lau tala, a o lou tulai mai, e pei e foliga mai o lea ou te alu i se isi casino, aua na o le tasi lava le casino lea e i Samoa.

*21 APERILA 2015***Tulafono Tau Faaofi o Teuteuga o le Tulafono o le Faafoega o Kasino
ma Taaloga Ecese Tau Tupe 2015 - faitauga faalua**

Lau Afioga i le Fofoga Fetalai, na pau lava lea i lou talitonuga, a o principals i mea tau casino, ou te le taliaina iinei i Samoa. Peitai, o lea ua pasia le Tulafono na pau lava lau tatalo i lau Afioga i le Palemia ma le tatou Malo, se i matua silasila totoa ia aua lava nei maua se avanoa i le o atu so o se isi i totonu aua o lea ua taoto faiga faavae ma aulape i le tulaga o le tatou casino. Ma e pau lea o lau tatalo atu, ina ia silasila totoa lau Afioga i le Palemia e tusa ai ma le tatou casino o i ai nei. O lea ua amata ona falala pei ona aumai le Tulafono Tau Faaofi i le taeao nei. O lea ua amata ona falala i tua, pei ona ou fai atu ua pasia le Tulafono, a o le falala lava lea, e tele foi ma isi lala ma isi lala o tatou Tulafono e uiga i le casino. O le mea la lea se i silasila totoa i ai, aua o le isi vaega ia o le Tulafono Tau Faaofi, e pei o le faaaogaina o mea ia o electronics ma fesootaiga vavave faaneionapo, ina ia mau lelei le tulaga lea ina ia mautinoa e le o faaaogaina e tatou tagata, aua o la e ou te iloa, o la e fai petipetiga i tuuga solofanua i fafo e faaoga ai la le tulaga lea. O lona uiga, e tatau ona silasila totoa i ai lau Afioga ina ia malupuipua uma mea ia mo le tatou atunuu.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le tausaga 1990 na pasia ai le Tulafono e fai ai tatou Lotto ma mea o petipetiga tau solofanua. O lona uiga o tuuga solofanua uma lava ia sa fai i Samoa mai le 1940 e tau i le 1990, e illegal uma lava, ae faatoa faataga lava i le 1990 mea ia e lua na fai ai le tatou Lotto ma mea la na o tuuga solofanua e fai ai petipetiga, e le gata i Samoa nei, ae faapena foi i atunuu i fafo. Lea sa fai i le RSA, e le i umi lava ona fai ae taaifala le kamupani lena, ona e atamamai tele le au polofesa foi nei sa sikolasipi i fafo, na sikolasipi ma foi mai e leai se mea na maua mai ona o le tulaga lena sa tele ina o tafafao i tuuga solofanua, o le mea la lena na tupu. O lona uiga, e leai se mea o lea tei ua faapagopago atu ai fua le Tulafono lea i le tulaga o tuuga solofanua, o la e i ai le Tulafono na faataga ai mea na.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o lea lava ou te malamalama i le Tulafono Tau Faaofi lea, ae o a tatou fesootaiga vavave faaneionapo. E pei lava ona ou fai atu i le amataga, o lea ua pasia le Tulafono se i silasila totoa i ai le Malo, ia aua lava nei i ai ni tulaga foi nei ia sao ai i totonu le tatou atunuu i tulaga tau casino ma tulaga faapena. Ae o se Tulafono foi na tele a tatou tala na fai i ai ina ua faataoto mai le Tulafono Autu ma ou te le toe oo i ai. Na pau lava le mea e avatu lau lagolago i le tulaga ina ia silasila totoa le Malo ina ia malu ma puipua lelei le Tulafono ina ia puipua mai ai si o tatou atunuu, aemaise lava o tagata nei e nonofo iinei, ne i afaina ai ma atagia ai le tamaoaiga o nai o tatou tagata. O sau faapoopoga lea i le Tulafono. Ia manuia le Fono.

21 APERILA 2015

**Tulafono Tau Faaofi o Teuteuga o le Tulafono o le Faafoega o Kasino
ma Taaloga Eeseese Tau Tupe 2015 - faitauga faalua**

FOFOGA FETALAI: Malo faafetai. Mo le faamalamalamaga atili leaga o le aso ananafi lea na fai ai le tatou de-briefing mai le faamalamalamaga a le Matagaluega, o le vaega o le Tulafono Tau Faaofi lea e taua ai faiga faaeletoni, o lo o taua tele i le tulaga o le mea lea tatou vaaia i telefoni feaveai lea tatou te vaai ai i luga o Televisi i aso uma, le Text to Spin ma isi mea uma ma isi taaloga, i le tele ma le anoanoai lea ua faaoga ai telefoni, e leai ma se tupe a le Matagaluega o maua ai.

O le faamalamalamaga lena i le aso ananafi, e toe faatulaga e fai foi o le faaogaina e kamupani tetele nei i le atunuu auala faatekonolosi e faia ia taaloga nei, a ia faatulafonoina.

O le agaga lena ina ia faamalamalama atu ina nei tei foi ua toe tu ae se isi sui usufono, ae o lea ua ou faamalamalama atua mea nei i tuuga solofanua ma isi Tulafono 1990.

A o le Tulafono lea i le faaogaina o le electronic i luga o telefoni feaveai, o lea tou te vaai i afiafi uma i le Televisi i fea ma fea, ona vili lea o le mea taavili ae maua tupe. O taaloga faitupe i luga o le faatekonolosi, ae le o maua se puipuga malu pei ona i ai le concern a lau Afioga i le Taitai o le Itu Agai, nei tei ua toe taua e se isi sui usufono.

Tulai mai le sui usufono mo Aana Alofi Nu.3, avanoa mulimuli.

Afioga TOELESULUSULU CEDRIC POSE SALESA SCHUSTER (Aana Alofi Nu.3): Faafetai i lau Afioga i le Fofoga Fetalai mo le avanoa. E avatu foi le faafetai i le Pulega aemaise le Afioga i le Palemia ona o le vaega o le Tulafono Tau Faaofi pei ona faamalamalamaina, e talitonu pei ona i ai se naunautaiga o le Pulega ina ia mafai ona maua ai se seleni i nei taaloga o lo o faatino e nisi o kamupani.

Na pau lava le tuualalo lau Afioga i le Fofoga Fetalai, ona o le Tulafono Tau Faaofi i lona taatia mai i le taimi nei, e faaavanoa lautele, apalai i ai, o le tuualalo i le taimi e toe faatino ai ma iloilo ai lena Tulafono Tau Faaofi, ina ia mafai ona vaevaeina ai ituaiga laisene foi e tuuina atu mo i latou ona e i ai nisi o lo o faatinoina pe tasi i totonu o le tele o faletalimalo tetele e sefulu taaloga e alu i le taimi e tasi, compare i se aiga po o se faalapopotoga laitiiti o lo o fia fai ni a latou taaloga e maua ai tupe ina ia i ai se vaevaeiga o laisene ina ia latou... i latou o lo o faia as a commercial venture compare ia i latou o lo o faaoga as a fundraising.

O le tuualalo lea i lau Afioga i le Fofoga Fetalai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Fafoega o Kasino ma Taaloga Eeseese tau Tupe 2015 i lona faitauga faalua.

21 APERILA 2015

**TULAFONO TAU FAAOFI O TEUTEUGA O LE TULAFONO O
FAIGA PALOTA (NU.2) 2015 – faitauga faalua**

FOFOGA FETALAI: Talu ai ona ua ou taulimaina le Tusi Faamaonia o le Tulaga Faanatinati ma ua maea foi ona sainia e Lana Afioga i le Sui o le Fono a Sui Tofia, o lea o le a sagai atu loa le Fono Aoa o le faitauga faalua o le Tulafono Tau Faaofi.

Tulai mai le Minisita mo Faamasinoga ma Mataupu tau Faamasinoga.

Afioga Hon FIAME NAOMI MATAAFA: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.2) 2015 i lona faitauga faalua ma ou te fia tautala faamalamalama i ai.*

Faaluaina e le Sui Palemia ma le Minisita mo Tupe Maua.

FOFOGA FETALAI: Tulai mai lau Afioga i le Minisita e saunoa.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai ma le mamalu o le Fono mo le avanoa e faamatalaina ai le tatou Tulafono Tau Faaofi Toe Teuteu ua i le Laulau a Fono. E 6 ni Fuaiupu o le tatou Tulafono Tau Faaofi lenei, ma o suiga o le Fuaiupu 2 ma le Fuaiupu 4, e faasino lea i le taumafai i luma o le Faamasinoga e fai ai ni talosaga aemaise o le luita o se agavaa o se sui faatulai e avea ma sui tauva.

Lau Afioga i le Fofoga Fetalai, a manatua e le Maota i le Fono talu ai i le Lipoti a le Komiti sa tuuina mai i le iloiloina o le tatou Tulafono o Faiga Palota i lona tulaga lautele, sa i ai se faamoemoe e faapea e faatulai se tribunal na te iloiloina le talosaga i mataupu faa-palota. Atonu o le suiga lenei o lo o taumafai ai e tali atu i le popolega o lo o i ai, aemaise lava i le lava o le taimi e fai ai ni challenges o le agavaa o se sui tauva i luma mai o le Palota.

O le mea moni lava lau Afioga i le Fofoga Fetalai, o lea na tatou iloa e le gata i le Palota talu ai a o isi foi palota i tua atu, e puupuu lava le avanoa lea e talosaga atu ai i le Faamasinoga e luita le agavaa o se sui faatu. O le tatou suiga lea ua faapuupuu ai le taimi i le Fuaiupu 4, e faapuupuu ai le taimi e faaulu ai sui tauva ma le avanoa e toe faamaui mai ai i tua. E faapuupuu le taimi lena a ua faaumi le taimi e mafai ai ona fai ai tagi e faasino i nisi o lo o fesiligia lo latou agavaa mo le avea ma sui tauva i le Palota. O le Fuaiupu 2 ma le Fuaiupu 4 la lena. O le Fuaiupu 3 ma le Fuaiupu 5, o fuaiupu ia e faasino i lo tatou Itumalo tu taulaga fou ia o lo o faatulaga i le tatou Faiga Palota o le tausaga fou. O lo o i ai i le Fuaiupu 3, se tasi o agavaa e ausia e resitala ai le tagata i lalo o lola o tatou Itumalo tu taulaga. O lena agavaa ia oo i le taimi e resitala ai le tagata palota, e ao ona alaala i se fanua umia saoloto e le i lalo ifo o le 6 masina, it's a qualification po o le agavaa o le tagata e ao ai ona resitala i lalo o le tatou lola.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le Fuaiupu 5, o lo o toe faatulaga ai tuaoi o o tatou Itumalo e lua tu taulaga, lea e manatua lelei e lau Afioga ma le mamalu o le Maota, i le aumai o le tatou Tulafono Toe Teuteu muamua sa faatulaga mai ai tuaoi, ae peitai o le masina o Tesema sa toe tuuina mai ai e le Komiti sa iloiloina lenei Tulafono Tau Faaofi se toe fetuunaiga o tuaoi o na Itumalo. Ae peitai lea tatou te manatua sa i ai le finagalo o le Komiti o le a le iloiloina teuteuga sa tuuina mai e le Malo i le masina o Tesema ma le masina o Fepuari, sa faapea mai e lelei ona toe faataatia lelei mai i luma o le Palemene mo lana iloiloiga o teuteuga nei.

O lea lau Afioga i le Fofoga Fetalai ma le mamalu o le Palemene, ou te manatua foi i le tatou Fonotaga talu ai sa faatu ai sau lafo òe toe faamaui mai tua se vaega o le Fuaiupu 13, lea o lo o aiaia uma ai tuaoi o o tatou Itumalo e aofia ai ma le Itumalo tu taulaga. O lea sa faamaui mai tua le vaega sa aiaia ai tuaoi o Itumalo tu taulaga ma o lea ua toe teuteu lelei ma aumai i luma o le tatou Fono i le Tulafono Tau Faaofi Toe Teuteu lenei.

O le Fuaiupu 6, o le tulaga masani lava lea o Tulafono Faatonutonu, e masani lava ona tagofia e le Kapeneta ona tuuina atu lea mo le faamaonia e le aao o Lana Afioga Mamalu o le Ao o le Malo ma faataatia mai luma o le Fono Aoaofaitulafono mo lona silafia, a o tulaga masani lava o lo o aiaia i lalo o le Fuaiupu 6.

Lau Afioga i le Fofoga Fetalai, e le tele ni suiga o i ai i totonu o lenei Tulafono Tau Faaofi, ma o lea ua talia ma tuuina mai i lona tulaga faanatinati ma atonu o le a maua ai le avanoa e felafolafoai ai ma faamalamalama atili foi i le mamalu o le tatou Fono aemaise foi nisi o sui usufono o lo o fia malamalama atili.

O le faamatalaga lea ma le faaloalo lava.

FOFOGA FETALAI: Malo faafetai i lau Afioga i le Minisita o Faiga Palota, ou te manatu foi ua faafofoga manino le Maota, e le gata i lea sa afio atu foi le Sui Komesina o Faiga Palota ma faamalamalama lea mataupu ananafi. Ua tatou taunuu i le tatou felafolafoaiga, tulai mai le sui usufono mo Faasaleleaga Nu. 2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Faafetai tele i lau Afioga i le Fofoga Fetalai, faafetai foi i le Afioga i le Minisita mo le faamalamalamaina o lenei Tulafono Tau Faaofi i lenei taeao. O le agaga lava faa sui usufono e momoli ai le agaga faafetai i le Malo mo tapenaga mo nei suiga ua i ai nei, ou te talitonu foi e i ai lona tulaga faanatinati e ao foi ona avatu ni motuga afa a le Palemene aemaise o lenei Tulafono Tau Faaofi ona pau lea o le avanoa e avatu ai ni manatu. Faafetai atu i lau Afioga i le Fofoga Fetalai mo le avanoa, faafetai foi i le Afioga i le Tamaitai Minisita.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le tulai mai o lenei suiga atonu o lea ua saunoa le Minisita e le o ni suiga tele, e moni lava le saunoaga, a o lou lava sui usufono lau Afioga i le Fofoga Fetalai, e le o se suiga tele a o lou lava sui usufono e i ai foi lou tulaga popole i lenei suiga, e moni lava e le tele i le vaai ae i ai foi lou popolega. O le popolega lau Afioga i le Fofoga Fetalai, ona o le tatou Fonotaga talu ai na pasia ai tulaga uma e pei ona saunoa le Tamaitai Minisita ua pasia tulaga uma e pei ona i ai le Tulafono Tau Faaofi. O le vaavaai i le Tulafonoí ..

Afioga Hon Fiafe Naomi Mataafa: Lau Afioga i le Fofoga Fetalai o se mea e fia faasao.

FOFOGA FETALAI: Tulai mai lau Afioga i le Minisita.

Afioga Hon Fiafe Naomi Mataafa: O le mea e fia faasao, o le vaega lea na aiaia ai tuaoi o Itumalo tu taulaga na toe faamaui i tua. O lona uiga o le taimi nei e le o taatia i le Tulafono Tau Faaofi lea na tatou pasia tuaoi o Itumalo tu taulaga, o lea faatoa aumai.

Susuga PAPALII LIO FAAVAIVAIO MANU TAEU MASIPAU: Faafetai o lea ua maua le agaga o le Minisita e moni lava ua faaui i tua le lafo, a o lo o i totonu lava i totonu o le Tulafono Tau Faaofi e pei ona talanoaina talu ai, o lou a talitonuga faasui usufono o lo o i ai lava i totonu o le tatou Tulafono Tau Faaofi, e ui lava ina ua faaui i tua le lafo o le Toe Teuteuga, o lea la ua toe faatulai mai nei, a o lou lava vaai i le suiga e fai lava sina lavelave ma faigata o lau vaai. O le tatou suiga lea na aumai muamua e le Malo o lo o maioio lelei afioaga ma nuu taitasi e malamalama gofie ai foi lou sui usufono, tasi lava lau tilotilo ma ou faitau o le malamalama ia o le mea muamua sa i ai. Ina ua faatulai mai nei lea suiga o le mea moni lava ua oo i vaitafe, o gasegase ma isi vaitafe ia e faaupu mai iinei, maimau pe ana aumai ma ni faafanua e malamalama lelei ai nei vaitafe ma lea oga auala. O le tulaga i Sasae lau Afioga i le Fofoga Fetalai, o lo o i ai le ala i Vaitele, o lo o i ai le ala i Vaimoso ó e pei o mea faapena e le atoatoa foi lou sui usufono ona malamalama i lea tulaga. E oo foi i parcels o fanua o le Malo e le o malamalama i ai lou sui usufono i le mea o tulai mai ai i lenei taimi. A tuu atu foi i le nofoa o le taulaga i Sisifo o lea ua oo i le Itumalo palota o Safata, o lona uiga ua oo i tua ia Palusalua, o le vaavaai latou pe a vaavaai i ai, e fou i le vaai, e pei o se tulaga faapena e le o malamalama. O lou sui usufono ou te tautala i lau amiotonu ou te le o malamalama i le toe faataatiaga lea ua taatia ai le tulaga o tuaoi. Atonu e sao lava le saunoaga a lau Afioga i le Minisita a o lau lea vaai e le mafai ona tuua ae avatu lava lagona i lumamea aua o so o se Tulafono Tau Faaofi lava e talanoaina e ao lava ona malamalama lelei. E ui o lea ou te talitonu o lo o i lau Afioga i le Palemia ma le Kapeneta aemaise o le Tamaitai Minisita, e leai lava se mea e faigata.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ou te talitonu e i ai se tasi o sui usufono ua uma ona faataamilo atu tusi e a outou afioga e oo foi i sui mamalu o le Palemene, o le tatalo a lou sui usufono o fea o i ai le tofa i lau Afioga i le Palemia ma le Kapeneta ma lau Afioga i le Tamaitai Minisita, ou te talitonu ua vave mai le tatou Faiga Palota, ae a pe a faataatia lenei suiga seia aulia lena Paeaiga ma tatou toe omai ma fai se isi suiga. O le agaga lena ae ona ua manatu ua lalata mai le tatou Faiga Palota a o lenei o le a toe fai lenei suiga. Ua ou manatua ai lava le upu faamafanafana a le Aposetolo o Paulo i le Ekalesia i Filipi, 'o i tatou o le aiga e tasi.' O lea na saunoa le Afioga i le Fofoga Fetalai nei i le taeao i le tatou Motu i Sasae, o i tatou o le aiga e tasi. Ia manatua foi, o le mau a lenei Aposetolo, ua uma aso la sa tatou nofo pologa ai i tulafono o le feagaiga tuai ua uma aso ia, o lea ua i tatou le agaga o Iesu Keriso ua tatou aiga ai e tasi, ua le toe taua tatou o ni pologa i le tulafono, ae ua taua tatou o atalii, a tatou talia loa o tatou o atalii, o tatou uma lava o suli moni o le Malo o le Atua.

Lau Afioga i le Palemia ma le Kapeneta ma lena itu, ia o fea o i ai le tofa, o fea o i ai le susuga? E talitonu lava, o lea ua tatou aiga e tasi, taatia ia o tatou vaega faaupufai, ae tatou o faa-aiga, ioe. O le tatalo i lau Afioga i le Palemia, o fea o i ai le tofa? E talitonu lau Afioga i le Fofoga Fetalai, o le tatalo lava ia a Papalii o le Aiga Sa Malietoa, ia e le tau atua lau Afioga i le Fofoga Fetalai, o lau Afioga i le Palemia, o lau Afioga i le Tamaitai Minisita mo Faamasinoga, o Poututoa o le Aiga sa Malietoa, ioe. O le tatalo a Papalii, o fea o i ai le susuga? E talitonu lava, o le Susuga o le Aiga Sa Malietoa e faalanu maaveave ia malu ai le folauga a Samoa, o le tatalo lea a le sui usufono mo Faasaleleaga Nu. 2, o fea o i ai le finagalo, ia ae.....

FOFOGA FETALAI: Malie le sui usufono mo Faasaleleaga Nu. 2, o le a faauma lau faalanu maaveave pe a faasao atu le.....

Tulai mai lau Afioga i le Minisita.

Afioga Hon Fiamé Naomi Mataafa: Lau Afioga i le Fofoga Fetalai, na ona ou fia soso atu lava i le Afioga i le sui usufono ua saunoa mai ia maua ma le Afioga i le Palemia o Poutu o le Aiga Malietoa, e maualuga le aiga o le Afioga i le sui usufono, ou te le iloa i le Afioga i le Palemia aua o le Alo o le Malietoa, a o si o matou aiga, ia e ese foi si o matou aiga i le aiga maualuga o le Afioga i le sui usufono ia Sa Malietoa.

FOFOGA FETALAI: Ia o le faaeaea lea e taumafai mai ai le sui usufono mo Faasaleleaga Nu. 2 i le taeao.

Tulai maia le sui usufono mo Faasaleleaga Nu. 2 faauma maia lau faaeaea.

Susuga PAPALII LIO FAAVAIIVAIOMANU TAEU MASIPAU: Lau Afioga i le Fofoga Fetalai ia ua saunoa le Tamaitai Minisita, e leai, e le tau faapupulaina, e silafia e Samoa ato, ioe, o le Aiga paia, ia o le Aiga e tau i le lagi, a o le Aiga foi o le Malietoa, ioe, o le ala lea, o le ala lea o le tatalo i lau Afioga i le Tamaitai Minisita, o fea o i ai le Susuga? O fea o i ai le Tofa?

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le faaoololomaau lea a Papalii, ioe, e talitonu foi o le a tatou toe vevesi lava i lenei lava mea o le suiga faafuasei.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa ou faapea o le a tulai mai Leaupepe e faasao le mea lea, o si o matou foi tamai Aiga o Sa Tuala, e pau lava lena o le Aiga na malepelepe ai le lagi, na faaatoatoa e Malietoa ae toe omai le Aiga Sa Tuala, talepe.

FOFOGA FETALAI: Ia malo, tulai mai le sui usufono mo Faasaleleaga Nu. 2.

Susuga PAPALII LIO FAAVAIVAIOMANU TAEU MASIPAU: Ia o le tatalo lea ma le faaaloalo i lau Afioga i le Fofoga Fetalai ma lau Afioga i le Palemia ma lau Afioga i le Minisita, o le tatalo lea, ia ma le agaga faaaloalo, faafetai.

FOFOGA FETALAI: Malo faafetai. Ia tulai mai le sui usufono mo Vaisigano Nu. 2 tulai mai ua maua lou avanoa.

Tofa MOTUOPUAA UIFAGASA AISOLI VAAI: Faafetai i lau Afioga i le Fofoga Fetalai, faafetai mo le avanoa, faafetai foi i le faafoeina o le tatou Fonotaga i lenei taeao, ia maua pea lou ola ma le malosia e tautua, e faapena foi lenei Maota i le Taitai o le Malo, le Taitai o le Itu Agai, e faapea foi le mamalu o le Palemene o Samoa.

Ae ua ou tulai atu ma le faaaloalo lau Afioga se i fai atu pea se faamatalaga i lenei Tulafono Tau Faaofi. Ina ua aumai le Lipoti foi a le Komisi o le Faiga Palota, na ou matua tetee lava i ai i le latou Lipoti, ona ua faitau faitau faitau, ou te le i vaai lava i se mea aoga o i ai i totonu, o lea e tusia i le Hansard lau faamatalaga na fai, e pau lava le mea na ou tilotilo i ai na omai ma latou, o le tusiga o tuaoi, na o le pau lava lena o le mea na ou tilotilo au i ai, o le tuaoi o le mea e fai a le palota a Safata, o le mea e fai a le palota a Faasaleleaga Nu. 1, Nu. 2, tuaoi o Salega ia ma isi tuaoi, ae le i sau ai la le tuaoi lea, e ese la le tuaoi lea, ona o le tuaoi lea, o le tuaoi e tusi faapapalagi tusa o mea o seats faapapalagi lea tatou te o ai po o urban seats, pe a tau faapena i se isi.....E tau o nofoa nei e tau o Urban Seats, ae a ou tilotilo i le mea ua tusi a le tuaoi, ua defeat le definition o le mea e tau o le Urban po o le.....a e vaai i le tuaoi o i i le Urban East po o i i le itu lea i sasae, e maioio mai lava nuu ma mea e alu ai, a? A e vaavaai la i le Urban West, e te le iloa, e alu i le atumauga ae i luga alu i o i le mea e i ai.....

Afioga Hon Fiamē Naomi Mataafa: O le mea e fia faasao lau Afioga.

FOFOGA FETALAI: Malie lau Afioga i le sui usufono mamalu, se i tu atu le avanoa i le faauilavea a le Afioga i le Minisita.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon Fiaame Naomi Mataafa: Sa saunoa lau Afioga i le aso ananafi sa mafai ai ona faamalamalama Tulafono Tau Faaofi e sui o Matagaluega, ou te le iloa pe sa auai ai le Afioga ia le sui usufono sa saunoa nei, ia i tulaga lea o tuaoi, e pei e lelei ia lou tulai atu e faasao. O tuaoi lea e faataatia mai i le Tulafono lea ma Teuteuga ia ua uma ona teu, o tuaoi ia o lo o i lalo o le tatou Tulafono, Territorial Constituencies 1963. O lona uiga, o le toe teuteuga lea e aumai i le taeao nei, o lea lava o lo o sosolo tuaoi o nofoa ia e tu taulaga i tuaoi ia ua uma ona faataatia itumalo faa-alaalafaga o Vaimauga Sisifo ma Faleata Sasae, o lona uiga, e le fou, o lea e faataatia i luga o faavae ua uma ona faatulafonoina i le tatou Tulafono o Itumalo Faa-Alaalafaga.

O le faasaoga lea lau Afioga.

FOFOGA FETALAI: Malo faafetai. Tulai mai le sui usufono e faaauau le saunoaga.

Tofa MOTUOPUAA UIFAGASA AISOLI VAAI: Faafetai i lau Afioga i le Fofoga Fetalai, faafetai foi i le Tamaitai Minisita. Silasila foi lau Afioga i le Tamaitai Minisita, o le 2015 lenei, sometimes commonsense prevails, e te tuutuuu agai mai i luma le.....ona i ai lea o se ia au, silasila, a e vaai i le toatele o tagata ia e omai faatau ia mea o fanua tutoatasi, e taamilomilo mai i o i tafatafa o Vaitele, alu ae i uta i Moamoa, Vailima, Siusega faapena, ona fua lea i ai o le taimi lenei, e le toe fua i tua, fua i le taimi nei. A ou vaavaai la i le mea na.....sa tatau foi ona faamalamalama mai i i le Constituency West, o fea, faitau, faitau, pei o le tala o le tau foi lea pe a faitau mai i luga o le Televisi ona oso atu ai lea i luga i o sisio ane i o, ae se i faamalamalama lelei, o lele ua nofoi Samoa, e tatau la ona define faalelei po o fea boundaries nei, a silasila atu nei, ia e ofo lou loto i nei ituaiga tusiga....ia ae le afaina, o lea ua saunoa lau Afioga, po o a foi tala e fai i lenei taeao, e le toe suia lava.

Lau Afioga i le Fofoga Fetalai, e pau lava lena o le mea o lea e le o kilia lelei i lau tilotilo ia, po o fea tonu? A avatu nei i tagata nei e fia o i le palota, po o fea, ia fai atu, ia o i tai i le ofisa o fuagafanua e faasino mai po o fea le ituaiga boundary lea e alu ai, aua e matua le o matua ilitata po o fea le mea o i ai.

Lau Afioga i le Fofoga Fetalai, pei o lou naunautai atu lea i lenei taeao, ona i lau lava tilotilo ia faatagata o alu i le palota, o e foi e naunau e fia o i le palota, e matua le talafeagai lava.

O se faamatalaga lea i lenei taeao, ia manuia le tatou Fono.

FOFOGA FETALAI: Malo faafetai i le sui usufono mamalu.

Ia se tasi o sui usufono mo Salega, Afioga Afualo Wood Uti Salele, faamotu maia lo oulua pito i luma ona avatu lea o le avanoa i le sui usufono mo Faleata Sisifo.

Tulai mai se tasi o sui usufono mo Salega, Afioga Afualo Wood Uti Salele.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga AFUALO WOOD UTI SALELE (Salega): Faafetai i lau Afioga i le Fofoga Fetalai mo le avanoa matagofie, ua uma foi ona momoli atu le faafetai i le la itu i le Afioga i le Palemia aemaise foi o le nofo a Minisita, le afio o le Taitai ma le Sui Taitai o lenei itu, aemaise o le tapuaiga mamalu o tamalii ma failauga o e foi ua lautogia latou te pule faasoa le tamaoaiga o le atunuu aua lava ia vaega ua lautogia ai outou, aemaise lau faafofogaaga Samoa.

O le Tulafono Tau Faaofi, ia e agai sao lava se faamatalaga a Salega i le Tulafono Tau Faaofi, ona ua faafagogo tagiao foi i le faafofogaaga a le atunuu, e moni e le o aafia ai Salega aua o Salega o le isi itumalo ua uma ona vaelua, ia ae ona o lea ua i lumamea, e i ai nai au fesili ou te fia malamalama ai i lau Afioga i le Tamaitai Minisita.

O lea ua manino lava lou finagalo i le vaeluaina ma le tuaoi lea ua aumai, ia ae i ai lava lou lagona e tatau lava ona oo i o i Vaitele ona o le tele o le paia o le atunuu ua nonofo i fanua tumaoti. Ia po o le a tonu le mafuaaga aua e moni e le i manino foi ona faamalamalama e ofisa ananafi ia tulaga ia, ae ou te masalo o lea e faafogafoga le atunuu, e lelei lava lou tali sao mai, ona manino ai laia, aua o lou talitonuga ia, o vaega uma nei e lavea i lalo o nofoaga taulaga, ia e tele foi aemaise o le fuainumera la e i ai aua o le palota lea na uma nei, na oo ai i le 6,000 le lola lea e i i le itu lea i Faleata, afai la e toe faaopopo atu ma lea, o lona uiga o le matuai tele lava o le fuainumera e sili atu ona tele i le tele o isi itumalo, po o fea la o i ai le amiotonu i le agai i luma.

Ma le vaega lona lua, o isi vaega o le Tulafono o lea ua ou malie i ai ona e tele foi le taua e aoga aemaise lava mo i latou ia e i ai le avanoa e toe fesiligia ai le agavaa po o ua faamalieina uma vaega lea ua uma ona faataoto i lalo i alafua e mafai ai ona tauva se sui, faafetai mo le teuteuga lea. A o le vaega lea e 6 masina, o le a tonu lava le.....aisea ua 6 masina ai? Ona sa i ai lava lou talitonuga sa tatau ona tuutuu laitiiti atu i tua, pe 12 masina ia pe tatou te o foi i le 3 tausaga lea e tuu mo sui ia mai fafo lea e tatau ona omai e autovaa i inei, ona faatoa mafai laia ona agavaa e tauva mo le palota, a o lea ua ou vaai atu nei, e na o le 6 masina. Ou te le o malamalama la i ai po o le a tonu le agaga na ala ai ona faavae ia le 6 masina lea, ae sili lava lou saunoa sao mai ona manino lea. A o isi vaega o le Tulafono, o lea ua ou malamalama i ai ia ua faigofie foi, ae le mafai la ona talia atoatoa suiga lea e lou sui usufono mai Salega, pe afai e le malamalama vaega lea mo le tatou Tulafono.

Lau Afioga i le Fofoga Fetalai, pei o manatu ia e avatu, ae faafetai tele lava.

FOFOGA FETALAI: Malo faafetai. O le a tuu atu le avanoa i le sui usufono mo Faleata Sisifo, tulai mai lau Afioga i le sui usufono mamalu.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai ma le mamalu o le Fonousu a Samoa aemaise foi o le faafofoga mai a le atunuu, e faatalofa atu i lenei taeao fou mai le Atua.

21 *APERILA 2015*

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ua silasila mai lau Afioga, ua ese foi au sikaili ia ua ou sounds, up and sign, ua new fashion, aua na ou alu atu i Ausetalia ua foi mai le Afioga i le Sui Palemia na o atu e faalauiloa oloa foi ia a lo tatou atunuu, ou alu atu lea fai i ai ou alu atu ma ou ofu ia, a, o ofu ia ua tatau foi ona sui ai sikaili a tatou faaformal, fai lelei fusiua ma faaaoga lelei, ma le tatou o faatau mai ofu papae ia e laei ai sui usufono mamalu o le Palemene, alu ai tupe i fafo, o lea la na ou fai atu nei i lou toalua i le taeao, aumai lou ofu lena, o lea o le a ou suia sikaili o le mea e faamanaia, a, e faaaoga ai lava tatou elei ma o tatou tagata suisui i Samoa.

A o le tatou mataupu ua toe tuu mai i le taeao lau Afioga, ou te talitonu ua tatau ona fai sau tala, ona pei o lou itumalo lea e aafia i lenei vaevaega ma le suiga ua tuuina mai, ae i lou tagata, se o mea faapenei, o mea o le olaga, mo luitau masani o le olaga e le faapopoleina ai le tagata ua mauaa lona faavae i le Atua, leaga o le Faavae lea o Samoa, ioe. Na e saunoa i le taeao, manaia, e faamama mea mamafa, faafaigofie mea faigata. O le mataupu, oka se mataupu ina faigofie, e le o se mataupu mamafa. Ou te faatalofa i le faafofogaaga a lou itumalo, ou te talitonu e pau lenei o se Fonousu a Samoa ua matua ki leotele le laau a le toeaina ma le loomatua, ua uulima faatasi, aumai ma le fanau ua le o i ni aoga, ae ua faalogologo mai, ua le o i ni aoga, aua o le aso lenei, o le aso lenei ua aafia ai lo tatou lumanai i le agai i luma i le tatou itumalo, omai tatou faalogologo po o le a se feau a le tatou auauna o le a tuu atu sana tuualalo i le Malo, faaoololomaau i le Tamaitai Minisita ma le Malo i le mataupu ua tuuina mai ina ia tefa le taula ma toe tagai mamao. Ioe.

Fai mai le Salamo sa faaaogaina e le tatou Failotu ananafi i le tatou mafutaga matagofie, sa ia taulotoa le Salamo e 133, i le lelei o le nonofo faatasi o uso. òFaauta, o le mea matua lelei ma le matagofie lava pe a nonofo faatasi o uso, e tusa ma le suauu i le ulu, ua tafe ifo i le ava, o le ava lava a Arona, ua tafe ifo i le ua o ona lava ofu, e tusa ma le sau mai Heremoni, ua toto ifo i luga o le mauga o Siona, aua na poloai le Alii ia oo i ai lana faamanuia e faavavau. ò O le auga atoa o le lauga, po o a itu tatou te tutu ai i le Palemene, ae tasi lava le auga, galulue faatasi mo le manuia o Samoa. Ona ia faatusa lea o le Palemene o Samoa, o le mauga o Siona, o le mauga e faamanuia i ai le Atua ona manuia atoa ai lea o Samoa.

Lau Afioga i le Palemia ma le Faigamalo, o le manulauti uma lea o faiga faavae a lou Malo o le faia o faaiuga uma ma le agaga ia manuia Samoa atoa. E le faapito augafa i se isi po o ni nai tagata. E le o po se lilo, tasi lenei mau tauave a lenei sui usufono talu ona ulufale i totonu o le Palemene o Samoa mai lava i le amataga, o se sui usufono faaopopo mo lenei itumalo. Ua ave atu uma ai mafuaaga tatau ai. Aisea? O le fatupulaia o le faitauaofai o Faleata Sisifo, e le o se loto o lenei itumalo, o le finagalo o le Malo, e tusa ai o ana fuafuaga tuutumamao lea ua mafua ai ona autovaa mai le tele o Samoa, ua affio ai i nei eleele o le atunuu ma avea ma o latou nofoaga tumau.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E le o ni fuafuaga fou, o fuafuaga na faataatia mai talu ona tutotatasi Samoa. O i sa tuu e fai ai le uafu i le amataga, e oo i le malae valele, o mea uma lava, lea ua toe foi le Malo e toe fuafua se isi uafu faava o Malo i lenei vaega o le atunuu, i Faleata Sisifo ma saga faatupulaia ai le faitauaofai, ua avea ma taulaga. O le mea moni lea, o le taulaga o Samoa, o falegaosi mea, o fale faigaluega ma so o se vaega tau atinae o Samoa, o fale taalo, ua tapuvaetasi uma i Faleata Sisifo. Ina ua fai la le Tulafono lenei e faatalanoaina nofoa o le taulaga, e le mafai le mafai le mafai ona aveese ai Faleata Sisifo ma Vaitele, leaga o le vaega, its all parts and parcels of all forward planning a le Malo, o vaega tuutumamao a le Malo, e lavea ai i i, e le mafai ona aveese. Ina ua aumai la le Tulafono na faataatia mai ia Me o le tausaga na tea nei, ma aumai ai lava ma le faafanua lea ua lavea uma ai Faleata Sisifo, e leai ma se sui usufono o le Palemene na tetee. Na i ai sui usufono e toatolu na tetee i o latou nofoa ae le i tetee i le vaevaeina, e 100 pasene tagata na matua malilie i le vaevaeina ma le faataatiaga o tuaoi. O le mau lea na aumai le Komisi faavae, na faamaonia e le Komiti Faapalemene na Taitaifono ai lau Afioga i le Fofoga Fetalai. E leai se isi na faaali sona manatu tetee i lea vaega. Aisea? Na saunoa le sui usufono mo Vaisigano Nu.2, e leai se Samoa na te le iloa, is a simple logic, vaai, tailo, ou te le tau fai atu lau Afioga i le Tamaitai Minisita, e faamalulu atu foi, o le a se maitau a lau Afioga i le tusi na tuuina atu, leai o le agaga lava na avatu ai, leaga o oe ua e matua i upufai, ua e masani. E leaga o le tau faamalamalamaina o le sao o lenei itumalo. Silasila foi lau Afioga, palota o le 2001, e 2,260+ tagata palota o Faleata Sisifo, 2006, e 2,840. O le palota lea na mavae atu nei i le 2011, e 5,057, ua ova atu ma le faaluaina, ma ua oo i le tulaga ua tele atu tagata palota o nonofo i luga o nofoaga freehold, latou lava fanua faatau i lo tagata o lo o nonofo i luga o fanua faaleaganuu. O a fa au ma lenei mea ua fai? Ae a faapefea ona pogisa lau silasila i lea vaega? E tasi lava le benchmark, le auga e faavae ai ni sui faaopoopo o itumalo, lea na faaopoopo ai le sui usufono mo Safata ma Salega, e tasi lava le mafuaaga, ua toatele le faitauaofai, e le o se isi lava itu. O le fesili la lau Afioga i le Minisita, aisea ua toe see ese ai le Malo mai ana fuafuaga tuutumamao? Ae le masani ai. A e gasea e tuu mai nei vaevaeaga. O lou iloa ma le silafia e le Palemene lenei, o le faatolu lenei ona aumai o le vaevaeaga lea, o le vaega muamua na tuu mai i tuaoi mai le vaevaeaga o le 2004, lea na talia atoa e le Palemene, lau Afioga, o le vaevaeaga tonu lena. O le mea muamua pei ona fai mai nisi, o le mea lena mai le Atua.

Afioga Hon Fiamē Naomi Mataafa: Lau Afioga i le Fofoga Fetalai o se mea e fia faasao.

FOFOGA FETALAI: Malie le sui usufono o lo o saunoa se i tuu atu le avanoa i le faauilavea a le Afioga i le Minisita mo Faamasinoga ma Mataupu tau Faamasinoga.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon Fiamē Naomi Mataafa: Sa le fia faalavelave lava i le saunoaga a le sui usufono, aemaise o lea tatou te malamalama uma i le aafiaga o lo o saunoa mai ai ma lona mafatiaga, ae ao lava ona ou toe faamalalama atu lau Afioga i le Fofoga Fetalai, o le mea lea e fia faasao, saunoa pea sui usufono o le mea ua uma ona pasia ma talia e le Palemene leni. Ou te faasao atu, e le i talia ma pasia e le Palemene leni. O le tulaga na pasia e le Palemene leni i le tatou Fono talu ai, o isi tuaoi uma, ae le i pasia le tuaoi lea aua na toe faamaui i tua, o lea faatoa tatou talanoa lea i ai. Ou te le manatu la lau Afioga i le Fofoga Fetalai mo faamaumauga faapea o se mea o lea ua i totonu o a tatou tusi tulafono, a o lea ua toe sui. O le faasaoga lena lau Afioga, e le o i ai i totonu o tatou tusi tulafono.

FOFOGA FETALAI: Ia, tulai mai lau Afioga i le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Tamaitai Minisita mo le folasaga. O le mea lea na ou musu ai ou te oo i le tulaga lea, sa ou tautala faalauaitete. E leai ni Tulafono e aumai aumai aumai ni mea e fai toe omai toe tasui ae le i pasiaina. O lea tatou te iloa e le i pasia, ae o lea foi tatou te iloa ma mauiina Tulafono e fia selau ua aumai le Palemene, e seasea ou te le iloa talu ona ou sau, faatoa ou vaai lea i se Tulafono ua sui ae le i faamauiina, ae ua uma ona aumai, o lau Afioga lava na aumai, e le i aumai e Lealailepule, e le i aumaia e Motuopuaa, na aumai e lau Afioga.

Afioga Hon Fiamē Naomi Mataafa: Lau Afioga i le Fofoga Fetalai, o le mea e fia faasao...

FOFOGA FETALAI: Malie lau Afioga i le sui usufono mamalu se i tuu atu le avanoa i le Afioga i le Minisita.

Afioga Hon Fiamē Naomi Mataafa: Lau Afioga i le Fofoga Fetalai, e maualuga lava le faamoemoe o tatou uma lava o sui usufono, tatou te malamalama i ala o mea ma a tatou Tulafono e faafoeina ai a tatou galuega fai. O le faapea mai o le aumai o le Tulafono toe sui, e le o faia i se auala pogisa pe palapala, o lea na uia auala. Na aumai i le Komiti ae saunoa mai le Komiti, o le a le iloiloina suiga na tuuina mai e le Malo ia Tesema ma Fepuari e toe faafoi atu e toe aumai lelei. O lea ua fai, ae na fai le faaiuga a le Palemene leni, e le o se faaiuga a le Malo, e toe faui i tua le vaega o le Tulafono lea lea e fai uma la i luma, fai i lalo i le tatou Tulafono. A o le ituaiga leo lea ou te faalogo atu i ai i le saunoa mai o outou, o se mea na faalafi pe palapala, leai, o lea lava na fai i luma, lea ua tatou talanoaina i le taeao leni.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Tofa LEALAILEPULE RIMONI AIAFI: Faafetai. E le i tautala Lealailepule i ni mea faalafi po o ni mea faanana, faafofoga mai ma le totoa, e leai e sa. Ma tatou te oo lava i ai pe afai o le tulaga lena. Ae ou te musu.... Lau Afioga, o le uiga o lau faamatalaga, ina ua e toe afio mai ma le vaeveaga lea i le Komiti, na aumai ua i ai nuu o le taulaga lea i Sasae, ua i ai Sogi ma Mulinuu, lea na toe fai atu le Komiti, e le sao. O le a le mea o le a i ai ma Sogi ma Mulinuu e le o lavea i le itu i sisifo? Ae aisea ua le lavea ai Vaitele ma Faleata Sisifo pei o le mea na e sau ma oe muamua? Aisea? O le mea lena na ala nei ona avatu e te toe afio e toe faasao mai, toe faafoi le boundary i le mea na i ai, aveese nuu sa le tatau ona i ai, ae toe tuu le mea i le mea na e afio mai ma oe muamua, o le mea moni lea ma le sao. O lea la ua e toe afio mai nei ma le suiga lea ua i ai nei, na pau lava le mea lea ua aveese, ua toe aveese mai Sogi ma Mulinuu ua toe faafoi i le mea sa i ai. E le sao la le Komiti? Toe aveese mai Sogi ma Mulinuu e tuu i i, ae ua alu atu le boundary o le taulaga i sisifo, alu atu oso atu i Vailoa ma Vaiusu i le tuaoi o Vailoa ma Vaiusu, oso atu lava i Siusega alu i uta i Aleisa, oo i Safata, alu atu tau i Lanotoo. Ni urban areas nei mea? Ni taulaga ia mea? E leai. O le mea lea na fautua atu ai i lau Afioga, se i e afio e toe faasaosao mea ia, e oo lava i lau Afioga, e le o sao le boundary lea e aumai. O le mea lea na tuualalo atu ai ma le ava tele i lau Afioga. Ua e saunoa mai ua ou mafatia, ioe, e ala ona ou mafatia, ou te mafatia alofa i lou itumalo ma ou tagata. A o Leala ia e le o se tagata e mafatia, o le tagata e ola fiafia. Ioe, God is good. Se i vaai i lou tino? Se a soa e le pau sefulu e le ila. Aisea? Se e malosi pei o le tarako. E le o mafatia la Leala mo Lealailepule. Aisea? Aua tou te fiu e vaevae le itumalo lenei, e le fai atu sau tala, e le fai atua sau faamatalaga, aisea? Leaga o tofiga na pei ona outou saunoa soo mai ai, aemaise le Afioga i le Palemia, o tofi, o tofi mai le Atua, ioe. O lau fautuaga, aua tou te vaai ia Lealailepule, leaga e le faia mo Lealailepule le nofoa o Faleata Sisifo. O au nei, o isi taeao, ae fai fuafua mo le paia o Samoa, fai fuafua mo le manuia o Samoa e pei o la outou manulauti. Fai fuafua aua le itumalo, ioe.

Lau Afioga, o lau tuualalo i lau Afioga i le Palemia, afai ua saunoa le Afioga i le Tamaitai Minisita e le o ni mea faalilolilo mea nei, e fautuaina lau Afioga ma le Faigamalo, aua la le pasia i le aso, toe faafoi i le Komiti pei ona masani ai a tatou Tulafono, leaga e ogaoga ma tulaga ese le Tulafono Tau Faaofi lenei. Toe faafoi la i le Komiti se i toe iloilo e le Komiti po o fea o i ai le amiotonu lea e saunoa i ai le Afioga i le Tamaitai Minisita, po o fea o i ai. A aumai o le a lava le tali o i ai, o lea e faafofoga lou itumalo, ua ou malie foi. Ae o lau fautuaga lea ma le tuualalo i lau Afioga i le Palemia, se ua sulu atu lenei itumalo i lau Afioga, se i alofagia ia tuu i le Komiti le tatou mataupu e talanoaina ai. E tele ma anoanoai nisi o mau ou te fia tuuina atu, ae ou te talitonu, o ni faamatalaga ma ni mau ou te tauina atu, ae ua leva ona outou silafia. Aisea? Ua fia ni Komiti Suesue, Komiti Faapalemene aemaise le tatou vaai i aso fai pea ma le tulaga i fuafuaga alualumamao a le Malo.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Lau Afioga i le Tamaitai Minisita, e faamalulu atu, sa e feiloai i taitai o lenei itumalo i le aso ananafi, e ese le matagofie, leaga o tama ia e te malu ai pe a e oo mai i lou itumalo o Faleata, e le tau fai atu ua silafia e Samoa atoa, o oe o le Faumuina, o le tupu na tausi e Faleata ma Samoa atoa. Ia, o le tuualalo lea i lau Afioga, e le tau fai atu lea tulaga, o le faaiuga sao, o le faaiuga lea e filemu ai lou finagalo. Because only the truth that set us free, ioe. Na o le mea sao lava tatou te maua ai le filemu. Aua o au lau Afioga, ou te moe lelei i po uma, e fiu si ou toalua e fafagu au faapea ai ua ou oti i lou taagulu, ae ou te moe fiafia, moe filemu aua ua saoloto lou mafaufau ioe. Lau Afioga o lena, o le mau tauave a le PSA na ou aoga ma ou mulimuli ai ðe malosi le mea moni ae le moni le mea malosio. Right is might not might is right

Ia faamanuia le Atua i lau Afioga i le Palemia ma lena Vaega, faamanuia tele i lau Afioga i le Tamaitai Minisita ma lau Tulafono Tau Faaofi. Lau Afioga i le Palemia, o le tuualalo lea a lenei Itumalo. O le tapuaiga a lou Itumalo faafetai le tapuai mai mo lo outou Tama lenei o le Itumalo, atonu foi ua aoga lenei mataupu ua tatou mafuta ai pea ma tatou feoeoeai ma tatou fealofani atili, ia faamanuia le Atua i lo tatou Itumalo. Ia saga faamanuia le Atua ia Samoa atoa ma lau Afioga i le Fofoga Fetalai ma le Fono usu a Samoa. Faafetai ma ia manuia le Fono.

FOFOGA FETALAI: Tulai mai se tasi o sui usufono mo Palota Taitoatasi.

Susuga Hon PAPALIHITELE NIKO LEE HANG (Palota Taitoatasi): Faafetai i lau Afioga i le Fofoga Fetalai mo le avanoa. Sa nofonono lava ma matau lauga a le la Itu, o lou tulai atu lau Afioga ou te le tali atu i ni aafiaga o nisi Itumalo i le teuteuga ua taatia i luma o le Laulau a Fono ae ou te tali lava au i aafiaga o lou Itumalo i teuteuga nei.

Lau Afioga i le Fofoga Fetalai, a tomanatu i le taumafai mai o au nei ma le Afioga ia Maualaivao i le tuuina mai o lea teuteuga ona o le a liliu le Nofoa o le Palota Taitoatasi i le Nofoa o le Taulaga. E lagona foi le manatu le fiafia ona o suiga o le a i ai, ae peitai na faagasolo lava le galuega a le Palemene, e pei ona saunoa se tasi o uso a sui usufono i le Salamo e pei ona taua, amuia uso e nonofo faatasi, ae leai ma se uso na tulai mai o lena itu e lagolago mai lo ma taumafai atu ia aua nei suia le tulaga o le ma Nofoa, peitai ane ua alu lava le faagasologa o le tapenaga o lea suiga ma ua alu foi i le faa Komiti, sa ma o foi i le Komiti ma ma tatalo ai, sa tuuina mai le avanoa e toe avatu ai se fautuaga i se boundary lea ua tele ai nei faitioga. Ona pau lava le ma tuualalo na tuuina atu i le Komiti, malilie le Komiti ona e fai sina mamao tele o lo ma Itumalo ae lelei ona aumai ni nuu mavae i totonu lava o le taulaga e fai ai Nofoa fou nei.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le popolega i le taimi lena lea ua aliali mai i le taimi lenei, o le aafiaga o Itumalo nei e i ai nuu mavae, lea e pei ua ma nonofo atu lava a ua pei i maua o Ae, ua fai lava le tulaga o finauga a o lea e lotolotoi Nofoa nei i totonu o Itumalo ia ua fai ai finauga. E leai foi se ma finauga malosi i lea tulaga ona ua uma ona taatia le ma talosaga i le Komiti, atonu o le tali lea ua aumai i nei teuteuga ona o le isi ma talosaga sa tuuina atu i le Komiti ae a pe a taumafai ona na taatia mai e lavea Vaimauga Sisifo, Vaimauga Sasae, Faleata Sisifo ma Faleata Sasae i Nofoa nei e lua. O le ma talosaga ae a pea tau localize le mea for example po o ua lava Vaimauga Sisifo ma Faleata Sasae, ae taatia ai ni nuu le mavae mo Nofoa fou nei o le tulaga ia urbanize Nofoa ia, O le ma tuualalo po o le ma talosaga lena ae le fai ai ona o lo o fai le galuega a le Komiti aemaise foi o le tuuina atu i le Kapeneta mo se latou suesuega . O lea ua pasia mai nei lea teuteuga ma sa i ai foi so maua faagau le malie ona o le distribution lea e tau mai ai mauga ma vaitafe, ae peitai ane ina ua faamalamalama mai o lea lava o le a faaoga boundaries ia e faaoga e Itumalo Palota faale-aganuu. Ua maua talia lea tulaga ma ua tau mai o nuu o lo o aafia ai o Vaimauga Sisifo ina ia faigofie ai ona malamalama faapena foi ma Faleata Sasae. O le tulaga ua oo i ai ina ua malamalama foi o le ma tatalo ona o maua o lo o aafia ai i le tulaga o le teuteuga a o lea ua vaavaai atu i le taimi ua vave mo le Palota ae le o i ai sa ma tapenaga ona ma te le o mautonu po o ai tagata e fai ai le ma campaign.

O le tulaga lena e avatu ai se manatu lau Afioga i le Fofoga Fetalai, atonu e saunoa foi se tasi o ou uso a sui usufono, Afioga Maualaivao, ao au ou te talia lenei teuteuga ona o le taimi ua vave a ua ma fia tapena foi.

Ma lou faaaloalo lava.

FOFOGA FETALAI: Malo faafetai, se i tulai mai le isi Nofoa tu taulaga o le Palota Taitoatasi.

Afioga MAUALAIVAO PAT AH HIM (Palota Taitoatasi): Faafetai mo le avanoa i lau Afioga i le Fofoga Fetalai. Ou te tulai atu ma le faaaloalo e pei ona outou faafofoga ua saunoa se tasi o sui usufono o le Nofoa o le Palota Taitoatasi po o le sui usufono o le Nofoa o le Taulaga o i ai tatou Nofoa i lenei taimi. Ou te faaopopo atu e pei ona saunoa le Susuga Papaliitele i le paia ma le mamalu o le Maota nei, lau Afioga i le Fofoga Fetalai faapea le paia o le Malo, lau Afioga i le Palemia ma le Kapeneta. Ua logologoa ma ua tele saunoaga ma fetalai e tusa ai o lenei itumalo o le Palota Taitoatasi. Sa i ai lava lagona i le amataga e pei ona faafofoga mai lo tatou Itumalo, o lagona sa faaalua le agaga popole po o fea o le a agai i ai ó sa fai la matou faamatalaga i lo ma Itumalo, o fea lava e agai i ai suaga o le vaa tele tatou te malaga faatasi uma ai lava. E tatou te le fefefe pe tatou te le talitonu e tuulafoaiina i tatou e le Atua.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le taimi nei ua matou vaai i le tele o suiga sa amata ona auauai mai ma faamalamalamaga e tusa ai o sui usufono o le Taulaga, e lagona ai o se mea lelei ma ua talafeagai. E i ai foi nisi sui usufono faatasi ma ni faamatalaga tau amuamu mai ma faapea o le a sui mai i le Palota Taitoatasi e o i le Sui o le Taulaga e leiloa pe faapefea ona faataatia. E ui o lea o le taimi lenei e faapuupuua atu ma le faaaloalo, e talitonu lava e pei ona saunoa Papaliitele, ua malie atoatoa, faafetai i lau Afioga i le Palemia ma le Kapeneta aemaise o le Minisita e ona le Tulafono Tau Faaofi, lau Afioga i le Fofoga Fetalai, ua faataoto mai e le o faagaloina poo ua tuu ese e sa palota i le Palota Taitoatasi, o lo o tasi lava le sa lea tatou te i ai nei, tatou te o faatasi lava e ala i le faataoto mai o le Tulafono Tau Faaofi.

O le a leai sau tala e tusa ai o aafiaga o itumalo o le Vaimauga Sisifo faapea foi le paia o le Itumalo o Faleata Sasae ma Faleata Sisifo, faamalulu atu e leai se faamatalaga a Maualaivao e tusa o lea tulaga i le paia o Itumalo, ona o aga masani ma faiga faa Palemene o lea ua faataoto mai e le tatou Malo fua faatatau faapea foi le faiga o tuaoi o le Itumalo lenei ua taua o le Itumalo o le Taulaga, sa matua vaai ma faalogologo i le faamalamalamaga o lea ua talia ai ma le fiafia. E faamalulu atu, a i ai se mea ua faamanualia ai sui usufono o lenei Itumalo tasi ae foi atu, e leai se malosia o ia i maua e fai ai se faaopoopo po o se suiga pe agai atu i ai se faamatalaga. Ona pau le aga i le sui usufono mo Faleata Sisifo, e faamalulu atu e pei ona e saunoa malo faafetai, manaia lou vaavaai atu i ou laei i lenei taeao ua matagofie ma ua matua tu ese mai lava le lanu i lena itu ma le faata mai ma le fit lelei ma ua ou matua ofo ai lava.

Ou te faamalulu atuí ..

FOFOGA FETALAI: Ou te manatu ua tatou taunuu i le tatou taimi malolo mo le malologa masani, o le a avatu le avanoa se tasi o sui usufono mo le Palota Taitoatasi, Afioga Maualaivao Pat Ah Him, aemaise foi o le faauilavea a le sui usufono mamaluí ..

Tofa Lealailepule Rimoni Aiafi: Ia lea o lea ou te faafetai ó mo le silafia e le sui usufono leaga o lou toalua e tau leaga mata pea ma o i le po, fai mai pau lava ofu e iloa ai au, fai ou ofu ia poo fea lava ou te alu i ai e iloa lava au pei o se sign foi leaí

FOFOGA FETALAI: Ou te faasilasila atu o le a faataatia ese Taulumaga a le Fono Aoao mo lana malologa masani o le taeao.

Na faataatiaese Taulumaga a le Fono Aoao mo lana malologa masani i le itula e 10:45 i le taeao ma toe amatalia i le itula e 11:21 i le taeao.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

FOFOGA FETALAI: Ou te faasilasila atu o le a toe amataliaina nei Taulumaga a le Fono Aoaofa Fautulafono.

Ia e manatu o lea ua tatou taunuu i le vaega lona lua o le tatou galuega i lenei aso, e manatu foi o lea ua maua le faasiliga malosi, e ala i le tatou taumafagati na maea atu nei. E i ai le talitonuga o le Failautusi ma le Matagaluega, a maua lava le malosi i le tino ua faigofie foi ona faagasolo le tatou galuega i lenei aso.

E faia le tatou malologa o tulei saunoa se tasi o sui usufono mo Palota Taitoatasi, Afioga Maualaivao Pat Ah Him o se tasi foi o sui usufono e fitoitonu i ai lenei Tulafono Tau Faaofi taua, tulai mai le sui usufono.

Afioga MAUALAIVAO PAT AH HIM: Faafetai i lau Afioga i le Fofoga Fetalai, ou te talitonu ua sao i alo le tautega ma le taumafataga i le paia o le Maota, a o lenei itula, faafetai i lau Afioga i le Fofoga Fetalai, e le toe tele foi sa matou faamatalaga, o le agaga moni lava o lena ua avatu so matou lagona, ae ou te talitonu pei ona matou fai atu, pei sa vaalealea lenei itumalo i le taimi ua sola, ae peitai, o lea ua mautu fausaga ua matagofie ia le faataotoga o lenei faamoemoe i si o matou itumalo ma le susuga i se tasi o sui usufono mo Faasaleleaga Nu. 2, Susuga Papalii Lio Faavaivaiomanu Taeu Masipau. Ou te talitonu foi i le agai i luma, pei ona matou fai atu lau Afioga i le Fofoga Fetalai, e talia ma le fiafia, e le tatau foi ona toe avea i le Komiti e toe atili ai ona faaletonu ai lea o le taimi, a o le taimi nei, e talitonu le faamoemoe ua matagofie ma lelei le mea ua i ai. E talitonu e le o le agaga moni lena, e faauma atu ai so matou lagona, e faamalo atu ai faafetai i lau Afioga i le Minisita e ona le Tulafono Tau Faaofi ona o le faatofalaiga ma le faamoemoe ua i ai. Ae ou te talitonu, e le i faamaea atu sa matou faamatalaga, ia leai sa tau fai atu sou lagona aua le sui usufono mo Faleata Sisifo, ia e leai, o le mea sili o lea uafí .lau Afioga i le sui usufono, faamalo le taumafai mai, e talitonu ua matagofie lau saunoaga. O lea ua lagona foi í í

FOFOGA FETALAI: Malie le sui usufono mamalu, se i tuu atu le avanoa i le í í..leaga o lea foi sa tulai mai ae le i faia le tatou malologa. Tulai mai le sui usufono mo Faleata Sisifo.

Tofa Lealailepule Rimoni Aiafi: Leai lau Afioga faafetai lava. Ae tumu au i le ava ma le faaaloalo lava i le sui usufono mamalu. Leai e pau lava le talosaga a Faleata Sisifo, ia uia pea auala e pei ona masani ai, pe toe faafoi i le Komiti le tatou Tulafono, o le a lava le tali e aumai i le Komiti, e le toe faia foi i ai se loto o Faleata Sisifo, ae ia uia pea i auala masani, leaga e le faigofie. O le tala lea i lau Afioga, i te i ua e tatalo tatalo mai e aua le avea i le Komiti, ae avea ma auala e toe manu uaea ai lau lauga matagofie, ona faapea lea o oe e ona le fauuga. Ma le faaaloalo lava, faafetai.

FOFOGA FETALAI: Malie lava lau Afioga i le sui usufono mamalu, se i tuu atu le avanoa i le Afioga i le Tamaitai Minisita.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon Fiamē Naomi Mataafa: Lau Afioga i le Fofoga Fetalai, na ona ou fia faamanatu atu lava i le sui usufono o lo o saunoa, e leai se isi Komiti e sili atu i lo le Komiti o le Maota atoa, ma le faaaloalo lava.

Tofa Lealailepule Rimoni Aiafi: Lau Afioga i le Fofoga Fetalai, e manatu o lēna e silafia e le Tamaitai Minisita, ou te le tau fai atu, ua matua i upufai, i toe atagia ai i ana saunoaga pe a ou toe fai atu. Ma le faaaloalo lava.

Afioga Hon Fiamē Naomi Mataafa: O le mea e fia faasao lau Afioga, e le saunoa mai fua le sui usufono ia te au, o lea ou te faauilavea i se tasi o sui usufono mo Palota Taitoatasi, Afioga Maualaivao Pat Ah Him lea e tu e fai lana mataupu.

FOFOGA FETALAI: Ia ua maea ona saunoa se tasi o sui usufono mamalu mo Palota Taitoatasi, Afioga Maualaivao Pat Ah Him, se i o le a avatu muamua le avanoa leaga o lea sa faailoa mai e le sui usufono moí ..

Oi, ia faauma mai lau saunoaga le sui usufono mo Palota Taitoatasi.

Afioga MAUALAIVAO PAT AH HIM: Faamalo faafetai. Ua leai se isi faamatalaga o lea uai ..ae faafetai lau Afioga i le Fofoga Fetalai i le avanoa lelei, ae ia manuia lava le Fonotaga i le tatou Palemene.

FOFOGA FETALAI: Malo faafetai. Ae le i toe tuu atua le avanoa faamolemole, o le a se i tapa le Afioga i le Palemia mo lana lafo.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo e faatu le lafo, *Ina ia faataatiaese Tulafono Tumau 31(1) ina ia suia ai itula Fono i itula nei: mai le 9:00 i le 1:00 i le aoauli, ia ona fai ai lea o sina malologa ona tatou toe malafoni ai lea i le 7:00 i le 11:00 nanei. O le aso a taeao o itula Fono nei: 9:00 i le 1:00 malolo ai, ona toe faaauu lea mai le 3:00 i le 7:00 i le afiafi, ia ma faamuta ai ma le tatou Fono taeao se i uma nei mea.*

Faaluaina e le Sui Palemia, Afioga i le Minisita mo Galuega tau Alamanuia ma Atinae a le Malo.

Na faamaonia le lafo ma tulai ai Tulafono Tumau 31(1) ua faataatiaese.

FOFOGA FETALAI: E manatu ua sagatonu lau o le fo i le lafo faatu a le Afioga i le Palemia, o le auga foi lēna o le tatou faamoemoe pei ona ou tatalo atu i le taimi ua sola. E lelei lo tatou tiga puupuu, tatou onosai mai nanei e lelei lēna e faasolo ai tatou galuega leaga o lea foi ua taatia alafua o tatou Tulafono Faanatinati ma nisi tulaga uma o tatouí ..Se i toe tulai mai lau Afioga i le Palemia.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: O lea ua uma ona to lau manava ona toe tulai atu foi lea e toe faitau atu le isi au lafo umi lava lea, *Ina ia faataatiaese foi Tulafono Tumau, ona o le tele o a tatou mau Tulafono Tumau o le 100(1), e avanoa ai le faitauga faalua o Tulafono Tau Faaofi uma lava o totoe i le Pepa o Galuega i le aso a taeao. O le atoaga lena o lafo lau Afioga.*

Faaluaaina e le Sui Palemia, Minisita mo Galuega tau Alamanuia ma Atinae a le Malo ma le Minisita mo Faamasinoga ma Pulega tau Faamasinoga.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai o se mea e fia malamalama ai, ae le i pasia le lafo.

FOFOGA FETALAI: Ia ou te manatu o lea ua faatu le lafo, o le a ou faamalamalama atua pe a pasia.

Na faamaonia le lafo ma tulai ai Tulafono Tumau 100(1) ua faataatiaese.

FOFOGA FETALAI: O le tulaga lea sa taumafai e faamanatu atu, e silafia foi e pei ona taumafai i isi a tatou Fono ua tea, o le tatou galuega, sa aafia mea nei o le toe tolofia i le isi tolu aso talu ai ae le i faia a tatou mea nei o De-Briefings, o lea sa tatou maitau i le aso ananafi, o Tulafono uma lava ia sa taumafai ai, o le avatu lea o taimi ia mo outou e faitau ai Tulafono. Peitai o le tatou suiga fou lea ua i ai, ia o ananafi na outou malamalama uma ai i a tatou Tulafono nei ua faitau, o lona uiga, ua tataua ona tatou agai e sui le tulaga o le faatulagaga o galuega, e tataua ona tatou alu i le autafeloa ia faitau uma a tatou Tulafono lea ua i ai nei i le aso. O lona uiga o le a vave ona maea, vave ona uma, ona vave lea ona faatulaga ma faatino galuega a le Malo. O le faamalamalama lea i lau Afioga i le Taitai o le Itu Agai, se i tulai mai.

Afioga Hon Palusalua Faapo II: Lau Afioga i le Fofoga Fetalai, leai e le faasalaese foi, e pau lava le mea ou te fia malamalama ai, e le teʻa teʻa tuu le Tulafono Tumau i totonu, ona o le taua o le ave o Tulafono e lauiluina auiliili e Komiti, maua le avanoa o le atunuu e omai e molimau ai. O lona uiga la a fai faapea a tatou Fono, ua le taunuu la le faamoemoe na ala ai ona tuu Tulafono Tumau nei, ina ia maua le avanoa i le atunuu ma faamalamalama lelei i totonu o Komiti ma aumai. Pei o le mea lea ua ou tulai atu ai.

FOFOGA FETALAI: Ua maua lou finagalo. Tulai mai lau Afioga i le Palemia.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, pei o le agaga lea ou te maua atu, o le agaga o le Tulafono ina ia uma ona ave lea i le Komiti. O le agaga lena e faitau faalua taeao ona ave ai lea i le Komiti, a o le Tulafono lava ia o lea ua i ai le faanatinati, e faanatinati, a, a o Tulafono lava ia e ave i le Komiti, a le sao le faitau faalua lea, e le mafai ona ave i le Komiti ae taatitia ai lava lea ma mafu mafanafana i luga o a tatou laulau. Ia pei o le í í

Afioga Hon Palusalue Faapo II: Lau Afioga, o lea la faatoa faasao mai, ua amata ona milomilo a tatou Tulafono Tumau ma fai atoatoa ai Tulafono lea e faataoto, a o lea la faatoa sao lau Afioga i le Palemia, leaga na atagia i lau saunoaga i le lafo, e pei e tatope ai lava iinei ma uma.

FOFOGA FETALAI: Leai, e le í í .

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e manatua foi o mea uma sa alu atu lava i le taeao mea e faanatinati ma mea e tatou te faaleleva ai, ia o lea lava e manino mea tatou te faaleleva ai e alu i o i le Komiti ona toe foi mai lea, aua e te fesasiai fua oe i le mataupu a le sui usufono mo Faleata Sisifo lea na aumai. Afai e toe alu nei le mea lena, oka, oka, oka, oka, o lena ua uma ona lote, toe lote, toe lote, ua iloa foi o le mea e lote faafia lote faafia, e sau ua mafoefoe.

Ia lau Afioga i le Fofoga Fetalai, o le faaopoopo atu lena.

FOFOGA FETALAI: Ia o le ala lea o lou taumafai atu lau Afioga i le Taitai o le Itu Agai, ina ne i meaane ua tatou faalogo eseese, o lea sa tauí . O le faitauga faalua e tulai mai le Minisita po o le Afioga i le Palemia e faamalamalama Tulafono, ia ona see loa lea i le tulaga tau Komiti, e tolu aso ia i lalo o tatou Tulafono Tumau e avatu e tau faitau ma faamalamalama i sui usufono mamalu, o lea ua tatou faafofoga i le faamalamalamaga auliili a taitai ma faauluuluga o Matagaluga, ua manino ma malamalama, e tuliaupu ai foi ma teletelevave le tatou galuga, ae ui o lea, faafetai o lea ua malamalama lau Afioga i le Taitai o le Itu Agai.

Afioga Hon Palusalue Faapo II: Lau Afioga, e ui lava ina ua pasia le Tulaga Faanatinati, ae tasi la lena Tulafono ona o le l consistent o faaiuga a le Malo, o le Tulafono taua lea e tataua ona ave i le Komiti.

FOFOGA FETALAI: Ia taatia maia o lea e faasolo felafolafoaiga, o lea e manatu o lea e mau iumaea ma faafofoga le Taitai o le Malo ma le Kapeneta, ae se i faalogona pea ia saunoaga a sui usufono ia na tatou oo foi lea i lea vaisua po o lea vaitai, ia ona tatou faia foi lea o se isifí .

Tulai mai lau Afioga i le sui usufono mo Gagaemauga Nu. 2.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Tofa LEVAOPOLO TALATONU (Gagaemauga Nu. 2): Faafetai tele i lau Afioga i le Fofoga Fetalai, e le umi foi sa matou tala aua e tilotilo atu e laiti lava nai Teuteuga o le Tulafono. O le tulaga foi lea ua manino, o lena foi ua faasee atu i le Komiti pei ona masani ai ia tulaga o faagasologa o galuega faa-Palemene, aua o le matagofie lena ma le aloaia, e le gata i lena, o lenei foi suiga o ni suiga tetele e faamaumau lelei i Faamaumauga a le Palemene, e seiloga foi e i ai se isi taimi po o se isi tausaga faatoa toe mafai ona sui, e ao la ona tatou i faatasi i ai ina ia taoto mai lenei Tulafono i se tulaga matagofie ma se tulaga lelei.

Ae pau lava se fautuaga i le Afioga i le Minisita, ona o le tulaga ia o boundaries, o lea foi ua taoto fuafuaga a lo tatou Malo e extend le tatou taulaga i Vaitele, o lona uiga e urban foi la lena. E tatau ona faataoto atu faapena ina ia toe silasila i ai i se tulaga e mafai ai ma fai ai se suiga.

Ae i ai le vaega lea lau Afioga i le Teuteuga lea e aumai i le vaega 2, faapea e mafai e se isi sui ona finauina tulaga agavaa o se isi sui i le tulaga i le Faamasinoga, ona alu ifo loa lea o le Fuaiupu 10, ia o se poloaiga e mausali, o se poloaiga e le noatia i se isi lava iloiloga. E faafesili atu la i lau Afioga i le Tamaitai Minisita, po o le a le tulaga, e faapefea le tulaga o le constitutional right o le tagata lea ua accuses i se mea faapea e toe apili ai se faaiuga faapena? Pei o le mea lena ou te fia malamalama ai i le vaega lena o le 9 ma le 10, lea e faalauaitetele atu ai sau fesili, o lea uaí í .a uma lava ona fai suesuega o le isi sui usufono e se sui usufono ua ave i le Faamasinoga e aumai ai seí í ..ona sau loa lea ua matua noatia lava le tagata lea na accuse, e le toe i ai lava ma se isi laasaga e toe alu atu e toe apili ai le tulaga e pei ona aumai. Ona ou tau tilotilo atu lea pei a tau faaletonu mai ai le tatou Faavae i le tulaga lea? E pei o nai fesili ia, faafetai i lau Afioga i le Fofoga Fetalai.

FOFOGA FETALAI: Malo faafetai i le sui usufono mamalu mo Gagaemauga Nu. 2. Ia o le a lafo atu i le sui usufono mo Faleata Sasae ona lafo ai lea i lea itu o le Maota.

Tofa AVEAU TUALA LEPALE NIKO PALAMO (Faleata Sasae): Faafetai lava i lau Afioga i le Fofoga Fetalai, faafetai foi i lau Afioga i le Minisita mo le Tulafono Tau Faaofi, e pei ona silafia o le Tulafono Tau Faaofi lenei pei o lea e afaina ai lou itumalo. O lea foi ua saunoa se tasi o ou uso i se tasi itumalo o Faleata, ia se i avatu foi nai motugaafa a lenei foi sui usufono mo Faleata.

Ae ou te le i oo la i le vaega lea o le Tulafono, e i ai nai vaega lea o le Tulafono Tau Faaofi lau Afioga i le Fofoga Fetalai aemaise lau Afioga i le Minisita e fia fesili atu ai.

O le vaega muamua, o le faaaogaina lea o le lola tuai. Afai o lea ua tatou finau nei i boundaries ia ina ia faafou, aisea le mea o le a toe faaoga ai le lola tuai i totonu o le palota lenei. Afai loa ua pasia le Tulafono i boundaries ia e faaoga i sui usufono uma ia o le taulaga e lua, e tatau loa ona fai ID o tagata o lo o eligible e palota i totonu o boundaries ia.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Aua o lea la o le a feteenai ai le Tulafono lea. E moni lava o lea e faapea mai, sei uma le palota lea ona sui lea. E i ai lava lou manatu e le tatau ona faia lea vaega. E tatau loa ona faatino ia tagata o lo o entitle i totonu o boundaries ia, na o latou lava e palota i totonu o le Tulafono lenei pe a faapea o le a pasia. Vaega lona lua o se fesoasoani, o le taimi lenei o lo o faagasolo ia faiga ID, e fai lava si faigata o feuaiga i totonu o le ofisa, aemaise lava i pepa fanau. Mo le silafia o lea foi ua fai si taugata o pepa fanau, aua o le tele lava o tau nei e toe foi mai lava i e o taumafai e o i le palota. Ae silafia foi le mamalu o le Palemene lau Afioga i le Fofoga Fetalai, o lea ua maea ona faataatia le broadband a le Malo, lea na alu ai le tupe tele a le Malo, o le autu o le broadband lea ina ia fesootai ai Matagaluega a le Malo, e fesootai ai Matagaluega ina ia faafaigofie ona fai galuega. Aisea le mea e le faaaoga ai loa lea foi auunaga lea ua i ai nei, e fesootai mai ai le Ofisa o le Au faipalota ma le Ofisa o Pepa fanau, afai e manaomia se Tulafono po o se isi vaega e mafai ai ona faatino le vaega lea, ou te iloa ua tatau ona faatino lea vaega ina ia faafaigofie ai i sui faipule aemaise foi o tagata uma, le mamalu o le atunuu o lo o taumafai e lesitala ina ia faafaigofie ai. Aua o le taimi lenei e alu atu i o ae toe tuli mai. Ae mafai ona faatino uma e le ofisa lea e faaaoga i ai le broadband lea, o fea lava le ofisa o lea e i ai le information lea e manaomia, e tatau lava ona faaaoga le vaega lea ua i ai i le taimi lenei, e tatau lava ona tatou faatinoina lea vaega. O le isi vaega lea e pei ona silafia, a pasia le Tulafono lenei o lo o faapea mai, E ono masina e mafai ai ona nofo se sui i totonu o boundaries nei ona mafai lea ona alu e fai ma sui tauva. E i ai se mafuaaga o le ono masina lenei? E i ai se fua e fua i ai le ono masina lenei? A tagai i totonu o le Tulafono, o lo o i ai lava aiaiga o le tagata e mafai ona alu e fai ma sui faipule. Afai o oe e i fafo e mafai ona fai ma sui faipule. Ae o lea ua sau le ono masina leneií .

FOFOGA FETALAI: Malie lau Afioga i le sui usufono mamalu, se i tuu atu le avanoa i le faauilavea a le Afioga i le Minisita.

Afioga Hon Fiamē Mataafa: E le o fia faalavelave i le saunoaga a le sui usufono. Ae tatau lava ina vave faapai atu i le mataupu lea i le ono masina. O le ono masina mo tagata palota, not particularly to candidates. Aua o lena e te saunoa mai o sui tauva. Ae a oo foi la i candidates e i ai isi agavaa e tatau ona faaopoopo ai i luga. Ao le lautele ia, o e lesitala i lola ia, e ono masina le minimum requirement. Ae e le na o sui tauva e pei ona e saunoa mai.

FOFOGA FETALAI: Tulai mai le sui mamalu e faaaau le saunoaga.

Tofa AVEAU TUALA LEPALE NIKO PALAMO: Faafetai i le Afioga i le Minisita. Maitaulia foi i lalo o le Tulafono, e mafai loa ona e lesitala o oe o le tagata palota ua mafai foi ona e lesitala o oe o le tagata e te alu e tauva i le faigapalota.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O lea la e manaia le faamaonia mai o le vaega lea, leaga o lea o le a seetaā ai ma le Tulafono o lo o i ai nei le tagata lesitala ma le tagata palota. E moni la o lo o i ai aiaiga ia i tagata mai fafo e tataua ona nofo i totonu, e i ai foi le aofai o aso e tataua ai ona nofo le tagata lea i totonu o Samoa i le tausaga e tasi, ona fua lea i ai o le tolu tausaga, aua a fai atu na o le ivasefulu aso o le tausaga na nofo ai, tei ua sese lau maitau, ia e le agavaa lava, pe a faapea e tolu tausaga sa i ai. E i ai la ia fua ia ua fua mai i le vaega lea e agavaa ai. A o lau fesili la, o fea e sau ai le fua lea a le ono masina lea, pe afai o le ono masina lea e mafai ai ona faatu au o se sui tauva i totonu o le itumalo lea? E tataua ona faamanino le vaega lea faamolemole, aua afai e mafai, e i ai lou manatu e le tataua ona agavaa se tagata e ono masina e nofo ai i totonu o se itumalo ae alu. E ui lava o le itumalo o le taulaga ae o le itumalo o la e i ai nuu mavae o lo o i ai i totonu. O lea ua tau o le itumalo faapalota, e tau foi la o le itumalo i totonu o le lola palota. E le mafai la ona sau se tagata na o le ono masina e nofo ai alu i i le vaega lea. Na o le tuualalo atu pe afai e le o le vaega lea pe afai e sao le Minisita na o tagata palota. O le vaega mulimuli lau Afioga i le Fofoga Fetalaia, o lea ua faafofoga le mamalu o le Palemene nei aemaise foi le atunuu i nisi foi o saunoaga po o nisi foi o timaiga e pei ona saunoa i ai nisi o sui usufono. Ae i lou lava manatu, o le vaeveaga o Vaimauga, o lea e le o iloa pe o i ai se isi e tetee i le vaeveaga o Vaimauga, e ese mai le vaeveaga o Faleata. Atonu o le mea foi lea e leai ai se vevesi tele i le vaeveaga o Vaimauga. O le mafuaaga, leaga o Vaimauga sa lua lava sui usufono e o faatasi.

A o Faleata, e moni o Faleata o le itumalo e tasi, ae alu loa i le faigapalota e le tasi la, e lua lava itumalo eseese. E ese Faleata Sasae ese Faleata Sisifo. O le mea foi la lea o lea ou te iloa, lea e ala ai ona mafua le vaega lea, ona o lea ua tilotilo agai ia Faleata, ina ia aafia uma tagata o lo o i totonu o le urban i le vaega lea. E i ai lava lou manatu faafaipule o le sui faipule e tilotilo lava ia i le mea e manuia ai lona itumalo, ona toe tilotilo lea i le mea e manuia ai le atunuu, sao ai le faatinoina o vaega taitasi. E lua la vaega ia ou te tau vaavaai atu i ai. O le vaega muamua, o le vaeveaga lea e sau nei, o le vaeveaga a lea o lea e lavea ai Faleata Sasae, afai o i ai se finagalo o le Malo o i ai e faaopoopo se isi sui usufono ia Faleata Sisifo, o se mea tataua. Sa ou faapea foi e tataua ona fai se talosaga aua a fua ia Vaimauga ma Faleata, o lea ua fa sui usufono o Vaimauga, faaopoopo i ai ma le sui lea o le taulaga, ao lea ua tolu ai i i sui usufono o Faleata. E pei ona saunoa se tasi o sui usufono o Faleata, le afioga i le sui usufono mo Faleata Sisifo, e sao lelei. Aua a fua i le faitau aofai, lea e faapea o i lea e fua i ai le vaeveaga faaitumalo, ua tataua lava ona i ai se isi sui usufono faaopoopo mo Faleata Sisifo. Afai la o le vaeveaga lea e faatino mai nei o le vaeveaga o le taulaga lea, aua a fua nei ae alu atu le vaeveaga lea o le taulaga e tau i Faleata Sisifo ma Faleata Sasae, e matua tele lava o le lola lenei. O le matua tele e le mafai ona faavasega le lola lenei o le a fai. Ae afai o i ai se faamoemoe o le Malo e aumai se isi sui e pei o Vaimauga o lea e fa sui, e fai ai le sui o le prop lea i Faleata ona o le tele o tagata o lo o i ai i totonu o Faleata Sisifo.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E silafia foi e le mamalu o le Palemeni o sui nei o Faleata Sisifo, o tagata o lo o o mai i le faatauina o fanua nei a le Malo, e tatau foi la ona taumafai le Malo e fai se fuafuaga ina ia faamalie ai tagata nei, aua o lea ua ese le alumaga o le olaga nei, ua alu i luga le faitau aofai o tagata Faleata ona o tuutuuga nei o vaega faapenei o atinae a le tatou Malo. O lea foi e ala ai ona ou tatalo atu faafaipule, i le itumalo o Faleata atoa, leaga e faigata o Faleata o Faleata lava. O le a se finagalo o le Malo o i ai, ae faatino se isi sui usufono o Faleata Sisifo, aua o lea ua faatulaga mai nei, o le sui lea, atonu e alu alu lava liliu ifo se sui usufono o Faleata Sasae, leaga o le boundaries lea e aumai i le vaega lea, o boundaries sao lava ia o Faleata Sasae lea e sau ai i Vailoa Vaimoso ma Lepea alu atu ai i o i vaega ia faafaigapalota. O nai au motugaafa na e faataatia atu i lau Afioga i le Minisita. O lea foi e faafofoga mai le itumalo o Faleata, e leai e le o auese foi sou manatu i le manatu o le sui usufono mo Faleata Sisifo, ae o mea faapenei, e autilotilo i mea e manuia ai itumalo uma e lua. Aua e pei ona ou fai atu e ese mai Vaimauga i Faleata, o Vaimauga sa tasi o lea faatoa faalua o lea ua faatolu nei, ao Faleataí

FOFOGA FETALAI: Malie le sui usufono, sei tulai mai le Minisita mo Fesootaiga. Tulai mai lau Afioga i le sui usufono mo Vaimauga Sasae ona o lea ua taua le itumalo.

Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi): Faafetai mo le avanoa. E pei o le vaega tonu lea ou te faamanatu atu i le sui mamalu i lana saunoaga e uiga lea ia Vaimauga. Ou te manatu e sili atu le malamalama o matou nei o Vaimauga nai lo Faleata. Saunoa pea ia Faleata ia ma le mataupu ia Faleata. O le mataupu ia Vaimauga o lea ua taoto, e i ai foi so matou taimi ona faamalamalama atu lea.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai. E leai, o mea faapenei a taumafai e aumai se point e tau i ai ni mea e fuafua agai i ai. A fua la i le taulaga o Vaimauga lava ma Faleata e tatau lava ona uniform, e tatau ona tutusa uma le faatinoina o vaega ia e lua, leaga o vaega ia o lea e i totonu o le taulaga. O le agaga lena o lau fesili ae e le faapea ua ou fesiligia le vaevaega o Vaimauga.

FOFOGA FETALAI: Se i toe tulai mai lau Afioga i le Minisita.

Afioga Hon Tuisugaletaua Sofara Aveau: O le mea tonu lava lea o lea e taumafai atu ai. Aua a tuu lava i le sao. E tatau lava ona tutusa Vaimauga ma Faleata, ae o lea ua saunoa mai o lea ua fa matou ae tolu i, ua le paleni la. O le mea lena o lea ou te tau fai atu ai e le o talafeagai le faamoemoe lea.

FOFOGA FETALAI: Malo. Malie le sui usufono, se i avatu pea le avanoa i le Palemia. Tulai mai lau Afioga.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea ou te talanoa atu faaitumalo, o le manaia ia o le matou faalogologo atu. O le mea lea luluu mai pea, ma talau mai, ae o lea na o le usi lava o le faalogologo. E taga eseese lava le malie o le fagogo a Faleata Sisifo, ia o lea foi ua aumai le fagogo a Faleata Sasae. Aua le poia Faleolo. E tusa lava pe faaaau le tatou Fonotaga nanei e tau lava i le sefulutolu i le aso taeao. A o le manaia ia o le felafolafoaiga lea e aumai, e leai se mea o fou ae aumai pea.

FOFOGA FETALAI: Faaiu mai le saunoaga a le sui usufono mo Faleata. O lea ua manaia lau faatu e fai se sui usufono fou mo Faleata Sisifo.

Tofa AVEAU TUALA LEPALE NIKO PALAMO: O le Tulafono lenei o le mea fou. E fou le mea lenei e le o se mea tuai. O le mea fou foi lea e tau faatu mai i i i totonu o Faleata Sasae ma Faleata Sisifo. O lea la e avatu ai nai mau ina ia faatusatusa i ai ina ia fai tutusa. O lea foi ua saunoa le Afioga i le Minisita e sao lelei, o lea e fa latou ae tolu matou. Ae tatau ona faatutusa aua o mea ia e tau o sui i totonu o le taulaga lea na fai. Leaga la o le vaevaega lea e pei ona ou fai atu, ia e eseese leaga ona o vaevaega faafaigapalota ese itumalo ia o Faleata Sasae ma Faleata Sisifo.

Afioga Hon Tuisugaletaua Sofara Aveau: Lau Afioga i le Fofoga Fetalai ..

FOFOGA FETALAI: Ia. Lau Afioga i le Minisita.

Afioga Hon Tuisugaletaua Sofara Aveau: O le tolu i le fa, o le saunoaga lea a le sui usufono. Fa i le tolu. O lea la na ou tu atu e faasao, e le faapena le faiga o le mataupu lea. Ma le faaaloalo lava.

FOFOGA FETALAI: Faauma maia lau talosaga le sui usufono mo Faleata Sasae.

Tofa AVEAU TUALA LEPALE NIKO PALAMO: Ua maea foi i i se manatu o le faipule, ae talosia ia ia soalaupule lelei lenei Tulafono ina ia maua ai se filemu i totonu o le tatou Palemene.

FOFOGA FETALAI: Lau Afioga i le sui usufono mo Vaisigano Nu 1.

Afioga TUFUGA GAFOALEATA FAITUA (Vaisigano Nu.1): Faafetai i lau Afioga i le Fofoga Fetalai mo le avanoa. Ou te faatulou foi i itumalo nei pe a faapea o le a lavea i se faamatalaga. E tusa lava pe lavea ia aua e nofo ai foi toe sau ai foi.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ae leaga la, e manatua foi se faatalatalanoaga o le mataupu lenei i le taimi ina ua foi mai le Komiti suesue, o au le isi tagata na ou finauina i ai le mataupu lea ina ia faaopoopo ni sui o le taulaga, ia ona palota lea i ai o tagata ia o matou mai Savaii. Aua o le uiga o le naunautaiga, ia aua nei faalavelave ai foi le finau atu a palota nei mo sailiga tofi a Savaii. Ao le toatele foi o i latou nei e nonofo i le taulaga, o o latou manaoga, e mananao e palota i se sui i totonu o le taulaga, e faaleleia ia mea ia e nonofo ai. Ma o le toatele lava o i latou nei ua toatele ina aumai i totonu o le taulaga. Manatua foi o le faitauga muamua o le Tulafono lenei, sa taofiofi mai au, ua tau alu i mea taitasi, i le taimi lena o le tatou Fonotaga i le po. Alu ai alu ai, ua manaia lava le sau ai o le Tulafono lau Afioga i le Fofoga Fetalai. Sa faapea ai e gata mai Letoga gata mai Puipaa i totonu o eleele tumaoti, ia ona palota lea i ai o matou nei mai Savaii, oi palota a latou ia e mai Savaii lea e nonofo i le taulaga, ma le toe tigaina atu foi i Savaii, ma o lea e fia faaleleia ia mea ia e nonofo ai iinei.

Ia sa lelei foi, ae peitai ia lea ua toe tuutuu mai i totonu le tuaoi, lea ua tuu mai i tuaoi lea sa i ai i aso ia. I le sau mai le magatolu i Moataa, tau mai i le itu lea i Faleata. Ia ua le aafia ai nai tagata Savaii lea e tua atu o latou fanua tumaoti e fia palota i se tagata e faaleleia mea ia e nonofo ai. E pei o lou tulai atu lea faamolemole lau Afioga i le Fofoga Fetalai.

O le isi mea na ou fia tautala ai foi i le vaitaimi lena, i mea ia o fale palota. A palota latou na iinei, ailoga e toe i ai ni fale palota faapitoa mo matou iinei i le taulaga. O lea o le a palota i latou iinei i sui usufono iinei i le taulaga. A faia foi le tulaga lena, o le a faasaoina ai foi seleni a le Malo i le faia fua o nei fale palota faapitoa mo Itumalo ia a matou nei e mamao ese mai le taulaga.

O le tulaga lea e saunoa i ai le sui usufono lea e faapea e tolu sui o le - ia tatou alu ia i le mea o i ai. O le faavae lava ia, e tele laitiiti lava le Vaimauga i le - ia na o le faaopoopo o mea ia taitasi ona paleni lava lea i ai. Ma le faaaloalo i lau Afioga i le Fofoga Fetalai.

FOFOGA FETALAI: Malo faafetai, tulai mai le sui usufono mo Sagaga le Falefa.

Tofa TUISA TASI PATEA (Sagaga le Falefa): Faafetai i lau Afioga i le Fofoga Fetalai, i le paia o le Maota nei. Susu lau Afioga i le Fofoga Fetalai, aemaise foi le Afioga i le Palemia ma le Sui Palemia, le Aiga Kapeneta ma le mamalu o lea foi Itu. I lau Afioga i le Taitai o le Itu Agai ma le Sui Taitai ma le mamalu foi o lena Itu ma Sui Usufono Mamalu o le Maota nei, aemaise Faauluuluga o Matagaluega uma ua tatou faatasi foi i lenei aso. E talitonu foi o le tapuaiga i le mamalu o Samoa o lo o tapuai mai ma tui mai le mulipapaga i Maota ma Laoa i nuu ma alaafaga taitasi.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Talu ai ona o le taua o lenei mataupu, o lenei Tulafono Tau Faaofi lau Afioga i le Fofoga Fetalai, o le ala foi lea o le fia faaali o se manatu. Talu ai ona o le tele o le aafiaga o lenei Itumalo Sagaga le Falefa. Pei ona silafia e le Maota nei, o nisi nei o nuu sa aafia i lalo o faiga palota taitoatasi i tausaga ua mavae e i ai Aelee, Nuuu, Falelauniu, Tafaigata ma Aleisa.

O nuu uma nei, na e silafia o le tele o i latou o lo o aumau iinei o fanua tumaoti freehold land. E fai foi sina toatele o le au palota o lo o nofoia ia eleele, ia o lo o i lalo foi o le matou lisi, o lo o lavea i lalo o lou Itumalo Sagaga le Falefa. O le ala lea o le fia avatu o se manatu, e tele lava le aafiaga o si ou Itumalo i vaevaega o Itumalo nei tu taulaga.

Mo le silafia ua lata nei i le 5, 000 le aofaiga o le matou lola, ia ae o lo o i ai lava lesitala e le i faaopoopo i ai. O lona uiga, a faaopoopo i ai ma i latou ia sa i le lola lea tutoatasi, o lona uiga o le a matua tele lava lea fuainumera. O le popolega la lea ua i ai, aua ou te talitonu o fuafuaga foi e fai i lenei foi vaitau, e aafia ai tagatanuu aemaise tagata palota i le lumanai. E fai lava si ogaoga o lea tulaga ona o le siitiaga o lola o tagata palota i si o matou Itumalo.

O le tatalo la, ou te talitonu o le amiotonu o le a faataunuuina i le fuafuaga e ala i lenei vaega. Aua o le tatalo, a faapea e mafai e i latou ia sa palota taitoatasi, e tatau lava ona lesitala pea i lalo o lola ia tu taulaga, a leai, o le tatalo, pe mafai ona toe faaopoopo se isi nofoa o loo Itumalo. Aua o lona uiga o le tulaga lea la i ai nei, o le a matua toatele atu le matou lola o le a i ai.

E faafetai foi i le faamalamalamaina ananafi o le tulaga lea ia i latou ua mafai ona tamomoe as candidates ma i latou foi ia o le a palota pei ona faamalamalamaina i le aso ananafi. O lo o i ai lava le choice a le tagata palota i le taimi nei. Pe palota i Sagaga le Falefa pe palota i le urban area, e faapena foi i le candidate. E pei ona faamalamalamaina mai, o le sui tauva e faapena foi ona i ai le avanoa, ae o le popolega mo le lumanai.

O le mea lea e tatalo atu ai se i tatou sasaa lelei le fafao ma tatou tilotilo totoa i ai i nei mataupu aua e tele lava lona aafiaga. E tele lava le aafiaga o le a aafia ai lo matou Itumalo. O le talitonuga lena e avatu ai foi se motugaafa i lenei aso ona o le tele foi o le aafiaga o si ou Itumalo, lae faafogafoga mai si ou Itumalo aemaise lava i na i ou nuu pele ia o Aelee, Nuuu, Falelauniu, Tafaigata ma Aleisa o le a oo i ai le faasologa lea. Ae tatalo atu o le a lava le fuafuaga e i ai le tatou - o le mea moni ma le meatonu ma le mea amiotonu e ao ona fai. Ia alofa mai le Atua i lenei aso, ia manuia le tatou Fono.

FOFOGA FETALAI: Malo. Lenatai, soofau lo lua saseelua i ina ona avatu lea o le avanoa i le isi Itu lea o le Maota. Tulai mai lau Afioga i le sui usufono.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Tofa LENATAI VICTOR FAAFOI TAMAPUA (Vaimauga Sisifo): Faafetai i lau Afioga i le Fofoga Fetalai mo le avanoa. Sa leai se manatu e laga se leo, ae atonu e sao se tasi o sui usufono e le o tetee se lagona o lou nei tagata i le suiga lea ua i ai ona e i ai lou talitonuga, e lagona foi se lagona fiafia i lou nei sui usufono i le tulaga lea ua i ai a o faafofoga mai le Itumalo.

Atonu ua leva ona taumafai foi nisi o sui usufono o lo matou Itumalo i nisi o paeaiga ua tea e tau saili se tasi o sui faaopoopo ia tolu ai sui usufono o Vaimauga Sisifo. A tagai lelei i le tuaoi e pei ona aumai i le suiga lea, o le urban seat le Itumalo o nuu o taulaga i sasae o Vaimauga i Sisifo lea e sau ai.

O lou talitonuga lava, atonu lea ua vaelua le Itumalo lea la tasi le palota i Vaimauga i Sisifo Nu.1 ma le Nu.2. A o lau faaigoaina o le Nofoa lea o Vaimauga i Sisifo Nu.3. O lea la tolu sui usufono o Vaimauga Sisifo aemaise foi le faafofogaaga o le paia o le Itumalo, malo faafetai tapuai, malo faafetai tatalo. O le tulaga foi lea sa faaalua e se tasi o sui usufono, o lea o le a fa sui usufono o Vaimauga. Leai, o lea la tolu, tolu, tolu Vaimauga i Sisifo, tolu Faleata. Ma le faaaloalo lava faafetai.

FOFOGA FETALAI: Tulai mai le sui usufono Taitoatasi.

Susuga Hon Papaliitele Niko Lee Hang: Lau Afioga i le Fofoga Fetalai, o le mea e fia faamalamalama. Ua matau atu lava ua taua nofoa ia e tolu o le Vaimauga Sisifo ae o lau talitonuga o le nofoa faaopoopo o le nofoa o le taulaga e le o taua Vaimauga i Sisifo i lea tulaga. O se mea e fia faamalamalama faafetai.

FOFOGA FETALAI: O nai saafiafiga lava a le sui usufono e faalupelupe i le Nofoa.

Tofa LENATAI VICTOR FAAFOI TAMAPUA: Lau Afioga, ona o lea e manino mai i le Tulafono Tau Faaofi ia nuu ma pitonuu lea e sau ai i totonu o le Tulafono o Vaimauga i Sisifo. Ma le faaaloalo lava.

FOFOGA FETALAI: Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o lau fesili i le sui usufono mo Vaimauga Sisifo, pe lavea Vaivase, Tanoaleia, ma nuu na i Vaimauga Sisifo. E le o lavea i le boundary lea na alu atu nei, a o nuu na o le Vaimauga Sisifo.

FOFOGA FETALAI: E manatu o le a le fia faia se faafinauga. O le finagalo o le sui usufono lea na ave lana faafetai i le tatalo o lana Itumalo, o la ua taoto le isi sui i le urban area o lona itu i se vaega o lana Itumalo.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Tofa Lealailepule Rimoni Aiafi: O le uiga o lau faamatalaga, pei ona ou tatalo atu e aua ne i tatou sailiai na o tatou. E moi lava, ia tatou faia se mea mautu. Aua lea ua laulau nei nuu o le Itumalo o Vaimauga Sisifo ma faafetai ia Vaimauga Sisifo, a o fea a tiai i ai Toomatagi, Vaivase uta, Tanoaleia ma nuu ia i le pitonuu o Vaimauga Sisifo. O le vaevaega lea na lau mai nei, e le popole ai Lealailepule, a o le mea talafeagai ma le moni e fai, ma le faaaloalo lava faafetai.

FOFOGA FETALAI: Tulai mai le sui usufono mo Faleata Sasae.

Tofa Aveau Tuala Lepale Niko Palamo: Leai, o le mea e fia faasao. O Vaimauga lava ia o Vaimauga, lea e i ai le sui usufono o Vaimauga Sisifo, e tau le - Lau Afioga i le Minisita o lea la tolu i i sui usufono ia o Vaimauga i Sisifo e fa sui o le Vaimauga. Ma le faaaloalo lava.

FOFOGA FETALAI: Tulai mai lau Afioga i le sui usufono mo Siumu, ona sosoo mai ai lea ma lau Afioga i le sui usufono mo Palauli leFalefa.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai mo le avanoa. E fai ai foi se sao puupuu o lenei teuteuga o le tulafono. Ua ou tulai atu ona o au o le sui o le Komiti, ae le i faia sau faamatalaga, ona o lea e opea i paga le talosaga a lou sui a usufono lea i le fonotaga talu ai, e tau afaina lona fatu pe a ou tuia le laulau, ia alofa talia mai lau talosaga ona o le taimi foi lenei o le a amata foi ona tatui le laulau, ma lou faaaloalo.

Ua ou tulai atu lau Afioga i le Fofoga Fetalai, ona o au o se tasi o sui o le Komiti. Na aumai le Tulafono Tau Faaofi lea na faataoto mai ai vaevaega ma tuaoi ia i urban areas ia. E sau mai laulii e tau i o i puipaa. O le naunautaiga o le Malo ia faataape i tua, spread out i le taulaga. Leaga ua vaapiapi tele i le mea lea e i ai nei. Lea ua outou silasila i ai i le tele ia o atinae lea ua fai i Vaitele, lea ua fuafua i ai le tatou uafu, o le a alu atu ai ma le tatou four lanes ma mea uma ia.

Lea ua tatou faafofoga i ai i le saunoaga a le sui usufono o Faleata, e lima afe ma ona tupu le au palota sa i ai i le palota lea na tea atu nei. Ou te talitonu i le taimi nei ua 10 afe. E leai a ma se isi o tatou e le aafia i le vaevaega lenei. Leaga o le tele o tatou e tele ina nonofo i inei i le taulaga ma e i ai lo tatou agaga. E faamalulu atu Papalii, Maualaivao, ou te tautala lava au faasui o le komiti ma mea e tatau ai ona avatu lou lagona. O lou tulai atu ou te tulai atu e lagolago le fautuaga a le komiti na avatu. O le fautuaga a le komiti, talia le vaega lea o le tulafono tau faaofi, pau lava lea.

O lau tuualalo i le Afioga i le Palemia, le Afioga i le Tamaitai Minisita e a pe a toe silasila totoa i le Tulafono Tau Faaofi ina ia atagia ai le amiotonu ma le faia o le mea sao ae le i ai lava se isi tulaga. Lau Afioga i le Fofoga Fetalai, o lau a tagi ma lau tuualalo se i alofa ane silasila ane i ai ina ia toe taoto i se tulaga tonu, ma lou faaaloalo.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

FOFOGA FETALAI: Malie le sui usufono, se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ona o le taua o le saunoaga a le sui usufono ou te toe tulai atu ai, *E faaopoopo sona itula atoa.*

Tofa Hon TUUU ANASII LEOTA: Lau Afioga i le Fofoga Fetalai, e momoli lau faafetai i le Afioga i le Palemia o lea ua na aumaia le avanoa ia te au, ua outou faafofoga la i ai, e aso atoa lea o le a ou talanoa atu ai.

Lau Afioga i le Fofoga Fetalai, faafetai mo le avanoa. Ia manuia le Fono.

FOFOGA FETALAI: Ia, o lena ua amata ona e agai i le laulau ae ua e le agai i le mic. Ia, Faumuina Tiatia Faaolatane Liuga, tulai mai le sui usufono mamalu.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa. E faatulou atu foi i le mamalu o le Maota ua aofia nei. O nai talosaga faatasi ai ma nai fesili ou te manatu o le a mafai ona fesoasoani mai le Afioga i le Minisita i le tulaga lava lea o nai teuteuga ia e i ai i mea o agavaa, qualifications, lea e faapea e tapunia sui faatutu ae tolu aso, ona faaavanoa mai lea e fai ai faasaoga o ni mea mautinoa e faaletonu. O le talosaga lau Afioga i le Fofoga Fetalai, a faapea e tolu working days, e le talafeagai mo Savaii. O Savaii, e te manaomia le aso e tasi e te alu ai, e le gata e faafesootai alii ma faipule o afioaga i ni mea foi latou te fesoasoani mai ai, a o nisi foi aso e toe talii mai ai. O lona uiga, e uma ae na o le tasi le aso e te taumafai ai e fai lau galuega lea, e benefit la o tatou uso nei i Upolu, a o matou i Salafai, a oo ina afatia pe tapunia le alavaa, ua atili ai le tele o le matou faaletonu. Ou te le o fai atu la lau Afioga i le Fofoga Fetalai ma le mamalu o le Palemene e faapitoa Savaii. Afai lava e lima working days, e fai atoa mo tatou uma lava. O lau talosaga lea i lau Afioga i le Palemia ma le Kapeneta i le tulaga o aso ia e fai ai sauniuniga ma tapenaga ina ia faamalieina le Tulafono ma faapena foi ona talafeagai ma sui tauva.

I le fuafuaga i suiga ia sa aumai talu ai i le tatou Tulafono, lea sa faapea e fai le mea foi lea o le tautoga e le loia, a o lona uiga ua le toe faaogaina ai le pulenuu po o le faifeau e fai maia le endorsement. O le mea lea e tuufesili ai lou mafaufau, po o le mea o le a le aumaia se endorsement mai afioaga ia e tulai ai, aua o le mea talu ai, e toatolu pe toafa pe toalima matai fainuu o le nuu e te matai ai po o matai foi o lou itumalo e aumai ai le sui o le itumalo, ona avatu lea o le avanoaí .

FOFOGA FETALAI: Malie le sui usufono mamalu, se i tuu atu le avanoa i le faauilavea a le Afioga i le Tamaitai Minisita.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon Fiaame Naomi Mataafa: Lau Afioga o le mea e fia faasao ma fia faamalamalama. O le vaega lea ua oo i ai le saunoaga a le sui usufono mamalu, ua maea ona pasia i le tatou Tulafono Tau Faaofi lea ua uma ona pasia ma e le o i ai i le Tulafono Tau Faaofi lea ua talanoaina nei. O le tulaga foi lea i le toe foi i tua o se talanoaga a o lo o fia tuliloa le Tulafono i luma o le tatou laulau. Ae pei e lelei pea lou fesoasoani atu ona o lea ua taatia i luma o le tatou Tulafono e tusa ai ma le pasia i le masina talu ai, o le suiga lea ua i ai i le pepa lea, o le faamaoniga a le Loia. O lona uiga, ua i luga lava o le sui tauva ia, aua e tusa o le affidavit lea a le sui tauva ua faapea atu, o ia o le tagata ua faamalieina uma agavaa o lea o lo o moomia. Ae a faapea la e lui e se isi le faamaoni o le tautinoga lea a le sui tauva, o le mataupu la lena e ave i luma o le faamasinoga, e tali lava la le sui tauva ia i luga o lana tautoga lea na fai ma faamaonia e le Loia, a o le tatou mataupu ua uma ona fai i le tatou Tulafono talu ai lau Afioga.

FOFOGA FETALAI: Ia, e i ai le talitonuga o lo o saunoa faalauaitele le sui usufono mamalu e faapulapula ai le mea na mafua ai ona ia taua ia tulaga. Tulai mai le sui usufono mamalu.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai. O lea ua saunoa le Tamaitai Minisita o lau fesili e tali mai ai, a o lea ua tali mai i le tulaga o lea e faagasolo atu lau faamatalaga faalauaitele. Ona o lea ou te fesili po o maua pea le avanoa o alii ma faipule la te faamaonia mai ai le nomination ae le i faia le tautoga. O le fesili la e tulai mai, a faapea e tei ua fai le tautoga ae tauto pepelo, e molia la i le Tulafono i le taimi lea pe tuu se i alu i le tulaga foi lea o solitulafono, criminal case e fai ai lana faamasinoga pe afai o la e tauto pepelo.

O le isi mea lau Afioga i le Fofoga Fetalai, o le ono masina lea na sausaunoa i ai nisi o sui usufono mamalu lea e faapea e qualify ai le tagata e nofo i totonu o le itumalo ona mafai lea onaí Lau Afioga i le Fofoga Fetalai, o le matau a lou sui usufono, ua faailoga tagata le Tulafono. Afai e tolu tausaga e sau ai le tagata mai fafo e nofo i totonu o Samoa, e tatau foi ona tolu tausaga e alu atu ai le sui usufono lea e nofo i le itumalo lea, ona o mafuaaga nei. O le mafuaaga, aua o lea e fai lau tautua, tasi lea au qualification. O e tautua i le nuu, o e tautua i le Ekalesia? O mea ia e tatau ona matua faamalasia ai le tolu tausaga e foi mai ai le tagata i Niu Sila pe afio ai le tagata e alaala i lea itumalo ma mafai ai ona palota.

FOFOGA FETALAI: Malie lava le sui usufono mamalu, se i avatu le avanoa i le Tamaitai Minisita.

Afioga Hon Fiaame Naomi Mataafa: Lau Afioga pei e lelei lava le toe faasao atu o le tatou mataupu lea, o le ono masina lea, e faasino i lola o tatou itumalo nuu tu taulaga, ma o la e lava e malamalama o se mea fou lea o le a tatou soloai atu i ai.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O lea sa ou faamalamalama muamua i isi sui usufono ia sa laga mai le ono masina lea, o le vaega lea o le registration, e avea oe ma se tagata palota i lola ia e lua. O le itu lea e saunoa i ai le sui usufono mamalu i le tautua i le nuu ma le Ekalesia, a o lea e talanoaina urban seats, itumalo tu taulaga, atonu e le tutusa, aua o tagata o la e nonofo i luga o fanua umia saoloto. O lona uiga, e le o i lalo o le pulega faa-matai po o se nuu. O lona uiga la, e tau ona faamanatu atu i le sui usufono, o le ono masina lea e faasino i le registration for urban seats only.

FOFOGA FETALAI: Malo. Ia se i tulai mai le sui usufono mamalu e faaaau mai le saunoaga.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, e faafetai i le Tamaitai Minisita mo le tali. E le faamalieina lou loto i le saunoaga a le Tamaitai Minisita ona o lenei le itu, o tagata ia e omai Niu Sila, na ona e sau lava, resitala e alu i Niu Sila, oo i le aso o le palota e foi mai e palota. E taitolu vaiaso e omai ai, lua vaiaso, o lea ua feteenai le Tulafono ma mea lea e tutupu i le taimi lenei. O le ono masina lea e taua, ua nonofo lava tatou ma faailoga tagata. O le a faailoga tagata la i matai, na ala ona matai, e tausi le nuu, tautua le Ekalesia. O lea le mea o le a fai faapitoa ai? E le tataua ona fai faapitoa. O le mea lea e sese ai a tatou mea, afai ua tatou o I le Tulafono e tasi, tatou o uma lava i le Tulafono e tasi ae le o le ese o i, ese i, ese i. Lau Afioga i le Fofoga Fetalai, ua matua feteenai lava. O le mea foi lena o lea e tupu nei, ua fenumiai le lalolagi, o le mea lena o lea e fai mai ai, ua numi le lalolagi. Ana leai le Atua, e le maopoopo.

Afioga Hon Fiamé Naomi Mataafa: E leai na ona ou fia fesoasoani atu lava i le numi. E leai lava se numi lau Afioga i le Fofoga Fetalai ma le mamalu o le Fono, o lea tatou te talanoa i le mataupu lava lea o le ono masina, o lea tatou te talanoa i mataupu tu taulaga, o tagata o lo o nonofo i luga o eleele umia saoloto. E leai se pule a le matai. Ioe. E tataua lava ona malamalama pea le sui usufono aua o lo o aumai pea, o le tagata e le matai, o le tagata e le tautua, e le alu e fai le lotu. Ae le o le faavae lena o tatou nofoa ia e lua. O le faavae lava o tatou nofoa ia e lua, o le tagata o lo o nofo i luga o le fanua umia saoloto. A fia avea oe ma sui tauva, e tataua ona i ai lou suafa matai, ma e faamalieina uma isi agavaa e pei foi o isi sui tauva o lo o i ai i totonu o le tatou Tulafono Tau Faaofi. O le fesoasoani atu lena i le nenefu, e leai lava ma se nenefu.

FOFOGA FETALAI: Se i tuu atu pea le avanoa i le Afioga i le Palemia. Ua ou vave tu atu ona o lea o le a tu mai Leala, ou te lagona foi o la e o le a mulimuli Leala i le saunoaga a le Afioga a Faumui. Ae ou te fia tali atu i le Afioga a Faumui e faapea, e i ai foi le fenumiai e faafenumiai lava e le Alii.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le fenumiai la lena tatou te le malamalama i ai, ae o le manaia ia, e tai pei o le fenumiai lea na fenumiai ai Tavita ma le loomatua foi lele a o le gafa lena na sau ai Iesu, o le gafa o Solomona. E i ai foi la fenumiaiga e faafenumiai foi e le Alii ae manaia lava le iuga.

Afioga Hon Palusalue Faapo II: Lau Afioga i le Fofoga Fetalai o se mea eí

FOFOGA FETALAI: O fea le tusi lea o le a e sau ai Palu? O lea o le a tuu foi le tatou Fono aeí . Ia, saunoa lau Susuga i le Aoa Fesoasoani.

Afioga Hon Palusalue Faapo II: O le fenumiaiga lava lea aua o lea ua fai mai o le fenumiaiga o le lalolagi. Lau Afioga i le Fofoga Fetalai, e leai, o le fenumiaiga a le HRPP, e feteenai a latou Tulafono, le malamalama i a latou Tulafono, e nunumi lava e latou latou. Ma lou faaaloalo lava.

FOFOGA FETALAI: Se i tulai mai le Afioga i le Minisita.

Afioga Hon Fiaame Naomi Mataafa: O le mea e fia faasao lau Afioga i le Fofoga Fetalai, ai ua galo i le Afioga i le Taitai o le Itu Agai, e leai lava se numi i le tatou Tulafono lea na pasi i le masina lea talu ai, leai se numi. Avatu le Tulafono a le Malo, lagolago uma e le Party lenei, e leai se numi.

Afioga Hon Palusalue Faapo II: Lau Afioga i le Fofoga Fetalai, o se mea e fia faasao.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o le mea e fia faasao, o le fenumiaiga a tagata e le o malamalama, ioe. Ae sao le manatu lea, e malamalama lava le Atua i ana ia lava mea. O le ala lena lea tatou te faapea ai, o le misitelio, ona o mea e le oo i ai a tatou fuafuaga, ae o la e manino, e faapena foi le Tulafono lea. O la e manino lava le Tulafono Tau Faaofi ia, ae misitelio lava e le tagata ia e fia misitelio.

FOFOGA FETALAI: Ia se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, e i ai si tamai mea laitiiti lava lea e fia faamalalama leaga o le tautua, lea ua tatou malilie, o le tautua lea o le tautua i le nuu, tautua i le aiga, tautua i le Ekalesia. O i matou la ia e nonofo i le taulaga ma matou nonofo i fanua faatau, o lea foi ua matou lolotu ai i Ekalesia nei, Peseta Vaifou lea e lotu i Ululoloa, o Faumuina Liuga lea e lotu i le lotu Nasareta i Lotopa.

21 *APERILA 2015*

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le mea na e tau o le tautua, nofo i le mea e nofo ai ma malamalama i ituaiga system la e i ai ma ituaiga tagata la e i ai ma auala ma mea uma, e oo loa i le taimi o le palota, ua e agavaa, ae le o le tafao, tafao, tafao alu atu nofo i i ma lana atopau ina ia agavaa ai, e le o se faamaoni la le mea lena, e le o se tautua le mea lena. A o le nunumi ia, God is never nunumi, is a straight forward God.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te fia fesili atu lava leaga ua misi ia te au le mea lea i au faamaumauga, o fea foi le Sosaiete lea e te lotu ai?

Tofa Lealailepule Rimoni Aiafi: Masalo e le i maimoa le Afioga i le Palemia i le Aso Sa i le faigalotu i le Televisi, lena, sa ou lotu ai ma sisii ou aao i luga. Glorify God's great name, lauga le faifeau mo Samoa atoa, o fea o i ai lou loto leaga o lou loto e afio ai le Atua, amene.

FOFOGA FETALAI: Ia, toe tuu mai le tatou mataupu i le ogatotonu. Toe tulai mai lau Afioga i le sui usufono mo Palauli leFalefa.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, faafetai foi i le Afioga i le Tamaitai Minisita aemaise o le Afioga i le Palemia. Leai o le mea lea ou te tau fai atu ai se taofi, aua ne i eseese mea e tatou te omai ai iinei, aua e tatou te le omai iinei faapea e 6 masina le isi sui usufono ae 3 tausaga le isi sui usufono, e tasi lava le Faavae lea tatou te faaaloalo i ai, e tasi le Tulafono lea tatou te faaaloalo i ai, a 3 tausaga o le tamalii po o le failauga e sau ai i Niu Sila e nofo iinei, ia e faapena foi le tatou femeiai i totonu o tatou itumalo, aua e le faapea e te alu atu nei momotu lau aupolapola taeao fai au taulaga i le lotu, ia e tasi le taulaga ae qualify ai e alu i le sui tauva, leai, e tataua lava ona tatou nonofo i totonu o tatou itumalo e tolu tausaga pe sau i fafo pe e te fealuai i lou itumalo, e 3 lava tausaga, o mea ia faapea 6 ia masina mo le tagata ia mafai ai ona sau e nofo i i ma palota, ia e le consistent foi ma le mea lea e tupu, aua o le tagata la e i Niu Sila a omai i ni faalavelave iinei lesitala e oo i le taimi e sau ai e fai le palota, ona mafai lea ona palota. Ma lou faaaloalo lava. Pei o nai fesoasoani na ma nai motugaafa na lau Afioga, e fesoasoani ai i le Afioga i le Tamaitai Minisita.

FOFOGA FETALAI: Malie lava le sui usufono mamalu, se i tuu atu le avanoa i le tulai mai a le Afioga i le Minisita, tulai mai.

Afioga Hon Fiamé Naomi Mataafa: Lau Afioga i le Fofoga Fetalai, e taua tele le mataupu lea e laga mai e le sui usufono mamalu le Faavae lea tatou te omai ai, le Faavae lea e tatou te tasi uma ai o le suafa matai, aua pe itumalo faa-alaalafaga pe itumalo tu taulaga, o le agavaa aupito sili lava ona moomia, o le suafa matai.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ia na o le pau la lena ae tatou te eseese i le tulaga o le nofo i le fanua umia saoloto mo a tatou urban seats. Ae i le mataupu lava lea e saunoa mai i ai lau Afioga i le 6 masina ma le 3 tausaga, leai o leí e manaomia lava le 3 tausaga ia i ai le tagata iinei ma nofo ai, that's it, and everyone has to follow up, a o le 6 masina o lea e fua faatatau ona o le fou o tatou Tulafono ia mo itumalo tu taulaga ia lesitala ai le tagata e avea o se tagata o le Lola lea, a o le tolu tausaga e tutusa uma lava sui o e e fia tauva, e tatau lava ona alaala iinei i le 3 tausaga. E le faapea e ese le Urban ese le itumalo faa-alaalafaga. O le faamalamalama lea lau Afioga.

FOFOGA FETALAI: Malo. Tulai mai le sui usufono mo Palauli le Falefa e faaauu le saunoaga.

Afioga Hon FAUMUINA TIATIA FAAOLATANE LIUGA: Faafetai i lau Afioga i leí í

FOFOGA FETALAI: Ia malie lava lau Afioga i le sui usufono, se i avatu lava le avanoa i le tulai mai o le sui usufono mo Sagaga le Falefa. Tulai mai le sui usufono.

Tofa Tuisa Tasi Patea: O le faafesili atu lava i le Tamaitai Minisita, po o le 6 masina lea e saunoa i ai o le only for the transitional period lea ona e fou le faamoemoe lea e loma nei i le suiga o palota ia o Urban Areas faamolemole.

FOFOGA FETALAI: Tulai mai lau Afioga i le Tamaitai Minisita.

Afioga Hon Fiamé Naomi Mataafa: Ona o lea ua aumai le fesili a le sui usufono lea a o la e saunoa le Afioga i le sui usufono mo Palauli le Falefa. Pe se i ou tali i ai i se isi taimi, a?

FOFOGA FETALAI: Ia o lau Afioga lava, ae ua finagalo sui usufono o lo o taumafai o lo o ua lagalaga ona o finagalo o lo o taua, ae ui o lea, fai pea lou finagalo.

Afioga Hon Fiamé Naomi Mataafa: Leai, lau Afioga o lea ou te fesili atu, pe e te faataga mai au ou te tali i ai?

FOFOGA FETALAI: Ia, o lena e i ina le faautautaga eí í

Afioga Hon Fiamé Naomi Mataafa: Ia lelei. Lau Afioga leai o le 6 masina lea o le amataga lea o le Urban Seat, a, but mo le faaauuina lava o le sailiiliga o le tatou Ofisa o Faiga Palota i mea ia e tau o Urban Seats o le minimum requirement lea ia nofo ai se tagata i se nofoaga e tau o le Urban Seat, o le minimum lava o le 6 masina, o lea la ua alu ai le tatou Tulafono.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

FOFOGA FETALAI: Tulai mai le sui usufono mo Palauli le Falefa e faaaau le saunoaga.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai. Ou te iloa pei ua ala ona laga le mea lea ona o lea ua i totonu o le Teuteuga o le Tulafono, ana faapea lava o se mea e faatoa aumai i le taimi e draw ai Regulations mo le faamatalaga ma le implementation, atonu aua o mea ia, ae mau loa i totonu o Tulafono, ia o lea ua toe feteenai tatou Tulafono ma isi Tulafono aemaise lava i tulaga lea o qualifications o tagata palota ia po o tagata foi o sui tauva o faiga palota, ae faafetai i le Afioga i le Tamaitai Minisita i le faamalamalamaina o lea vaega i le tulaga lea o tatou qualifications.

Ou te fesoasoani atu i le mea lea e uiga i le boundary lea ua finau ai, aua ou te iloa ana le finau ia le vaega lea o le Itu Agai e ave le Tulafono, aua o le Tulafono lenei o le Tulafono na aumai e faanatinati ona o le taua tele, ae sa finau ia le Taitai o le Itu Agai ma lea foi itu i le tulaga lea e ave i le Komiti. A o le faiga lava o le Faaiguga a le Kapeneta na aumai, o le mea tonu lava lena o lea e finau ai nei ae na mumusu ai le vaega lea, o le mea la lea o le boundary e tau i Puipaa ma le boundary e tau i Letogo, alu tosi i uta alu ifo i Tiavi po o Afiamalu, o le mea lena o lea na i ai, ana faapea la e alu i le tulaga sa i ai, e faapenei e tatou te le o toe pisa ma tatou finau, atonu o le finagalo foi lea o le Atua e faaali ai nisi mea o tatou mafaufau i ai. E faafetai atu i le Afioga i le Palemia le Kapeneta aemaise o le Tamaitai Minisita mo le galuega e le faigofie, faafetai.

FOFOGA FETALAI: Malo faafetai. Ia o le a lafo i lea itu o le Maota, le sui usufono mo le Vaa o Fonoti ona sosoo ai lea ma le sui usufono mo Aleipata Itupa i Lalo, ia ona sosoo ai lea ma le Taitai o le Itu Agai ma le Sui Taitai.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai mo le avanoa o le Vaa o Fonoti, faafetai foi i le Maota le Afioga i le Palemia ma le paia i Minisita aemaise foi o le Taitai o le Itu Agai.

E nofonofu lava i matou nei ma matou faalogologo aemaise le mataupu lea i le 6 masina lea ua fenumiai lou mafaufau. O lea ua saunoa mai le Afioga i le Tamaitai Minisita lau Afioga i le Fofoga Fetalai, o le 6 masina lea na o le tagata palota. Ae faapefea le tagata e fia alu i le sui tauva, e 6 foi masina e entitle i le sui tauva pe e tatau ona 3 tausaga o tautua ai i lonaf ..po o fea e matai ai?

FOFOGA FETALAI: Malie le sui usufono, se i tuu atu le avanoa i le Tamaitai Minisita.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon Fiame Naomi Mataafa: Lau Afioga i le Fofoga Fetalai, pei o lo o aumai pea le mataupu lea o le 6 masina, o le 6 masina ina ia mafai ona faamauina le suafa o le tagata o lo o fia tuuina atu i le Lola o itumalo taulaga, mo tagata palota, e aofia ai tagata palota sui tauva, aua a e le tagata palota i se lola, e le mafai foi ona avea oe ma sui tauva, a o agavaa mo le sui tauva, lea lava e i ai le 3 tausaga e tutusa uma ai lava le sui tauva pe tu taulaga pe itumalo faa-alaalafaga. Ou te le iloa po o le a se isi toe faamaninoga e avatu ai e malamalama i le tatou mataupu lea.

FOFOGA FETALAI: Ia tulai mai le sui usufono mamalu e faaauau le saunoaga.

Afioga TIALAVEA FEA TIONISIO SEIGAFOLAVA: Faafetai i lau Afioga mo le faamalamalamaina o le mataupu lea. O tatou nei e tatou te matai i itumalo lea tatou te i le Maota, e tautua i o tatou nuu, ekalesia, aiga i tua, ua fia tausaga o tatou tautua, ae 6 masina ou sau loa ou nofo i le taulaga e leai se tautua o faia i totonu i i ae ou alu i le palota, o lona uiga la e 6 masina e nofo ai i i e mafai ona e entitle e te alu i le tofi faipule, ia faafetai ua malamalama lea itu, o e lava la o alaala mai i itumalo nei faale-aulaga, e talitonu e 6 masina ia entitle. Ae o le mea la lea ua mamafa ia te au o le tautua, o lea e aafia tatou nei a e le tautua i ekalesia i lou itumalo e te le mafai ona e entitle, a o lea e otometi le sui o le taulaga, ia au la ua faapito, ua faapito le Tulafono i sui o le taulaga, ona o lea e tatou te tautua i tua i o tatou itumalo, a o lea na o le 6 masina e mafai ona alu e avea ma sui tauva o le Maota lena. O lou lava malamalamaaga, a faapea e te sau 6 masina, talia, ae tatau foi ona e tautua i le nuu o e matai ai, afai lava e te matai i Savaii e te fia alu i le Urban Seat, e tatau ona faamaonia o la e te tautua i Savaii, pe e te tautua i Aleipata po o au foi, e mafai ona ou alu i le Urban Seat, e mafai. Ae tatau ona i ai se faamaoniga o la e fai lau tautua i le nuu lea ou te matai ai i le matai lea o le a ou sau ai i totonu o le Palemene ia tutusa uma ai sui o le Palemene i le tautua, leaga o lea e aafia tatou o lea e nonofo i itumalo ma tautua ai ae 6 masina, advantage le vaega lea, ua tele avanoa i nofoa nei. Ae talitonu na o le manatu e faaali, e talitonu le agaga e ala ona fai atu manatu leaga e matou te aafia ona o matou e nonofo i fanua tumaoti i le taulaga ma tautua nuu, itumalo ma aiga ma ekalesia, ma e matou te tautua foi i ekalesia o lo o matou lolotu ai, e moni e le o ni nuu mavae lea e alaala mai le Minisita o Pulenuu, e i ai Pulenuu o nuu uma nei e tu taulaga la e i ai pulenuu, e tasi foi lona faavae a le Malo o lo o faaoga o la e i ai pulenuu. A faapea la e le o ni nuu mavae, ae o le a la mea ua fai ai Pulenuu? O lou manatu e faaali atu, ina ia tutusa le auala e omai uma ai sui i le Palemene, ou te le popole pe 6 masina ae ia tautua i le nuu o la e matai ai, e faamaonia mai e le alaalafaga ma le nuu, o lea e fai le tautua, o le Samoa moni lena. Lau Afioga i le Fofoga Fetalai, o lou manatu lena i le 6 masina.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ona oo mai lea o lagona i lou itumalo i le Tulafono lenei o Faiga Palota, na fai le Komisi Suesue i le 2001, toe fai le isi Komisi Suesue i le 2011, ua tele mau Komisi Suesue lava i le Tulafono lava lenei, e masalo o le Tulafono lenei e aupito sili ona tele ona Teuteuga ona e le misi Faiga Palota uma, sui, sui, a o lenei lava e alu ai le tele o taimi o le tatou fono lenei i le Tulafono lenei o Faiga Palota. O se fautuaga la a le sui usufono mai le itumalo o Vaa o Fonoti mamao lava i tua, e a pe a toe tagatagai le Malo se suiga o se Tulafono fou o Faiga Palota e sui ai le 1963, ia aafia uma ai faafitauli o lenei ua tutupu i lenei vaitau, ua 50 ma ona tupu tausaga o le Tulafono, ua tele ia suiga, ae a fai se Tulafono fou e avatu uma i ai manatu ma lagona i lenei vaitau, e ese lava le 1963, ese le 2015, 2016 agai atu i luma e eseese mea e tutupu ai, o lenei ua tatou faapenei.

Ona oo mai lea o se manatu i le boundary. E talitonu le lagona i lau Afioga i le Fofoga Fetalai aemaise lau Afioga i le Palemia ma le Minisita e ona le Tulafono Tau Faaofi, na o le fautuaga lava ma le talosaga, e talitonu le agaga na o le Atua e Na te silafia le mea moni ma le mea sao, e talitonu foi ona o lenei vaitau o lo o faapea ia le uso nei e fai atu ni manatu ona o leí .leai leaga o lea matou te i ai foi i itumalo nei o lo o matou nonofo ai ona o le faapea o nofoa nei na fai faapitoa mo palota taitoatasi. E ese lava le palota taitoatasi, ese le urban seats. E eseese mea ia e lua. A silasila o le 2001 i le Komisi Suesue sa i ai, o i ina na amata ai ona omai itumalo ia o Vaimauga i le Komisi Suesue lea ma fesiligia pe faapefea latou itumalo nei ua toatele ai le au nonofo i fanua tumaoti. Tuu ia Vaitele faatoa toatele nei lava le itumalo o Lealailepule i le lima tausaga talu ai, a o itumalo ia na omai fesiligia le Komisi Suesue lea. O lona uiga, ua leva ona taumafai mai le urban seat, a o lea lava e i ai sui o le Palota Taitoatasi. Ma e talitonu foi o le mafuaaga na omai ai itumalo nei, o latou lava sui e maoti atu mo latou, ae ese lava le vaega o le tutoatasi ae talitonu i lenei vaitau ua ese foi lagona pei lava ona fai atu se manatu i lau Afioga i le Tamaitai Minsita, aemaise lau Afioga i le Palemia ma le Kapeneta. E i ai lava lo matou talitonuga mau, o le faaiuga muamua o le faaiuga lea mai le Atua, ma matou te tutumau foi i o matou lagona vaivai. Ona talosagaina lea, ae a pe a toe tuu atu i se Komiti latou te iloiolina le mataupu lenei, ona e tele foi nisi manatu matou te le o faaleoina atu ona matou te fia oo atu i le Komiti. Ia manuia le Fono i lau Afioga i le Fofoga Fetalai aemaise foi o le Palemia ma le Kapeneta. Ia manuia le Fono.

FOFOGA FETALAI: Malo faafetai saunoa. Ia, Toeolesulusulu ona aumai loa lea o le avanoa i le Taitai ma le Sui Taitai ae faamuli ma le ai i le Tuiatua Faanofonofu.

Tulai mai le sui usufono mamalu mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. Faafetai foi mo le Tulafono Tau Faaofi.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Lau Afioga i le Fofoga Fetalai, ua faalogologo foi ma le totoa i manatu faaalua o sui usufono, o se lagona la o lou sui usufono lau Afioga i le Fofoga Fetalai, o le auga o se manatu o le tuualalo i le Afioga i le Palemia ma le Tamaitai Minisita aemaise le Kapeneta, pe maua sina avanoa e toe iloilo tasi ai e le Komiti ma faaali ai nisi o vaega o lo o faalaia e le tele o sui usufono, ona e i ai nisi nei o vaega lau Afioga e lagona e lou sui usufono e ao ona faamalamalama lelei, ae afai e leai, o le tuualalo, ina ia mafai ona silasila i ai i se isi toe teuteuina o le Tulafono Tau Faaofi pe a maea mai le Faiga Palota.

Lau Afioga i le Fofoga Fetalai, o lea ua maua o le qualification lea mo urban voters, peitai ane, pei ona saunoa le Tamaitai Minisita, o lea e mauaa lava le qualifications o candidates, peitai ane, o lea ua aveese atu le Tulafono, e le o kilia mai i le tatou qualifications o candidates le qualification o se candidate mo le urban seat, ona o lo o sau ai i totonu o le Tulafono, afai e mafai ona faamaonia i totonu o oe o se tagata o le lola lea, ua mafai ona e qualify as a candidate, o lona uiga i lou faauigaina, afai e mafai ona ono masina ona e resitala ai i totonu o le urban seat, ua e qualify loa as a candidate. E pei la o le atugaluga lea e ala ai ona avatu sou manatu, i se vaega e ao ona toe iloilo ina ia separate le qualification as a urban voter, ma e add le qualification as a candidate i le vaega o lo o i ai qualification ina ia mafai ona separate lelei ai lea vaega, ona e ioe foi lou talitonuga ma si ou manatu i le taua o le auai o se e avee ma sui faaulu po o se sui tauva i se itumalo po o le urban seat, o se ua leva ona tautua e le gata o Ekalesia, ae mafai foi ona faamaonia mai e pulenuu o ia afioaga ma ia itumalo o lo o faapea ona auai, e le gata o Komiti aemaise foi o galuega faatino i nei aai foi po o afioaga o le a auai.

Lau Afioga i le Fofoga Fetalai, ona ou oo mai lea i le vaega lea o boundaries. O le lagona foi atonu e tau faafaigata ona ou auai i le vaevaega o lo o aumai ona e pei e misi isi nuu i lau lea vaai, pe mafai ona toe iloilo ai. O se faataitaiga na maua foi i le vaega o le Vaimauga Sisifo, e le o aafia Toomatagi, o Faatoia e le o aafia Falefitu, poo nisi o vaega ia. Aepeitai ane, o le tele o le faataatiaga foi o urban areas o lo o i ai nisi o faafanua ma vaega foi o lo o faaogaina e le BUMA ma nisi foi o Matagaluega a le Malo, o lo o eseese definition o le urban area, e ao la ona toe silasila i ai pe talafeagai foi le faaigoaina o nei nofoa o urban seats, ae le o encumbers ina urban seats sao ae aofia uma ai le itu lea o le urban east ma le urban west. O le tuualalo lea ina ia mafai ona toei E talitonu eí

FOFOGA FETALAI: Malie le sui usufono, se i tuu atu le avanoa i le faauilavea a le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, e taua tele le vaega lea ua oo i ai le saunoaga a le sui usufono mamalu. Ua uma ona pasia e le Kapeneta ia Novema o le tausaga na tea nei le mea e tau o le urban area definition.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ua uma ona tuuina atu i lalo o le Matagaluega a le Siosiomaga o i latou ia e i ai le mandate e faia mea o boundaries i totonu o le atunuu. Ua uma ona tuu atu, o la e silafia e le Kapeneta, ua pasia aloaia e le Kapeneta, o boundaries ia o mea e tau o urban areas, e faaoga uma i Faiga Palota, Tusigaigoa ma mea uma, e faafaigofie ai ona standardize le area, e faaogaina i mea uma e fai e le Malo ma ana fuafuaga. Ma lou faaaloalo lava. Faafetai.

FOFOGA FETALAI: Malo. O lea ua maua le sui usufono. Se i tulai mai Toeolesulusulu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. O le isi vaega o lou naunautai atu pe maua se avanoa e toe iloilo ai tuaoi nei, ona e pei foi ona taoto mai i le tatou census o le 2011, o le vaega ua faaigoaina o Faleata Sisifo, pe 18,000 le population. O le vaega o Faleata Sasae, pe 12,000 pe 14,000. O le vaega o Vaimauga Sisifo, pe 14,000. I totonu o itumalo nei e tolu, ua toetiiti 1/5 o le tatou population lea e nofoia, e aoga ai foi la ona toe iloilo i lou lea talitonuga lau Afioga i le Fofoga Fetalai, ina ia faatulaga. E moni o le toatele o i latou o lo o faapea ona palota i itumalo o latou aiga ma e o matai ai, ae ao ona toe iloilo pea pe talafeauga le vaega o lo o i ai, ina ia mafai ona tali le manaoga ma i ai foi nisi e fai ma leo o i latou o lo o nonofo i totonu o lea vaega.

Ma le isi vaega mulimuli lau Afioga i le Fofoga Fetalai, o lou lava talitonuga i le faamalamalamaina e le Sui Ofisa Fai Palota i le aso ananafi, o lo o faapea mai ai, o Aleisa ma Aelee e mafai lava ona palota i le palota o le a faia nei i le sui o le urban east. Ia, tailo i ai. Afai ua tatou define ina boundaries, stick to the boundaries, ave loa isi tagata ia e i fafo atu i i e palota i isi vaega, ae aua le define ina i le Tulafono le boundaries ae toe i ai ma candidate leaga o tagata ia sa palota i le Palota Taitoatasi. Afai loa e fai le vaega lea, ou te talitonu i le saunoaga a le sui usufono mo Sagaga le Usoga, lona uiga o le a maua i le 20,000 i le 30,000 i latou i totonu o Sagaga le Usoga. O vaega ia e taoto atu ai le tuualalo lau Afioga i le Fofoga Fetalai ina ia toe silasila i ai lo tatou Malo. Faafetai.

Tofa Tuisa Tasi Patea: Se i faasao lava lau Afioga i le Fofoga Fetalai a o saunoa le sui usufono mamalu, o Sagaga le Falefa e le o Sagaga le Usoga lau Afioga.

FOFOGA FETALAI: Ia, o Sagaga lava o Sagaga, aua e te popole, the same thing. Na ona feeseeseai lava, a o le manatu o le sui usufono e fesoasoani atu i lau lauga sa fai.

Ia, Maualaivao lea sa tulai mai.

Afioga Maualaivao Pat Ah Him: Faafetai i lau Afioga i le Fofoga Fetalai, o lea ua maea, o lea ua manino. Faafetai lava.

21 *APERILA 2015*

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

FOFOGA FETALAI: Malo faafetai saunoa i le sui usufono mamalu. Ia, lo oulua sa seelua Aeau?

Afioga Hon AEAU PENIAMINA LEAVASEETA (Falealupo): Lau Afioga i le Fofoga Fetalai ma le pau o le Maotaga i le Fonousu a Samoa ou te tulai atu i le agaga faaloalo e tata ai, e faalogologo lava ma le totoa i leni taeao atoa i le faatofalaiga a le Maotaga nei i leni Tulafono Tau Faaofi. O le Tulafono Tau Faaofi foi ua maua atu, e taua tele, aemaise lava o records po o faamaumauga o leni Paeaiga, ona o i o le a faavae atu ai se isi pauuga fou i faiga palota i tuaoi, po o sui foi. O le ala manatu lava lea i le agaga faaloalo e tulai atu ai i se sao puupuu ona o le masani a le itumalo leni, e le palota lava i se isi mea, e o atu uma lava i Falealupo. Ae ou te tulai atu ona o le tele, toatele o le mamalu o le atunuu atoa foi ma nofoaga. Pei o le mea lena e faatauaina e lou nei sui usufono i lou faalogologo atu, ua soalaupule, ua faafofoga mai foi le atunuu i le faatofalaiga a le Malo, aemaise Afioga i... Ua maua foi ua uma ona soalaupuleina i Komiti, o lea ua i lumamea nei se finagalo o le Afioga i le Minisita, atonu o le Kapeneta atoa uma foi lea i le suiga lea ua i ai nei. O le talosaga la, na pau lava lea lau Afioga i le Fofoga Fetalai, ina ia toe oo mai le faatofalaiga fou lea i le Komiti. I se a? Se i logona le atunuu, i so latou lagona agaii aemaise lava ona o le toatele o le atunuu o lo o aafia i i. Masalo o se vaega aupito sili lea ona toatele o le faiga palota lau Afioga, e le maua se avanoa na ona aumai lava aumai le finagalo o lau Afioga i le Minisita ae se i logona. O le talosaga vaivai lea ma le puupuu e tuuina atu pea ina ia toe aumai i Komiti se i toe logona le faatofalaiga ona matua manino lava lea ma atoatoa ma fafia ai.

O le agaga lea ma le faaloalo i lau Afioga. Faafetai.

FOFOGA FETALAI: Malo faafetai. Ia, malie o le a toe tulai mai le sui usufono mulimuli o le Itu lea. Tulai mai Peseta, le sui usufono mo Faasaleleaga Nu.4.

Afioga PESETA VAIFOU TEVAGA (Faasaleleaga Nu.4): E momoli atu le faamalo ma le faafetai mo le laolao ua maua e lau Afioga i le Fofoga Fetalai, ae ua ou tulai atu e avatu foi se manatu o leni itumalo ona o leni Tulafono Tau Faaofi taua pei ona talanoaina i le Palemene.

E le tele se manatu o lou itumalo, ae talu ai ona o se tasi o vaega o leni Tulafono Tau Faaofi e avatu ai le talosaga a lou itumalo, ona o le tulaga lea ua faataoto nei e le tatou Palemene nofoa ia e lua e tulata i le taulaga.

Lau Afioga i le Fofoga Fetalai, sa ou faalogologo lava ma le totoa i leni taeao, ma matau pea tulaga o lo o i ai nisi foi o saunoaga a sui usufono mamalu ona o nei nofoa e lua, sa faapea ona palota uma i ai le toatele e le gata i Upolu nei, ae faapea foi Manono, Apolima ma si o matou motu tele i Salafai. I le matau atu la i leni Tulafono Tau Faaofi, e pei o lea ua aumai faapitoa lava na o Upolu nei, ona o lea e maua o nofoa lata i le taulaga, lea e i ai le uafu, le malae vaalele i Upolu nei.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E pei o le faanoanoaga lena o lou sui usufono. O lea la ua maitau atu, o lea ua pei na o Upolu nei o lea la ave i ai avanoa ia e lua. A o le fesili a, o le a faafefea le Motu i Salafai. O lea lava o lo o pepese i taimi uma ma taimi uma, o le mea e lelei i Upolu e lelei i Savaii ma nuu i tua. O le toatele o tagata sa palota i Nofoa nei e lua, o le toatele lava o le toatele mai le Motu tele i Salafai. A o lea ua maitau ma vaavaai ma faalogologo ma le totoa, lea ua faasoa Nofoa ia e lua i le Vaimauga ma Faleata.

O Savaii foi ia, o Faasaleleaga lava o le taulaga lena o Savaii. O lea e i ai le uafu, e i ai le falemai, e i ai le malaevaalele, e i ai uma lava mea uma. O Faasaleleaga o se Itumalo e sili ona toatele i Savaii atoa. E pei la o le agaga lena lau Afioga i le Tamaitai Minisita, mo le lumanai, talu ai ona o lea ua tatou talanoaina Nofoa ia e lua ona o le tulaga faanatinati ae tatau ona toe silasila le Matagaluega ma lau Afioga, e tatau ona i ai se urban seat mo le Motu tele i Salafai, aemaise Faasaleleaga. Silasila foi i Faasalaeleaga, ua tatau ona suia lea mea e i ai, Faasaleleaga Nu.1, Nu.2, Nu.3. Silasila foi i le tulaga o lo o i ai Faleata, Faleata i Sisifo, Faleata i Sasae, Vaimauga i Sasae, Vaimauga i Sisifo.

O nai vaega na lea e tau avatu ai lau Afioga i le Minisita ma le Matagaluega. E tatau ona faapaleni uma vaega ia. O lona uiga, afai o lea ua manatu le Matagaluega ma le Malo mo ni Nofoa ia mo Upolu nei, e tatau foi ona silasila i le lumanai mo ni Nofoa o le Motu tele i Salafai. O la foi ua i ai le taulaga ia i Salelologa, o le taulaga lava lena mo le Motu tele i Salafai. Na o le pau lena o si manatu e fia avatu i lau Afioga i le Minisita ma le Matagaluega, ina ia paleni lelei mea afai e lelei i Upolu e tatau foi ona lelei i Savaii, ma lou faaaloalo lava.

FOFOGA FETALAI: Malo faafetai saunoa i le sui usufono mamalu. Malie lau Afioga i le Taitai o le Itu Agai faamuli ma le ai lau saunoaga sei faamaea mai le pito lea. Tulai mai le Sui Fofoga Fetalai.

Tofa AGAFILI PATISELA ETEUATI TOLOVAA: Faafetai mo le avanoa i lau Afioga i le Fofoga Fetalai. E talitonu ua tatou taunuu i le taimi foi lea na o le fia manao e ta le tasi ae malolo. A ou toe tomanatu i tua i le talafaasolopito o lenei Nofoa, na amata mai o tele, sau ai, sau ai, totoa na o le lua. O lona uiga, e alu agai i lalo le numera, a lea ua tatou alu lenei taeao o tatou talatalanoa. O nisi o taimi e alu i luga, a o isi taimi ua alu i lalo leo ona o lenei Tulafono Tau Faaofi. O lou a lagona o i ai, a faapea o le tulaga lea ua i ai le faasologa o le Nofoa lea, o le a le mea tatou te le fai ai se faaiuga ae taofi loa ma le faaumi o le taimi, vaeane lava le Susuga ia Papalii ma le Susuga ia Maualaivao.

FOFOGA FETALAI: Tulai mai le sui usufono Taitoatasi.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Maualaivao Pat Ah Him: Lau Afioga i le Fofoga Fetalai, vaeatu le paia o le Maota. Atonu e moni le saunoaga a le sui usufono ae ou te talitonu, faimai e alu, alu toe lua, e moni ua faaitiitia numera o sui usufono a o numera o tagata palota ua alu i luga ua maualuga. O lau foi la vaai i le taua o nei Nofoa ua 50 tausaga o tautua ia Samoa. A sala umi, umi, a o le mea e fai e faamuta i i, o a ia ituaiga mea faapea. Manaia saunoaga a sui usufono, tele o sui usufono ia e saunoa o le manaia ia, ta fia tu atu i luga e tali ae leai, faasao le taimi. Pau lava le point e tasi lea ou te avatua, o le upu lea o le tautua. Po o fea e te nofo ai, a o fai le tautua lea i afioaga manaia lena, aua foi o le tautua e leai se leo ae fai le tino, ma le faaaloalo, ia alofa mai le sui usufono lea aua le faapena lou finagalo. Ia manuia le tatou Fono.

FOFOGA FETALAI: E faamalie atu i lau Afioga i le Sui Fofoga Fetalai, manatu o le a vavae foe, e sili le ave o le avanoa ia Maualaivao e tuutuu ai i lalo le toto maualuga ona tatou alafai mai i le afiafi a nanei ua toe maua nisi manatu e faatonutonufolau ai le faigamalaga o le tatou Fonotaga. E momoli atu le agaga faafetai tele i le paia ma le mamalu o le tatou Maota Fono, leaga ua maitau atu ua tatou taunuu i le tatou taimi malolo.

E i ai le talitonuga o le itula e 7:00 i le afiafi a nanei maua se faasiliga malosi ona faaauau ai lea o lenei Tulafono Tau Faaofi taua. E matau pea ma le totoa e le o faigofie felafolafoaiga i lenei afiafi ona e manatu foi o lo o avatu pea le avanoa i tatou faiga masani. E le faigofie foi le taumafai mai o le Afioga i le Tamaitai Minisita, le Palemia ma le Kapaneta i le faatulagaina o lenei Tulafono Tau Faaofi. O lou lagona e tatau pea ona avatu le avanoa, leaga o le Tulafono Tau Faaofi lea ua i luga o tatou Tulafono Faanatinati ina ia lagona pea a outou fetalai ma a outou saunoaga.

Na faataatiaese Taualumaga a le Fono Aoa o le itula e 12:58 i le aoauli.

Na toe faaauau Taualumaga a le Fono Aoa o le itula e 7:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o Faiga Palota (Nu. 2) 2015.

FOFOGA FETALAI: E faatalofa atu i lenei vaega o le afiafi o lea ua tatou taunuu mai i le amataga o le tatou galuega aua le lafo na faatuina i le taeao analeila ona o le faamoemoe, o le tulituliaupuina o le tatou galuega pei ona faataatia ai tatou polokalame ua maea ona i luga o le Laulau a Fono, e momoli atu le faafetai tele i le tatou Maota ona o le onosai mai, e talitonu ua tatou taunuu i le tauafiafi ua faliu foi le la i lona nofoaga, ua tatou i ai foi i le vaitaimi o faiga sauniga o le tatou atunuu ua iu galuega o le aso.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ae faafetai i le Atua ia o lo o tapuaiina pea le soifua manuia o lo o maua foi i ala o lo o maua le lagi soifua lelei i le tatou atunuu i lenei aso i feau ma galuega, o lea ua vaavaai atu ua tatou toe potopoto faatasi i le manuia i lenei itula afiafi.

E faia le tatou malologa i le aoauli analeila o lo o faapena ona faagasolo le tatou Tulafono Tau Faaofi o Teuteuga o le Tulafono o Faiga Palota (Nu. 2) 2015, ia o le a avatu le avanoa i lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai e le uma viiga o le tatou Matai i le lagi ona o le taitaiina mai pea o le soifua o le mamalu o le Maota nei mo le faaauauina o a tatou galuega tuua aemaise Tulafono Tau Faaofi o Faiga Palota e pei ona soalaupule i saunoaga i lenei taeao.

Ia ua avea le malologa ua maua ai foi le avanoa e manatunatu loloto ai i Taulumaga o le tatou Fonotaga, ma o le mea moni e le fou manatu faaalua i le Tulafono Tau Faaofi ua i lumamea nei ma le agaga faanatinati na mafua ai ona faagasolo le Tulafono Tau Faaofi i manatu o le Kapeneta aemaise le Minisita e ana le Tulafono. E ao ona faataua a tatou tapenapenaga ia lava le taimi ina ia tapena lelei ai le aufaigaluega, ona e tele ma anoano galuega tau pepa e tataua ona faatino, ina ia sologa lelei le faagasologa o a tatou Faiga Palota i le tausaga fou, e le o i ai se agaga e faanatinati ona o se isi lava itu, o lea foi la e matau e au nei ma le Kapeneta, o le Tulafono Tau Faaofi lenei, e i ai le uluai taimi na faataoto ai i totonu o le Palemene i le tausaga talu ai, o le agaga lava lena sa aumai ai foi i le Kapeneta le Tulafono Tau Faaofi lenei. Ia peitai ane, ua alu alu ia suaga a le vaatele i saunoaga ma lagona sa faaalua i le uluai Fono sa tagofia ai le Tulafono, i se tulaga foi faanatinati, o lea na to ai foi le matupalapala ma fai loa le lafo e toe liliu atoa ai le agaga ma le faaiuga a le tatou Malo, ina ia faatino le mea o lo o i ai le finagalo o nisi foi o sui usufono o le Palemene na sausaunoa i lena taeao. O lea la na faasee ai loa lea i le Komiti e ana la ia Teuteuga ia na toe foi mai i le Maota, o lea lava la e toe faagasolo le vaega mulimuli o Teuteuga ua toe faia foi i le Tulafono.

Lau Afioga i le Fofoga Fetalai, e le o se agaga foi lea ole faimea tuulafoai na faatino ai le manatu o le Kapeneta. E i ai le manatu o le Kapeneta ia faagasolo loa ma faaiuiu a tatou felafolafoaiga ina ia pasia loa le Tulafono ma faagaoiioi tulaga uma e tataua ona fai mo le Faiga Palota Lautele a le Atunuu o lo o loma nei.

O lo o tagitagi pea i manatu nisi o saunoaga i le taeao nei pei ua aumai foi lele ua lui mai le Malo po o fea le tofa, o fea le susuga? Ia ua iu lava ina lauga faa-Faifeau nisi foi o sui usufono i le taeao lenei, ma ua agai atu ai pei o lauga a Faifeau i le Aso Sa na agai ai le taeao nei i le taumafai foi o saunoaga e agai i le Tulafono Sili a le Atua, ðO le Alofa.ö Ae le mafai ona aveesea ai le mea lenei. O le Tulafono e faatino e le Malo e le o ni Tulafono e fai, ina ia faafiafia ma faamalie ai se toatasi po o se toalua o le Maota lenei.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E mafua ona fai Tulafono lau Afioga i le Fofoga Fetalai, ina ia faataoto taiala mo le sologa lelei o faaiuga o a tatou Faiga Palota a le Atunuu atoa, o le ala foi lena e uma loa ia lea Faiga Palota fai loa ma le Komisi, a o lea e ala le mafuaalii, o lea e manatua pea e tatou uma ni faaletonu sa faagasolo ma aumai ai ni manatu fou e faatino ai ma taumafai lava le tatou Malo ina ia ausia tulaga silisili ina ia faatino ai a tatou faaiuga ma faiga filifiliga i le agaga o le amiotonu. Ae peitai ane, o lo o matilatila foi ia fetalaiiga a lo tatou Alii, òE tupulua lava le saito ma le titania.ò O taimi uma lava e tatou te taumafai ai e fai i le lelei, e le mafai lava ona le manu ae ai foi ma le leaga, leaga o le lalolagi lea e taa ai le tiapolo e le o mafai ona noatia i ni maea filifili.

O le ala lena lau Afioga i le Fofoga Fetalai, o a lava taumafaiga e taumafai i ai tatou uma, e i ai lava se isi e tulai ae foi fai foi se auala fou e faaleaga ai se mea lelei ua taunuu i ai le Maota lenei. E le o na ma le laina lau Afioga i le Fofoga Fetalai, o le Itu lenei o le Itu toatele, e 37 sui usufono o le Vaega lenei pe a toe faaopopo i ai ma le sui usufono lea ua toe manumalo foi. O le faavae atoa lena o Faigamalo Faatemokarasi. O uiga o Faigamalo Faatemokarasi e faatino mea o lo o lilifa i ai le toatele o le atunuu, o le ala foi lena a toatele sui usufono o lea vaega o latou e omai i totonu e fai le Malo, ona o le finagalo fulisia lea o le atunuu. Ae le o na ma le laina foi, e oo foi i Faigamalo Faatemokarasi, e le o i ai foi se atoa, e le o i ai se atoa. O le ala lena e faataoto ai aulape o Tulafono ona o lenei lau Afioga i le Fofoga Fetalai, o le filosofia tauave pea maoae o lo o faafoe ai nei mea o Faigamalo, e te tuua loa le paoa i lima o ni tagata se toatele, o le natura o le soifua o le faaaogasese o le paoa. Pe e te tuua le paoa i lima o le tagata e toatasi faaaogasese foi. O le ala lena o lea na ala ai ona fausia e Polofesa o Faigamalo le ituaiga Temokarasi ina ia vaetolu le pule, ave le isi pule e tuu i le vaega e latou te faatinoa tonufai o Malo, ave le isi pule i le vaega e latou te faatinoa le fausia o Tulafono, ae ave le isi pule i le vaega e latou te faamasinoina le amiotonu o le tausisia o Tulafono. O Pule ia e tolu lea e faavae ai le faalupega, òO le Tafatolu o Faigamalo ó Palemene, Faamasinoga ma le Pulega.ò Ona fefaatauagai ai lea o Pule nei, siaki e le isi Pule le isi Pule. O aulape na o lea e taoto i le Faavae e taofia ai le faaaogasese o le Pule pei ona sau ai i aso anamua.

O aso anamua sa pulea Faigamalo e le Tulafono e faaigoa o le Rule of the Jungle, o lona uiga o le Tulafono e ola ai Faameaola, meaola o lo o tataa i le vaomatua, o le meaola lava e malosi, o ia e pulea, o lea e tulai mai ai le manu lenei o le leona, o ia o le tupu o manu uma. E faapena le Pulega sa sau ai Faigamalo, o lou malosi lava o oe, e faatoilalo isi Malo, ia ona tulai mai loa lea ua e umia le pule ó le Pule Aoa, po o le pule faa Militeli.

O le ala foi lena lau Afioga i le Fofoga Fetalai, na faavae ai le pulega o le Nuu o le Atua. Sa sau sao mai lava i le Atua tonufai o le Malo o Isaraelu ae auala mai i Ana Auauna, ua sau sau, ua le fiafia Isaraelu, ua mana Isaraelu i se Tupu, so latou Tupu e pei o isi Malo e mafai ona latou tilotilo atu i ai ma talanoa atu i ai talanoa mai.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ua tau le talitonu latou i Perofeta ia e o i totonu o le faleie po o le malumalu e talanoa ma le Atua ona omai lea ma lipoti mai faatonuga mai le Atua. O le ala lena na tuli ai Samuelu e alu e tau i ai, ðO le a ou avatua le Tupu.ö O fetalai ia a le Alii, ðO le a ou avatua le tou Tupu, ae o le a outou vaai i ai i amio masani a Tupu.ö O le natura o le Tupu faalelalogi, o le a ia avea outou atalii e tauina ona taua ma avea foi outou afafine aulelei e fai i ai uiga ma tuinananu eseese. O le mea lena na sau ai lava mai le amataga. E tasi lava le pule atoatoa e umia e le Tupu. O le manaia ia o le tala ia Solomona. Faamasino Solomona. A o ia foi o le Tupu e faatinoa mea uma. A o ia foi o le Tupu e faia tulafono. E tolu paoa umia uma e le Tupu o Solomona. E matautia le faamasinoga lea na fai ae matamata le Tupu o Seepa, ma iu ai lava ina naunau atu le Tupu o Seepa i lona loto ia Solomona. E alu ese mai le Tupu o Seepa mai Isaraelu, ua toe foi i lona Malo ua maua ai le atalii o Solomona. Na igoa foi ia Solomona aua foi ua atoa ia Solomona le potu i mea lelei atoa foi ma mea leaga.

Lau Afioga i le Fofoga Fetalai, ona sau sau ai lea, ua amata lava ona aliali le sao o mea ia na fetalai i ai le Atua ia Samuelu, ua sau sau sau, ua iu lava ina toe fetauai loa Tupu ma tagata lautele o lo o latou pulea ma le sau . E i ai le taua tele na fai i Peretania, na fesiligia ai e le tupu le Palemene, o ai e pule? O ia e pule i tagata. Ae fai atu le Palemene, ðE leai sau pule, o matou e pule i le atunuu ona o matou o sui o tagata e toatele.ö O le a le mea na tupu? Na oo lava ina tau. O le Seneturi 16 na tupu ai le vesiga lenai. Aua e fai le vaegaau a le Tupu, fai foi le vaegaau a le Palemene, o le Taitaiu a le Palemene o le toa taotaua o Cromwell. O le a le mea na oo i ai? E le i umi lava ona fetau ai ae toilalo au a le Tupu. O le a ou le taou atua le iuga matuia na fai e le Palemene. Na faamuta ola ai le Nofoaiga a le Tupu o Peretania na mafua ai le taua. O le iuga o le feeseeseaiga lea, o le faataatitia mai ai loa o le va nonofo o le Tupu o Peretania ma le Palemene seia tau mai lava I le asõ. Ua faasee le Tupu i luga e nofonofo ai, na o le nofonofo lava, ma matamata. Avatu i ai pepa e saina. A oo i le aso e tatala ai le Palemene ona sau lea e tatala le Palemene, a o mea uma lava e pei o le fausia o Tulafono ua aveese mai le Tupu ua faatino e le Palemene. O lena la lea na sau ai lava Faigamalo faa Palemene ma iu lava ina taunuu mai i le taimi o le Pulega Malo a Amerika i le Seneturi 18 ua matua maioio lelei le vaetolu o le pule. E oo foi i le tatou Faiga Malo o lea foi e vaetolu le pule ó Palemene, Faamasinoga ma le Pulega Faatonu. E mafua uma mea ia o le puipuga o le faaogasese o le pule.

Ua ou taua tulaga ia lau Afioga i le Fofoga Fetalai, ona e faateete tele le Kapeneta lenai i se tuuiga e faapea ua na faaogasese le pule. E mafua lava la ona faataatia mai aiaiga o le tatou Tulafono Tau Faaofi, ia sologa lelei a tatou faaiuga o Faiga Palota, ia sologa lelei ma tapenaga e tataua ona fai. O le matau a le Malo i le taeao analeila, o le faaloolomaau a Sui na sausaunoa, ia faasee atu i le Komiti o Tulafono Tau Faaofi le Tulafono lenai latou te soalaupuleina, ina ia toe maua ai se avanoa o le toatele e toe manatunatu ai nai lo le faatino loa nei o se Faaiuga a le Palemene.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le agaga mama o lo o faaalua e le Minisita ma le Kapeneta, ia sologa lelei a tatou galuega ma aua nei tuuaia i tatou e faapea ua tuai a tatou faaiuga faa Palemene ona o le faaletonu o le tuai o a tatou metotia aua o ituaiga metotia uma ia e faaaoga e le Kapeneta e sologa lelei ai a tatou galuega. O le tatalo e faapea ina ia toe maua sina avanoa, o lea ua tatou faalogologo pei e agai uma lava finagalo i le taeao lenei i lenei lava toalua o sui usufono o le Au Palota Taitoatasi o le ala lena e le soona televave ai foi iuga a le Kapeneta, pei e foliga mai e toalua lava sui usufono ia e agai i ai le tele o saunoaga, sui usufono o le Itumalo ua leva foi la latou tautua i le tatou atunuu. A o le taeao nei o lea foi ua manino toeitiiti lava aafia uma sui usufono o le Palemene ua aumai nei, aemaise lava o le Itumalo o Vaimauga ma le Itumalo o Faleata. O lea foi la ua matou faalogologo atu i le agai mai o saunoaga pei e lilifa lava i le tulaga, se i toe tuu atu lava sina avanoa ina ia tatou agai ai i tulaga masani o le faagasologa o a tatou Tulafono i le Palemene. Samoa, e leai lava ma se agaga ina ia faatopelau a tatou galuega.

Lau Afioga i le Fofoga Fetalai, o le mafuaaga foi lena lea ua ou vave tulai atu ai, o le a to le matupalapala i le tulaga o le faatalauula ina ia faasee le Tulafono Tau Faaofi i le Komiti, latou te toe tilotilo tasi i ai ona toe sau ai lea i le Maota mo le pasia. A o lea e maitau toeitiiti lava uma felafolafoaiga ona saunoa atu lea o le Minisita na te faatuina atu le lafo o le a see le Tulafono i le Komiti. Ona pau lava o lea lau Afioga i le Fofoga Fetalai, o lea lava o lo o lava le taimi, o le manatu o le Malo ia oo atu ia Me ua toe foi mai le Lipoti ma e tatau lava ona sosolo foi i ala o mea, ia oo atu foi i lena taimi ua tatau foi ona aumai ma a tatou Teuteuga o le Faavae ua leva ona soalaupule e le Komiti o Tulafono. Ona toe pau lena o le Tulafono e o faatasi ma le Tulafono Tau Faaofi lenei, ona e ono aafia ai foi ma le Au Palota Taitoatasi i totonu o le Faavae, e tatau foi ona toe Teuteu ma le Faavae ma isi foi Teuteuga taua a lo tatou Malo.

O le agaga lena lau Afioga i le Fofoga Fetalai. O lo o lava le taimi. O lo o lototele foi le Tamaitai Minisita i le tomai o i ai i lana aufaigaluega, e ui ina tau tuai teisi a latou faaiuga a o le a faapena ona faatelevave foi e i latou ua lava le tomai ma le tapenaga ina ia aua nei i ai se faaletonu a o tatou alofaiva i le Faiga Palota.

Lau Afioga i le Fofoga Fetalai, o si a matou tali atu lena e tusa ai ma tuualalo sa aumai i le tele o saunoaga i le taeao nei. Ia manuia le tatou Fono.

FOFOGA FETALAI: Malo faafetai saunoa i lau Afioga i le Palemia, e manatu ua faafofoga ma le manino le Maota i lenei itula o le afiafi. E le gata i lea ua faafofoga foi le tapuaiga a lo tatou atunuu, ona e matau e le o toe po malae mai lava i le taeao analeila ua umi tele o tatou soalaupule lenei mataupu taua. O le ala foi lea o le taumafai atu o le Fofoga Fetalai e tatala pea le avanoa, ona o lenei Tulafono Tau Faaofi e le laitiiti, o le Tulafono Tau Faaofi e aafia ai le faiga filifiliga o sui mamalu uma o le Palemene ma e aafia ai le atunuu atoa.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E le i mamao atu talu ai nei ona pasia nisi o teuteuga taua sa tatou faale ai foi ma malaga mai Itumalo eseese, sa faapena foi ona tauavameaina e le tatou Komiti faa-Palemene. O lea ua manino le folasaga a le Afioga i le Palemia, e manatu o se matupalapala matagofie lea mo lenei afiafi mo sui usufono uma sa tulei saunoa o lea ou te faamaumauina. E pei o le agaga lena na aumai ai le tatalo ma le talosaga a le Malo ina ia toe tuu atu laitiiti lava se avanoa mo le soalaupuleina o lenei mataupu. O le agaga lea e momoli atu ai le faafetai tele i le Taitai o le Malo aemaise o le Afioga i le Tamaitai Minisita ma le Kapeneta, o faiva lava e malo o faiva foi e taunuu ma le manuia. O le agaga faafetai lea i le Malo ma le tulaga ua taunuu mai, a o le a avatu pea le avanoa i le ó o lea sa fai atu lau tala analeila toe tasi le sui usufono e le i saunoa toe o le Taitai o le Itu Agai ona tali loa lea o le Minisita, ona faasee pea lea i le tulaga masani o lea ua faatuina mai e le Afioga i le Palemia, o le a foi i se taimi faatu mai e le Minisita le lafo i tulaga masani e see ai le tatou Tulafono Tau Faaofi i le Komiti.

Ia se i tulai mai le sui usufono mo Faleata Sisifo pe i ai se mea?

Tofa LEALAILEPULE RIMONI AIAFI: Lau Afioga i le Fofoga Fetalai, ou te talitonu e le tatau ona ou folo molemoleina lenei faaaloalo maualuga e tusa ai o le saunoaga matagofie a le Palemia. Ona e pei o lenei Itumalo sa amataina le talosaga i le Afioga i le Minisita ma le Malo ina ia alofagia le tulaga, o lea la ua saunoa mai ua to le matupalapala ina ia toe foi i le Komiti. O le mea lea lau Afioga e fia fai sina faafetai puupuu lava a lou nei sui usufono.

Ina ua ou agai mai le Fono i lenei afiafi, ae valaau mai si ou tina e pei lava o taimi uma ou te sau ai i le Fono, e fautua ma faamanuia mai. Ona fai mai lea, òLealaillepule o le tusi faitau aso o le aso lenei e maua mai i le Ioane mataupu 15 fuaiupu 1 seia oo i le 5, ki mai pea lau telefoni sei faitau atu. Ona faitau mai lea e le olomatua, o le Tusi malamalama i le vine moni, ona ou fai atu lea i le olomatua, o le a tonu le auga o le feau? O le a le faauluuluga? Ae faapea mai, e teuteu e Ia ia fua atili mai ai, e teuteu e Ia le vine ina ia fua atili mai ai. Ua talafeagai ma le aso ma lona faamoemoe, lau Afioga i le Palemia ma lona Itu, o le tulaga ua i ai le tatou Tulafono Tau Faaofi, o lea ua ave e Teuteu ina ia fua atili mai ai i ona fua lelei, leai e le o se agaga faatautee, ua malie o, malie Malo, i lau tapuaiga i tama o lenei Itumalo, ia o lona ua outou faafofoga ua to le matupalapala, leaga o eleele o Faleata o eleele na faavae ai le Malo o le HRPP, o le muaui tasi ia Tumua, o le eleele o le Itumalo saili Malo. O lona ua to atu le matupalapala e le Afioga i le Palemia, o mea faapenei e le mafai ona galo, leaga o le aso e sao ai Iakopo ina ua feiloai ma Esau, o le aso ua ou vaai ai fofoga o le Atua, ioe, leaga o lea ua faale-Atua lau faatofalaina i lenei afiafi, ua e faatamalii ma faa-Taitai alofa e uso i matou uma i lau silasila.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Lau Afioga i le Tamaitai Minisita, ia e leai, nei e pea mai, a talanoa loa i sui tamaitai o le Pasefika ma le Lalolagi atoa e leai lava se isi e faamuamua e ave a le faamuamua i lau Afioga leaga ua leva lau tautua e faamalulu atu. A o le a le tali o le a tuuina mai e le Komiti e malie atoatoa le sui usufono mo Faleata ma le toe gagana i lenei mataupu, o lea ua tali le Malo aemaise o le paia o lena Vaega toatele, faamalo faafetai. Ou te talitonu e pei lava ona outou lagolago ia outou saunoaga, e le mafai ona aumai foi le finagalo pei ona tuu mai e le Afioga i le Palemia ma lena itu, ia ae tatou talia, o le a lava le tali e aumai, ia o lena lau Afioga i le Taitai o le Malo ma lena itu aemaise foi o le Afioga i le Tamaitai Minisita e ana le Tulafono, ia tatou ave lea i uta ma finagalo malie, ua malie lenei itu ma lenei foi sui usufono, ia faamanuia le Atua i lenei afiafi, faafetai lava.

FOFOGA FETALAI: Malo faafetai. E te toe fia saunoa le Taitai o le Itu Agai pe o le a tali loa le Minisita, e te toe fia saunoa? Se i tulai mai le sui usufono mamalu.

Afioga Hon PALUSALUE FAAPO II: Lau Afioga i le Fofoga Fetalai ma le mamalu o le Maota, o aso faapenei e le faigofie, aemaise pe tefa le tauala i le Malo, e le faigofie e le o se mea e mafai ona alu i luma toe alu i tua, leai, se i vagana o se mataupu e tataua ona fetuutuunai le tofa ma le tofa mamao e amanaia ai se tuualalo a le Sui Taitai ma lenei itu, o lea e faafogafoga mai le atunuu. O lea ua saunoa le Afioga i le sui usufono mo Faleata Sisifo, Tuilaepa e le toe faasili sau faamatalaga, pau lava le mea ou te lagona o le faagasologa o Tulafono faapenei e tusa ai ma le Tulafono Tumau ma le Faatemokarasi, lea ua atoatoa i le po lenei, o le tele o sulu e anoano mau figota, aisea? E toafitu lauia o le a lauiliuina aemaise ai o le avanoa mo le atunuu. O le mea lena na tuu e le maua i le po lenei, ae peitai lau Afioga i le Palemia ma lau Afioga i le Tamaitai Minisita, matou te le tetee i lau Tulafono, ae faafetai ua tefa le tauala o i e iloa ai pe eseese a tatou tu, eseese o tatou manatu, ae tasi lava le auga, o le a? o le manuia o le atunuu. O lea la ua ou talitonu i le po lenei, ae faifai ai pea, faifai ai pea, o lea la ua e saunoa manino lau Afioga i le Palemia, o le paoa, o le paoa, leaga e i ai taimi e matou te faapea ifo ai, o lo o outou faaaga le paoa lea, a o le po la lenei, ia e momoli atu le faafetai tele i lau Afioga i le Tamaitai Minisita, lau Afioga i le Palemia o lena itu o le vaega toatele, ona o lea ua faamalie e tusa ai ma faagasologa o Tulafono i atunuu faatemokarasi. O le mea la lea e le tele sau faamatalaga, faafetai tele i lau Afioga mo le avanoa ma lou tuu avanoa mai i lenei itu, aemaise foi le matupalapala ua to mo Samoa, ua to mo Samoa i lenei po, ia manuia le Fono.

FOFOGA FETALAI: Malo, o le a avatu le avanoa lenei i le saunoaga tali atu a le Afioga i le Minisita e pei o tatou tu ma aga masani i le faitauga faalua ma tatou faame'i atu ai loa e tusa ma le lafo faatu.

Tulai mai lau Afioga i le Minisita mo Faiga Palota.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai mo le avanoa. Ma ua tulaga ese foi lenei afiafi pei ona saunoa atu foi le Taitai o le Malo ma talifuaitau foi i nisi o mataupu sa laga mai, aemaise foi o le faagasologa o tatou galuega ma ala o mea. O lea lava ua uunaia foi le Faigamalo i le tulaga lea o le moomia pea, o le oo atu i le tatou Komiti i tulaga masani, po o ai lava o lo o fia autovaa mai e faaalua finagalo ma manatu e tusa ai ma le Tulafono toe Teuteu lea ua faatulai atu.

Lau Afioga i le Fofoga Fetalai, ou te faamalulu atu i lau Afioga, ae ou te manao lava e faamau le tulaga lenei mo Faamaumauga a le Palemene, i suiga aemaise lava suiga o tuaoi ia o tatou itumalo taulaga, na aumai le suiga i le Faaiauga a le Kapeneta ia Tesema, ma o lo o faamauina i le Lipoti a le Komiti ina ua toe foi mai i le tatou Maota i le tatou Fono talu ai, o la o lo o faamaumauina ai e faapea, o suiga na toe tuuina mai i le masina o Tesema ma le masina o Fepuari e le i oo i ai le iloiloga a le Komiti. Ae na faataatia le Lipoti lea a le tatou Komiti sa iloiloia ia le Tulafono Autu muamua le suiga o Faiga Palota tusa o le masina lea talu ai ia Mati, a o lea sa taatia ia le tatou toe Teuteuga lea ua tatou faavesivesi ai ia Tesema. Ou te manao la lau Afioga i le Fofoga Fetalai e faamauina pea lena tulaga, aua o lea na i ai le fa masina ae le i lipoti mai ia le Komiti sa mafai ona iloiloia ai, ae peitai sa fai lava le finagalo o le Komiti, e toe tapena mai le Malo ma toe aumai, o lea la ua i ai le tatou Tulafono ua i ai nei. Ma ou te manatu, e ese le taua o le saunoaga a le Afioga i le Palemia i le faaaogaina o le paoa po o le malosi i lea vaega ma lea vaega o le Faigamalo, ma o paoa fetalai, saunoa foi i le Palemene, o le Faamasinoga ia ma le Pulega. Ae e ao foi ona tatou malamalama uma e tulaga ese foi ia le tatou Tafatolu lea aua i totonu o le Tafatolu o le Palemene, o lo o i ai foi le itu a le Palemene o lo o i ai foi le vaega o le Pulega, o matou ia e nonofo atu i i. O le tulaga ese la lena pe a faatusatusa ia po o Amerika ma isi ituaiga faiga faatemokarasi o lo o faatino ai na Faigamalo. Ae ui i lea, e laualuga lava le itu lea sa saunoa i ai le Afioga i le Palemia, ia iloa e i latou o lo o i ai le malosi e fuafua le talafeagai o le faaaogaina o lea malosi, a o le malosi foi e tuuina mai e le Tulafono e fai ai a tatou galuega. Lau Afioga, ou te matua lagolagoina le tulaga ua saunoa i ai le Taitai o le Malo, ne i te i ua maitau mai pe ese se taofi o au nei e ou le Tulafono, o le naunautaiga ia, ona o au o le Minisita o lo o feagai ma le Ofisa o Faiga Palota e taumafai lava e uunai le galuega. O lena foi e i ai le pitolaau a outou Afioga i sui usufono aemaise o tatou Komiti e pei ona saunoa foi le Afioga i le Fofoga Fetalai, o lea foi e faaali mai lo outou finagalo, ia o le fetalai lea o a tatou mataupu.

Ae ou te toe fia tata mai lava i le tatou Tulafono Toe Teuteu pei ona sa saunoa foi i ai sui usufono mamalu o le Palemene, e pei o le tele lava o vaega sa saunoa i ai o tuaoi o itumalo o itumalo fou nei tu taulaga, e i ai ma nai isi mataupu laiti o toe Teuteuga o lea sa fia malamalama atili ai.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Ae ona o lenei felafolafoaiga o lo o fai i luga o itu lautele o le Tulafono, pei e aoga lava lau Afioga i le Fofoga Fetalai ona ou toe foi i tua i le faamatalaga na ou faia i le aumaiga o le tatou Tulafono lea i le tausaga ua mavae, lea na ou faapea atu ai, e lua lava ia ni suiga ogaoga o lo o autu i ai le galuega tapenapena a le Ofisa o Faiga Palota mo lenei foi Palota o lo o loma. O le tulaga lea, ia faatulai mai loa le tasi o le Lola e palota uma ai ia tagata Samoa, ua le toe lua a tatou Lola e pei ona i ai, o le Lola o Itumalo Faaalaalafaga po o Lola o le palota i lalo o pulega faamatai, ia ma le Lola o le Palota Taitoatasi. O le suiga la lea e aumai i le tatou Teuteuga lea e faagasolo, ina ia tasi lava ia le tatou Lola ua le toe i ai ia le Lola o Palota Tutoatasi. Ia mai le vasega lava lea o le.....pei e soosoo lava ia mataupu ia o le Lola lava lea e tasi, lea ua faaopoopo ai tatou itumalo tu taulaga lea e i ai ona nofoa e lua, suiga muamua lena autu.

O le suiga lona lua autu, o a tatou itumalo o lea e tailua ia nofoa, ia o lea ua toe fai i ai le suiga, ina ia vaevaeina ai na itumalo ma oo ai e tai tasi lava palota, e tai tasi foi le palota a le tagata e fai mo le sui e toatasi, ma atonu e mafai ona foia ai le tele o faaaitaui sa mafai ona tulai mai i le tele foi o isi a tatou Faiga Palota ua mavae i le tulaga lea o itumalo e lua a latou sui.

Lau Afioga i le Fofoga Fetalai, pe lelei lava lou faamulimuli i le tatou mataupu autu o tuaoi o tatou itumalo, ae tau ina ou tali atu i nisi o mataupu sa laga mai e o tatou sui usufono. Ou te manatu ou te le toe tali atu i le 6 masina ma le 3 tausaga, ona o lea sa ou tulai atu i le taimi sa saunoa mai ai sui usufono ma faamalamalama ma faasao atu ia le faauigaina, ae tau ina faapuupuu atu faapea, o le manaoga lava ia o le 3 tausaga, e faapena foi mo sui tauva mo tatou palota tu taulaga.

O le isi mataupu sa laga mai, o le tulaga lea o mataupu e ave i luma o Tulafono mataupu faa-Palota, lea sa saunoa mai ai se tasi o sui usufono e faapea, pe ua le mafai ona toe talosaga appeal le faaiuga a le Faamasinoga o Faiga Palota. Ae tau lava ina ou faamanatu atu i lau Afioga i le Fofoga Fetalai ma le mamalu o le Maota, o le tulaga lava lena ua leva ona tatou sau ai, so o se faaiuga lava e fai i se mataupu tau palota, e leai sona appeal, ma ou te faamanino atili atu e faapea, e tusa ma le 20 tausaga talu ai, na fai ai le faaiuga a le tatou Faamasinoga o Toe Talosaga po o le Faamasinoga o Appeals, e le apiliina faaiuga fai i mataupu tau palota, ona o le tulaga lea e vave manaomia, e tele lava isi tulaga a o lea lava e tatou te malamalama e manaomia lava le vave maua o le faaiuga i se tofi e tulai mai i lea itumalo ma lea itumalo. Atonu pei o lea ua lagalaga ona o lea ua fai o se tasi o tatou suiga ia e fai i le tatou Tulafono Toe Teuteu lenei, o lea e faasino faapitoa i mataupu e laga ae le i faia le palota, ma o le mataupu lena o lea e lui ai le agavaa o se sui usufono, a o le tulaga lava ia o le faaiuga a le Faamasinoga o mataupu tau palota, ua leva lava ona tatou sau ai, e leai se appeal e faia i faaiuga ia. Ou te faamalamalama atu ai faapea mo le tatou Maota.

FOFOGA FETALAI: Malie lau Afioga i le Minisita, se i toe tuu atu le avanoa i le Afioga i le sui usufono mamalu.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

Tofa Levaopolo Talatonu: Lau Afioga i le Fofoga Fetalai, faafetai atu i lau Afioga i le Tamaitai Minisita mo le faamalamalamaina o lea vaega, e leai e le i ai se tulaga, e pau lava le mea sa avatu ai se agaga i le vaega lea o le Tulafono, ina ia toe tagai i ai, aua o lea ua e saunoa mai nei ua 20 tausaga o taatia ai lava faapea le vaega lea o le Tulafono o le Ofisa Palota. Ae o le agaga na avatu ai analeila, e le o talafeagai e tusa ai ma Tulafono ma le Faavae o le Malo o Samoa i le aumaiga lea o le aiatatau e toe faatino ai se tulaga apili. A ou tilotilo atu nei lau Afioga i le Fofoga Fetalai i le faa-Peretaniaina o le vaega lea e ese le malosi o le fuaiupu e pei e le o se Tulafono lea mea, o le a ou tago e lau atu lau Afioga i le faa-Peretania, ðAn order made under subsection i le (9) lea na ou fai atu ai, is final and is not subject to any review or appeal.ö E ese le malosi o lea ituaiga faaupuga.....

FOFOGA FETALAI: Ia o lea ua maua atu le finagalo o le sui usufono, se i tuu atu le avanoa i le Afioga i le Minisita.

Afioga Hon FIAME NAOMI MATAAFA: Ia lau Afioga i le Fofoga Fetalai, pei o lea sa tatou i le mea o lo o i ai malosiaga eseese. O le Faamasinoga Toe Talosaga po o Faamasinoga Apili, o le Faamasinoga aupito maualuga lea o lea o lo o i ai i le tatou Faigamalo, ma ua fai i ai ia le Faaiuga a le Faamasinoga lea i mataupu tau palota, e le taofia lau Afioga i le sui usufono pe a faapea e te manaomia le lui o le tulaga lea faale-Tulafono, a o lea ou te faamalamalama atu i lau Afioga, e le o se mea fou lea, o le mea lava ua leva ona tatou omai ai, aua o le isi itu foi lea sa popole i ai le tatou Komiti sa iloiloaina le tatou Tulafono lea na mananao e fai ai lava se Tribunal faapitoa, a, o le isi vaega sa silasila i ai, ia vave, vave maua le tali, a o le tali lea na aumai, pe Tribunal e oo lava i le Faamasinoga, ona o le pule o le Tulafono o le Faamasinoga. Ma o le itu la lea e lagalaga mai e lau Afioga i le sui usufono, ia atonu o lou pule faitalia lena, a o le Tulafono lava ia o lea ua ou faamalamalama atua, na ala ona toe faaali mai i le mataupu lenei o le Tulafono Toe Teuteu ona o lea ua tatou toe tilotilo i faamasinoga i luma mai o le Faiga Palota, a o le tele lava o tatou mataupu e ave i le Faamasinoga e i tua atu o le Faiga Palota, tusa o lea e luā le faaiuga a le Palota, a o luma mai o le Palota o lea lava e fai le luā i le va o sui tauva ia iloa e le isi sui tauva pe agavaa le isi tagata lea e alu. Lau Afioga i le Fofoga Fetalai, atonu o le itu lena e faamalamalama ai le mataupu sa laga e le sui usufono.

Lau Afioga i le Fofoga Fetalai, ou te manatu foi ona o lea ua i ai le agaga e faasolo atu le Tulafono Tau Faaofi lenei i le tatou Komiti, tau ia ina fai atu sina au faamatalaga e tusa ai o le suiga ua faataatia nei i luga o le Laulau a Fono., e tusa ma tuaoi o o tatou Itumalo, o le agaga lava ia lea ou te maua atu, o lo tele lo tatou finauga i le lautele, ia aafia uma Itumalo faa-alaalafaga o Vaimauga ma Faleata, Vaimauga Sasae, Vaimauga Sisifo, Faleata Sasae ma Faleata Sisifo, ae peitai o le tatou Tulafono Tau Faaofi Toe Teuteu lea ua toe tuuina atu, lea o lo o tuutuu mai totonu ia Faleata Sasae ma le Vaimauga Sisifo.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

O le toe silasila o le Kapeneta i le tuaoi lenei, o le agaga lava ia muamua, o se suiga fou lea o le a tatou agai atu i ai i le faatulaga mai o ni Nofoa tu taulaga po o urban seats. E fia tuliloa lava le uiga o le upu lea urban, o lea foi o lo o taua mai nisi o saunoaga, o lo o i ai le faauigaina po o le Matagaluega o le Siosiomaga ma Punaoa Faanatura, o lo o i ai se definition a le Ofisa o Faamaumauga po o le Statistics. E le taumate e ao foi ona tilotilo foi le LTA pe tatau foi ona i ai sana vaaiga e tusa ai ma ana galuega po o fea le mea e tau o le tutaulaga, a o fea le mea e tau o alaalfaga ma nuu i tua. O se tasi lena o mafuaaga ua toe tuutuu mai ai totonu tuaoi nei, o lo o tietie i luga o tuaoi faa-Itumalo, faa-alaalfaga. E pei foi ona ou faamalamalamaina atu e mafua lea ona o le faiga o a tatou tuaoi o lo o taatia ai nei i lalo o le Tulafono o Itumalo 1963, o i ina o lo o faatulaga mai ai tuaoi o Itumalo uma lava. Atonu ona o lea ua outou silasila i le Tulafono Tau Faaofi o Faiga palota, ae ese lava le Tulafono o a tatou Itumalo faa-alaalfaga lea o lo o vaevae ai lo tatou atunuu. O lea lava la ua toe fua ai lava tuaoi o lo o faataatia atu mo o tatou Itumalo tu taulaga i luga o le Itumalo faa-alaalfaga o Vaimauga Sisifo ma Faleata Sasae.

Lau Afioga i le Fofoga Fetalai, a tuu lautele atu i tua pe a faapea e tatala atu i Vaimauga Sasae ma Faleata Sisifo, e ono mafai loa ona tatou faapea e faatusatusa ua tasi le Nofoa lea tu taulaga, tasi le urban seat a ua lua Itumalo faa-alaalfaga o lo o tietie ai luga. O lona uiga ua tele le tuaoi o a tatou itumalo fou, a o le agaga lava ona o le mea amata ua taumafai ai e tuutuu mai totonu le tatou galuega ma tau faamaopoopo ai. E ao foi ona manatua e lau Afioga i le Fofoga Fetalai ma le mamalu o le Palemene, e le gata ia i latou o lo o alaala i totonu o nei Itumalo ua faatulaga atu ona tuaoi, ae aua foi nei galo ia tatou o lo o i ai totonu o le aiaiga o le Tulafono Tau Faaofi lea na tatou pasia talu ai, o i latou uma o i luga o le lola tuai o Palota Taitoatasi, e mafai mo le palota o lo o loma nei o le 2016 pe a tatou aulia, e mafai ona aumai tagata palota na i totonu o Itumalo tu taulaga nei e lua, ina ia faafaigofie ai le soloaiga o le fesuiaiga ua tatou oo atu i ai po o le aveese atu o le tatou lola o tagata Palota Taitoatsi.

Lau Afioga i le Fofoga Fetalai, e le gata o le Itumalo o Vaimauga Sisifo ma Faleata Sasae, o lea o lo o saunoa mai foi isi Itumalo i aafiaga o latou i le suiga lea. Ae afai lava tatou te tilotilo i le mea e tau o le taulaga, o lea foi ua saunoa mai sui usufono o Savaii, aua o le taulaga lava a tatou talanoa pei o Apia, a o le mea moni lava ua tupu lava fuainumera i totonu o le Vaimauga ma Faleata ma faasolo atu i le Itumalo o Sagaga le Falefa ma le alu atu a lea e oo atu i le Malae Vaalele, ua tatou iloa o le auala lea e pei o le corridor lea ua amata ona atagia mai ai le atinae i totonu o le tatou atunuu, a o tatou lava e tau fuafua atu i le mea amata ae tuutuu atu lava i tua i le lava o le tamaoiga e faasoa atu ai a tatou fuafuaga fai.

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E i ai le mataupu lea na o lou faaali atu foi aua o lea o le a tatou oo atu i le Komiti ma talanoaina, o le mataupu lea ua leva ona tatou talanoa mai na mafua ai ona tailua sui usufono o Itumalo nei, ona o le a? Ona ua tupu le fuainumera. E faapitoa nisi o lui mo nuu nei Itumalo tu taulaga ona o le tulaga o fanua umia saoloto lea ua omai i ai lo tatou atunuu ma tumutumu ai nei Itumalo mavae, ona oo loa lea o le tulaga faapea ua omai isi tagata fai le faaiuga o le Palota lea. E ese le tele o vaega eseese e fua i ai la tatou vaaiga po o fea le mea lea e agai i ai le tatou Faiga Palota. Aua o le faavae lava ia e faavae i le faa-Matai, lea na tatou talosaga ai Malo Aafaatasi ina ia faavae a tatou Faiga Palota i luga o le faa-Matai. Ua oo foi i le faa-Matai ua tatou finau ai, na tatou finau i le tatou Fono talu ai i le vaevaeina o Safata. O lea foi o lo o i ai lea tulaga o le faatupulaia o le fuainumera, o lona uiga i lau vaai atu i ai i le faagasologa o gaoioiga ma suiga o Faiga Palota, e pei o lea tatou te fua po o fea le mea o taatia ai nei Samoa. O fea lona Faavae lea e i ai nei? Po o tumau pea le faavae i luga o le faavae faa-Matai i le pule a nuu ma afioaga? Po o lea o le a tatou tilotilo po o le a le fuainumera. Ou te manatu lau Afioga i le Fofoga Fetalai, ina nei te i ua tatala atu tele i tua, a o mea lava nei e faasolo i ai ma fai fuafua mai lea taimi i lea taimi a tatou faaiuga fai, ae mo lenei vaitau aemaise mo le fesuiaga lea o le tasi o le tatou lola mai le lua sa i ai. O lona uiga ua faamuta loa le lola o tagata o le au palota taitoatasi, o se mea fou, se i o tatou mataitu pe faapefea ea lea faiga ua tatou i ai, ae po o le a le mea e fai agai tagata ua nonofo i luga o fanua umia saoloto. E oo lava i ai le pule a alii ma faipule i le fanua umia saoloto o le tagata. O fesili ia tatou te mafaufau i ai ma fuafua i ai a tatou faaiuga fai.

Lau Afioga i le Fofoga Fetalai, ina nei te i ua umi naua se faamatalaga ae atonu e toe maua foi le isi avanoa pea toe foi mai le Tulafono Tau Faaofi i le maea ai o le iloiloga a le Komiti. Ona pau lava le mea ou te toe talosaga atu ai aua o lau Afioga i le Fofoga Fetalai e faia le faatonuga o le faagasologa o a tatou galuega, out e tatalo atu faamolemole e manaomia le toe foi mai o le tatou Tulafono Tau Faaofi i le tatou Fonotaga i le masina fou ia Me.

O lona lua o le talosaga, o lo o taatia pea le Teuteuga o le Tulafono o le Faavae o lo o aiaia ai ni mataupu se tolu, o le tofiga o Lana Afioga Mamalu O le Ao o le Malo, o le Fofoga Fetalai, ma lona tolu o lo o i ai le suiga e faatatau i le faamutaina o le Lola palota o le au Palota Taitoatasi, e tataua lava ona foi mai ona e moomia mo le faagasologa o le tatou Tulafono Tau Faaofi o Faiga Palota. O le talosaga lea ma le faaaloalo i lau Afioga i le Fofoga Fetalai, ia manuia tele le Fonotaga o lenei afiafi.

FOFOGA FETALAI: Malo faafetai saunoa i lau Afioga i le Tamaitai Minisita, ou te talitonu foi ua taunuu i le taunuuga le soalaupuleina o lenei mataupu talu mai le taeao analeila. E manatu e le toe faasiliina se isi upu e avatu, ae le tuumamaina foi ona o lea ua tulei le Palemia.

21 APERILA 2015

**Tulafono Tau Faaofi o Teuteuga o le Tulafono o Faiga Palota
(Nu.2) 2015 – faitauga faalua**

E le gata i lea o lea ua toe saunoa faamalamalama lau Afioga i le Minisita e ala i tuleiga ma saunoaga aemaise foi o tuualalo ua afua ai ona toe liliu ala o le lupe i lenei po, ua to le matupalapala o le tatou Palemene, tatou te toe foi i tulaga masani ona o le tele o saunoaga i le taeao analeila. Tasi ia ae foi le saunoaga a lau Afioga i le Tamaitai Minisita ona e manatu e le mama ia te au nei o le Fofoga Fetalai, silasila foi ua matua tele le aafiaga o a tatou Komiti Faa-Palemene aemaise lava le Komiti lea e i ai Au nei o le Taitaifono, Sui Taitaifono le Sui Fofoga Fetalai, sui usufono o le Afioga i le Palemia, Taitai o le Itu Agai ma le sui usufono mo Faleata Sisifo. O lo o i lalo o a tatou Tulafono Tumau, e le o se mea na fai e se isi, ua uma ona fausia ia tatou Tulafono Tumau, o le Komiti lenei o le Komiti o Galuega, Tulafono Tumau, Maota Fono ma Mataupu Tau Faiga Palota.

Ae peitai ane o le tele o atugaluga ma le nunumi sa i le tatou va feagai ai ma lau Afioga i le Minisita, ua manatu ai, ua le mafai ona feminoiai au nei o le Taitaifono aemaise o le Afioga i le Palemia ona o aafiaga nei. O le Afioga i le Palemia o le Taitai o le Kapeneta o le Taitai foi lea o le Malo, ou te nofo atu i luga i inei e tau faatonutonu folau la tatou Fono ao au o le Taitaifono o le Komiti, e le faigofie i lou lagona ma lou manatu faaletagata ona tausisi i lou tutoatasi i mea uma o lo o taumafai atu nei. Ou te le toe fia asa i le ogasami ua uma ona asa, o lea foi na e saunoa e ala i le tatou fetuunaiga, e sefulu masina o feagai lenei Komiti ma le lauiluina o le Tulafono Tau Faaofi na sei maea atu nei foi, e lei faigofie le galuega, e agai i Savaii, omai i inei fai le Tulafono Tau Faaofi ma avatu, ae tasi lava le auga sa i ai le naunautaiga o le Komiti, ia tatou consolidate, e i ai le taimi tatou te soalaupule ai, aumai avat , avatu se finagalo ma ni aiaiga na mafua ai ona matou tatalo atu e fia maua se feiloaiga. Peitai, ou te le fia tautalagia leaga ua tea Apolima, ua tea foi le vainuu sa tatou soalaupule, ua pasi le Tulafono Tau Faaofi.

I lenei afaifi, o lea ua toe tefa le tauala i le Palemia ma le Kapeneta, o lea ua manatu ai, o le a le toe see le mataupu lenei i le Komiti sa matou lauiluina e tusa ai ma Tulafono Tumau, ae o le a faasee atu i le isi Komiti ina ia atagia ai pea le tutoatasi o faaiuga, e le gata i le aafiaga o le Palemia, a o au nei o le Taitai o le Palemene i le isi Komiti latou te lauiluina. Ia, e tasi ia ae foi saunoaga i le tulaga, o lea ua saunoa manino le Palemia i le tatou Pulega faatauagai, o lea ua lafo mai le finagalo o le Palemia, lafo lea i le Palemene, o le tasi foi lena pule e faaauaina galuega e lauiluina Tulafono. A maea ona aumai lea o le latou fautuaga i totonu o le Maota, e pei ona tatou soalaupuleina. O le tatalo foi lena lau Afioga i le Tamaitai Minisita, malie lou finagalo faavagavaga lou taimi e soalaupule lelei ma le tou Komiti po o ai le o le a tauavea.

E avea foi lenei avanoa e tatalo atu ai, o lea e faafofoga mai le tatou atunuu sui usufono mamalu uma o le tatou Maota lenei, o e o fia fai ni finagalo i le Tulafono Tau Faaofi lenei, o le taimi lenei tou te afifio mai ai e fai ni o outou finagalo.

21 APERILA 2015

**Tulafono Tau Faaofi o Teuteuga o le Tulafono o Kamupani
Faava o Malo 2015 – faitauga faalua**

O lea ua toe manatu le Malo e toe faasee laitiiti i tua ae fai le lauiluina o lenei mataupu, ia agai laia o le tatou Komiti e faasosolo ai le galuega ina ia taoto i lagatonu, aumai le faaiuga ua aumai ma le fautuaga ona fai loa lea o le tatou faaiuga a ua fai se ai o le afiafi lenei e ala i le soalaupuleina o le tatou mataupu.

O lau tatalo lea i lau Afioga i le Tamaitai Minisita ia aua ne i toe tulai mai le mea na tatou feteenai ai foi ma tatou fetusia ai foi ma matou taumafai atu, ae paga lea, e le o lea. O lenei la afiafi, o lea ua taunuu i taotoga lelei, o a fausaga o lenei afiafi, tatou tuli le agai i le lumanai, o le faataatiaga lena o lea ua manatu ai, malilie foi le tatou Komiti o Faiga Palota ua fai le faaiuga, o le a sui le Komiti e ave i ai le mataupu lenei, e oo foi i le tatou mataupu o le Faavae, o lea foi ua talosaga le Palemia, malie le tatou Komiti, o le a faasee ese ona o le tulaga ua atagia ai le saisaiina o lauulu o Taemanutavae i le ma va faafeagai ai ma le Palemia, aemaise o au nei o le Taitai o le Palemene.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu.2) 2015 i lona faitauga faalua.

FOFOGA FETALAI: E tusa ai ma le Tulafono Tumau 1A(1) o le a tuuina atu le Tulafono Tau Faaofi lenei o Teuteuga o le Tulafono o Faiga Palota (Nu.2) 2015 i le Komiti o Oloa Gaosia Tulaga Muamua mo le iloiloga ma toe Lipoti mai i le Fono Aoa o ia aua ne i silia le aso 26 Me 2015. Ou te talosagaina foi ma faatonuina le tatou Komiti mamalu ia outou alofagia le talosaga a le Palemene. E tatalo atu ma le agaga faaaloalo e le i soona filifilia le tatou Komiti lenei, ona e manatu o se tasi lenei Komiti e sili ona vave le gaoioi atoa ai ma le atoatoa o a outou Lipoti e tuuina mai i totonu o le tatou Maota, ua tatalo atu ai ma le agaga faaaloalo ia outou alofagia lenei Tulafono Tau Faaofi, atoa ai foi ma le Tulafono Tau Faaofi o le Teuteuga o le Faavae.

Mo le silafia e le tatou Maota, o le tatou Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa, e Taitaifono le Afioga ia Leaupepe Toleafoa Apulu Faafisi, Sui Taitaifono le Afioga Maualaivao Pat Ah Him, sui usufono le Afioga Afualo Wood Salele, sui usufono le Afioga Hon Aeau Peniamina Leavaiseeta, sui usufono le Tofa Aveau Tuala Lepale Niko Palamo ma le Tofa Faimalotoa Kika Iemaima Stowers.

Ia, o le faasilasilaga lena ina ia mautinoa lelei le faasologa o le tatou galuega aua le toe taunuu mai i le tatou Fonotaga ia Me. Ma le faaaloalo lava.

**TULAFONO TAU FAAOFI O TEUTEUGA O LE TULAFONO O
KAMUPANI FAAVA O MALO 2015 – faitauga faalua**

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati, ma ua maea foi ona sainia e Lana Afioga i le Sui o le Fono a Sui Tofia, o lea o le a sagai atu loa mo le faitauga faalua o le Tulafono Tau Faaofi.

21 APERILA 2015

**Tulafono Tau Faaofi o Teuteuga o le Tulafono o Kamupani
Faava o Malo 2015 – faitauga faalua**

Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Kamupani Faava o Malo 2015 i lona faitauga faalua, ma ou te fia tautala faamalamalama i ai.*

Faaluaina e le Minisita mo Galuega tau Alamanuia ma Atinae a le Malo.

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le Tulafono Tau Faaofi leni o lo o fuafua ina ia toe teuteu ai le Tulafono o Kamupani Faava o Malo 1988 ina ia agai tonu lava i le tagofia o mataupu ua laga i lalo o Lipoti a Faalapotopotoga foi nei o atunuu e malolosi lo latou tamaoiga po o OECD. Sa faia se latou sailiiliga i le masina o Setema 2012 ma taunuu ai i nisi o fautuaga, ma o le Tulafono atoa lava la e agai tonu lava i vaega e tolu, o le aveesea ia aua nei toe faaogaina mea o sea ia e tau o bearer shares i totonu o Kamupani nei Faava o Malo.

O le vaega lua, o le tulaga foi lea ina ia faatumauina se tulaga e pulea faamatalaga uma lava tau tausitusi, faamatalaga tau tupe ina ia teumau mo le fitu tausaga atoa ai ma isi teuteuga e afua i teuteuga pei ona ou taua i tulaga lava ia o Kamupani Faava o Malo e aofia ai ma partnerships. Lau Afioga i le Fofoga Fetalai, mo le silafia e le tatou atunuu, o le isi lea atunuu o lo o i ai ana pisinisi nei kamupani faava o Malo, kamupani ia e le tau omai iinei, na o le pau lava le mea o le resitala, totogi le latou laisene ae nofonofo lava latou i fafo. E pei o ituaiga auala ia e suetupe ai atunuu e aofia ai la ma Samoa. O lo o agai foi la i ai le tele o Malo nei malolosi, ona o le tele o pisinisi e resitala mai ituaiga kamupani nei e i ai tatou kamupani, o pisinisi e afua mai Malo tetele nei. O lea latou te fia faamautinoa ai faamatalaga nei tau tupe ia tamau lelei ma taofiofia, a oo ina fia iloa e latou le tulaga sao o kamupani, e mafai ona latou iloa ai aemaise lava le itu tau tupe maua e maua mai ai. E feoloolo lava nai a tatou seleni o lo o maua ma ii a tatou faiga pisinisi nei. O le tele lava o taimi e silia i le \$20miliona i le tausaga po o le \$30miliona i le tausaga pe a feoloolo ni pisinisi e resitala mai iinei. O le tulaga maoae o le tatou atinae leni, ona o le vave o a latou gaoioiga tatou te le talia foi ni kamupani e maua mai ni suesuega e fai si questionable. O lona uiga e i ai ni o latou piitaga i ni auala e maua ai ni a latou tupe i ni auala e le manuia.

21 APERILA 2015

**Tulafono Tau Faaofi o Teuteuga o le Tulafono o Kamupani
Faava o Malo 2015 – faitauga faalua**

O le ala foi la lena ina ua faatu le tatou kamupani, sa tatou faaogaina ai faamatalaga i mea o lo o faia foi e isi pisinisi faapenei ma tatou le faaogaina ai nisi o a latou metotia o lo o latou faaogaina. O le tatou pisinisi la lea o kamupani faava o Malo ua lauiloa i fonotaga, aua e auai lava a tatou Pulega i le tele o fonotaga e fai i fafo faatatau lava mo aiaiga e tatau ona fai ina ia see ese mai tulaga o le faaogaina o tupe eleelea e maua mai i gaioioiga e le talafeagai.

O le mafuaaga la lena lau Afioga i le Fofoga Fetalai na mafua ai ona teuteu ma saga teuteu a tatou Tulafono ina ia ogatasi ma aiaiga faava o Malo o lo o faataoto mai e Faalapotopotoga nei e aloaia lelei ai le tatou foi faiga pisinisi. Ma o le mafuaaga lena o lea e fautua ai ina ia ogatasi ma aiaiga o lo o fai i ituaiga pisinisi faapenei faava o Malo le faatauaina o nai aiaiga pupuu ia ua aumai, aemaise lava le tulaga o le teuina mau o faamatalaga mo le fitu tausaga o auala na maua ai tupe ma faaalu ai tupe a lea kamupani ma lea kamupani.

Lau Afioga i le Fofoga Fetalai, o le faamatalaga puupuu lena o le Tulafono Tau Faaofi, ia manatua e le Maota lenei, e tele lava teuteuga faapenei e aumai, e aumai ona o le tatou galulue faatasi ma i latou foi atamamai i nei ituaiga pisinisi. A le vave ona suia a tatou Tulafono ina ia faatumau ai pea le tulaga taualoa i faiga pisinisi, aua e tele lava le tauvaga o lo o fai. O lea tatou te tauva ma isi foi pisinisi o lo o fai a latou faiga faapenei. Afai la e vave le tatou gaioioi e teuteu ai le tatou Tulafono ina ia ogatasi ma aiaiga nei faava o Malo, standards, OECD standards, ona vave foi lea ona gauai mai le tele o Malo nei ma pisinisi nei e faaoga e teu faafaigaluega a latou tupe i Samoa nei.

Pe a manatua o le igoa o le tatou kamupani lea e faagaioioia le pisinisi lea, e faaigoa o le SIFA. Ma o le SIFA lea o lo o fai ma puluvaga i tatou sailigatupe a le Manu Samoa ma isi faalapotopotoga e fia o i fafo e pei foi o le Liki, ae tuai ona sau mea a papalagi, ona sulufai lea i le faalapotopotoga lea e maua mai ai nai a latou seleni, e faatupe ai a latou Malaga i fafo ma le tele lava o sailigatupe o fai nei, pei o lea e fai lava ma laveai mai le Faalapotopotoga lea, o le mafuaaga na ala ai ona faatu foi i totonu o Samoa, e lavelavetu mai i le tele o manao i faalapotopotoga eseese a le tatou atunuu, aemaise lava taaloga.

FOFOGA FETALAI: Faamalo saunao i lau Afioga i le Minisita po o lau Afioga foi i le Palemia e a ia le Tulafono Tau Faaofi. E manatu foi na matua manino lelei le faafofogaaga a le tatou Maota e ala i le de-briefing i le Aso Gafua, na matua faaali manino ai e le Afioga i le Tamaitai Pule le taua ia aua ne i misi tatou ma le tai, aua o le tele o nei Tulafono ua faataatia mai o Tulafono e limataitaiina i isi atunuu na mua i malae i faalagamaea i mea tau financial institutions i totonu o le lalolagi, ma e taua le faamanatu na aumai, o le mafuaaga foi lena na ala ai ona faatuina lenei Tulafono Tau Faaofi. Ma e manatu e leai se isi o fia saunao.

21 APERILA 2015

**Tulafono Tau Faaofi o Teuteuga o le Tulafono o le Faafoga o Kasino
ma Taaloga Eseese Tau Tupe 2015 – iloiloga auiliili**

Na faamaonia le lafo ma faitauina le Tulafono Tau Faaofi o Teuteuga o le Tulafono o Kamupani Faava o Malo 2015 i lona faitauga faalua.

**TULAFONO TAU FAAOFI O TEUTEUGA O LE TULAFONO O LE
FAAFOEGA O KASINO MA TAALOGA ESEESE TAU TUPE 2015
– iloiloga auiliili**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati, ua maea foi ona sainia e Lana Afioga Mamalu i le Sui o le Fono a Sui Tofia, o lea o le a sagai atu loa mo le iloiloga o le Tulafono Tau Faaofi.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Ua teuteuina le Fuaiupu 2.

Faamaonia.

FUAIUPU 3: Ua teuteuina le Fuaiupu 23.

Faamaonia.

FUAIUPU 4: Ua faaopoopoina le Fuaiupu 88A Fou.

Faamaonia.

FUAIUPU 5: Ua teuteuina le Fuaiupu 92.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Faafoga o Kasino ma Taaloga Eseese Tau Tupe 2015.

Faamaonia.

21 APERILA 2015

Tulafono Tau Faaofi o Teuteuga o le Tulafono o Kamupani Faava o Malo 2015 – iloiloga auiliili

Na faagasolo le Tulafono Tau Faaofi o Teuteuga o le Tulafono o le Faafoega o Kasino ma Taaloga Eeseese Tau Tupe 2015 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O KAMUPANI FAAVA O MALO 2015 – iloiloga auiliili

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati ua maea foi ona sainia e Lana Afioga i le Sui o le Fono a Sui Tofia, o lea o le a sagai atu loa mo le iloiloga auiliili o le Tulafono Tau Faaofi.

E tusa ai ma le Tulafono Tumau 102, e amata le iloiloga auiliili i le Fuaiupu 2.

FUAIUPU 2: Ua teuteuina le Fuaiupu 39 ma le 39A.

Faamaonia.

FUAIUPU 3: Ua teuteuina le Fuaiupu 113.

Faamaonia.

FUAIUPU 4: Teuteuga faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Kamupani Faava o Malo 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Kamupani Faava o Malo 2015 e aunoa ma se Teuteuga.

21 APERILA 2015

**TULAFONO TAU FAAOFI O TEUTEUGA O LE TULAFONO O LE
FAAFOEGA O KASINO MA TAALOGA ESEESE TAU TUPE 2015
– faitauga faatolu**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati, ua maea foi ona sainia e Lana Afioga i le Sui o le Fono a Sui Tofia, o le a sagai atu loa le Fono Aoa mo le faitauga faatolu o le Tulafono Tau Faaofi.

Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe 2015 i lona faitauga faatolu.*

Faaluaina e le sui usufono mo Aleipata Itupa i Lalo, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

**TULAFONO TAU FAAOFI O TEUTEUGA O LE TULAFONO O
KAMUPANI FAAVA O MALO 2015 – faitauga faatolu**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga i le Sui o le Fono a Sui Tofia, o le a sagai atu loa le Fono Aoa mo le faitauga faatolu o le Tulafono Tau Faaofi.

Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai out e tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Kamupani Faava o Malo 2015 i lona faitauga faatolu.*

Faaluaina e le Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

FOFOGA FETALAI: Ou te manatu o lea ua maea Galuega o le Aso Tau le Malo, o lea ua oo atu i galuega a Komiti Filifilia, ona ou manatu lea o le a vavae foe.

21 APERILA 2015

P.P. 2014/2015 Nu. 215, Lipoti a le Komiti o Tupe Maua ma Tupe Totogi i le P.P. 2014/2015 Nu. 151, Lipoti Faaletausaga a le Kamupani Vaalele a le Polenisia mo le Tausaga Faaletupe 2013/2014 – Iloiloga

O le a faia se tatou malologa puupuu, tatou vave malolo aua o le a tatou agai atu i le isi faalatele o le tatou galuega, ae vavae ai i foe, o lea ua maea le tulaga tau Tulafono Tau Faaofi, o lea ua maea pasia Tulafono Tau Faaofi Faanatinati ma isi tulaga, ona tatou toe foi mai lea ma tatou agai i Lipoti a Komiti Filifilia, e fai foi sina umi o lena galuega a ua ou vaai atu ua tau le lagona le ioe, o lona uiga ua tataua ona tatou o e fai se faasiliga malosi ona tatou toe foi mai ai lea.

E faasilasila atu o le a faataatia ese Taulumaga a le Fono Aoa mo lana malologa masani o le afiafi.

Na faataatiaese Taulumaga a le Fono Aoa mo lana malologa masani i le itula e 8:26 i le po ma toe amatalia i le itula e 9:05 i le po.

FOFOGA FETALAI: O lea ua outou faafofoga i le malosi o le agai o le Maota, ua maua le faasiliga malosi o le afiafi ma ua matauina ua tau i alo le taliga o le sua, malo le onosai, o lea ua tatou taunuu i le afa mulimuli o le tatou galuega i lena afiafi.

E faia le tatou malologa ua tatou taunuu i Galuega i le Iloiloga o Lipoti a Komiti Filifilia.

ILOILOGA O LIPOTI A KOMITI FILIFILIA

P.P. 2014/2015 NU. 215, LIPOTI A LE KOMITI O TUPE MAUA MA TUPE TOTOGI I LE P.P. 2014/2015 NU. 151, LIPOTI FAALETAUSAGA A LE KAMUPANI VAALELE A LE POLENISIA MO LE TAUSAGA FAALETUPE 2013/2014 – Iloiloga

FOFOGA FETALAI: Tulai mai le Taitaifono o le Komiti o Tupe Maua ma Tupe Totogi.

Afioga Hon PAPALHITELE NIKO LEE HANG: Faafetai atu i lau Afioga i le Fofoga Fetalai mo le avanoa. Ou te talitonu foi ua sao i alo le taliga sua aua se faasiliga malosi o lau Afioga i le Fofoga Fetalai aemaise o le paia o le Palemene i lena po malulu.

A ua ou tulai atu ma le agaga faaaloalo i lau Afioga out e faatu le lafo, *Ina ia faautagia e lena Fono Aoa le Lipoti a le Komiti ana Sailiiliga, Fautuaga ma Iugafono.*

Faaluaina e se tasi o sui usufono mo Faasaleleaga Nu. 1, Afioga Gatoloaifaana Amataga Alesana Gidlow, Sui Fofoga Fetalai ma le sui usufono mo Aleipata Itupa i Lalo.

21 APERILA 2015

P.P. 2014/2015 Nu. 215, Lipoti a le Komiti o Tupe Maua ma Tupe Totogi i le P.P. 2014/2015 Nu. 151, Lipoti Faaletausaga a le Kamupani Vaalele a le Polenisia mo le Tausaga Faaletupe 2013/2014 – Iloiloga

FOFOGA FETALAI: Tulai mai lau Afioga i le Taitaifono mo le faitauina o Fautuaga, Sailiiliga ma Iugafono.

Afioga Hon PAPALHITELE NIKO LEE HANG: Lau Afioga i le Fofoga Fetalai, i le faia i luga o ana Sailiiliga ua fautuaina ai e le Komiti le Malo.

“FAUTUAGA:

I le faia i luga o ana Sailiiliga, e fautuaina e le Komiti le Malo e faapea:

1. Ia faatinoina loa e le Pulega ma le Komiti Faafoe a le Kamupani Vaalele o le Polenisia se tasi o a latou fuafuaga alualu mamao (long term planning), ma faatino feutagaina mo le faafoeina o femalagaina Faava o Malo, aemaise lava i le va o Niu Sila, Ausetalia ma Amerika. E faavae le finagalo o le Komiti i mafuaaga nei:-

➤ Pe ua le alagatau i le taimi nei ona toe silasila le Kamupani o le Polenisia i le toe faatauina/lisi mai o se tatou vaalele mo femalagaina Faava o Malo;

➤ Ua matauina le galulue faa-paaga ai o le Kamupani Vaalele a Niu Sila le Air New Zealand, ma le Kamupani Vaalele a Ausetalia le Virgin Australia lea o lo o faafoeina le Virgin Samoa, ma e avea lea ma mafuaaga e ono taugata ai pasese mo le atunuu ma tagata tafafao maimoa mai fafo.

2. I le faatinoina ai o le Fautuaga ua taua i luga, e matua fautuaina ai e le Komiti le faafoeina o se sailiiliga maeaea (“Feasibility study) ina ia aua nei toe tulai mai tulaga ogaoga sa tulai mai i taimi ua tuana.

3. Ia silasila le Pulega mo le fetuunai ai o faigamalaga o vaalele i le va o Faleolo, Fagalii, Maota ma Asau. E manatu le Komiti e ao lava ona faatino lea auaunaga ma le fuafua lelei ina ia maua ai pea tupe mama.

4. Ia ave le faamuamua a le Kamupani i ana galuega faatino o lo o maua ai ana tupe maua e aofia ai auaunaga i le fogaeleele (ground handling) i Faleolo. E faatauaina tele e le Komiti lenei auaunaga ona o vaega nei:-

i) Ia maua ai pea avanoa faigaluega mo tatou tagata e faatinoina le auaunaga i le fogaeleele i Faleolo;

21 APERILA 2015

P.P. 2014/2015 Nu. 216, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2014/2015 Nu. 120, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2012/2013 - Iloiloga

- ii) Ua i ai nisi kamupani mai fafo ua faatinoina lea auunaga, ae o le naunautaiga a le Komiti, ia toe faafoi mai le faatinoina o nei galuega i le Kamupani Vaalele a le Polenisia.

E manatu le Komiti, o le lelei faatino o nei galuega i le fogaeleele e se kamupani e tasi, o le faatumauina foi lena o le lelei, aemaise ai o le saogalemu o femalagaina e le gata i taimi e tu laueleele ai vaalele tetele i Faleolo, ae faapea foi mo le toe tapenaina o ia vaalele mo le malaga ese atu.

IUGAFONO:

I le maea o ana iloiloga, na faaiugafonoina ai e le Komiti e fautuaina le Fono Aoao,

Ina ia faamaonia le P.P. 2014/2015 Nu. 151, Lipoti Faaletausaga a le Kamupani Vaalele a le Polenisia mo le Tausaga Faaletupe sa faaiuina i le aso 30 Iuni 2014”.

FOFOGA FETALAI: Malo faafetai saunoa faamalamalama i lau Afioga i le Taitaifono, ou te manatu ua manino ma malamalama le folasaga e ala i le galuega sa feagai ma le Komiti ma ua faafofoga foi le Maota i le faitauina o Fautuaga ma Iugafono.

O tatou faiga faavae e tuu atu ai pea le avanoa po o i ai se sui usufono e fia saunoa i le Lipoti a le Komiti a ua manino ma malamalama lelei ae avatu pea le avanoa mo se sui usufono e fia saunoa.

E matauina ua matua atoatoa le Lipoti a le Komiti o Tupe Maua ma Tupe Totogi.

Na faamaonia le Lipoti.

P.P. 2014/2015 NU. 216, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2014/2015 NU. 120, LIPOTI FAALETAUSAGA A LE MATAGALUEGA O FAATOAGA MA FAIGAFIVA MO LE TAUSAGA FAALETUPE 2012/2013 – Iloiloga

FOFOGA FETALAI: Tulai mai lau Afioga i le Taitaifono o le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa.

21 APERILA 2015

P.P. 2014/2015 Nu. 216, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2014/2015 Nu. 120, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2012/2013 - Iloiloga

Afioga Hon LEAUPEPE TOLEAFOA APULU FAAFISI (Taitaifono Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa): Lau Afioga i le Fofoga Fetalai ou te tulai atu e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Siumu, sui usufono mo Gagairomauga Nu. 1 ma le sui usufono mo Sagaga le Falefa.

FOFOGA FETALAI: Tulai mai le Taitaifono.

Afioga Hon LEAUPEPE TOLEAFOA APULU FAAFISI: Lau Afioga i le Fofoga Fetalai,

“IUGAFONO:

E fautuaina e le Komiti le Fono Aoa ina ia faamaonia;

- **P.P. 2014/2015 Nu. 120, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe na faaiuina i le aso 30 Iuni 2013; ma**
- **Fautuaga a le Komiti ua tuuina atu i lalo.**

FAUTUAGA:

E fautuaina e le Komiti le Malo ina ia;

1. Galulue faatasi le Matagaluega o Faatoaga ma le Matagaluega o le Soifua Maloloina mo ni Polokalame Faalauiloa mo le atunuu lautele e foia ai le faaaogaina sese o vailaau e aafia ai o latou soifua.
2. Tatau ona faaleleia masini ma mea faigaluega e faaoga mo le faaasuina o oloa auina atu i fafo a le mamalu o le atunuu, ina ia mautinoa le saogalemu o ia oloa auina atu i fafo. E le gata i lea, e moomia foi le vave fausia o se fale fou mautu, e faatino ai le auaunaga a lea Vaega o le Matagaluega (Quarantine) ona o le le malupuipua o le nofoaga o lo o faatino ai lea auaunaga i le taimi nei i Matautu-tai.
3. Ia faamalosia ma faaleleia le auaunaga tau Fomai Manu ma Vailaau mo manu mo le faatauina atu i le Aufai-Faatoaga aemaise le mamalu o le atunuu. O le taua o lea fuafuaga, ina ia mafai e le Aufai-Lafumanu ona maua lea auaunaga taua.

21 APERILA 2015

P.P. 2014/2015 Nu. 216, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2014/2015 Nu. 120, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2012/2013 - Iloiloga

4. E tatau i le Matagaluega ona faavae se Resitala mo le Aufai Lafumanu mo fesootaiga o galuega a Fomai Manu.
5. Ia galulue faatasi le Matagaluega o Faatoaga ma Faigafaiva ma le Matagaluega o Fuainumera Faamauina, i le faamaumuina o le faitau aofai o lafu manu i totonu o le atunuu”.

Ma le faaaloalo lava faafetai.

FOFOGA FETALAI: Malo faafetai i lau Afioga i le Taitaifono, e matauina o lo o i ai le sui usufono o lo o fia saunoa, tulai mai le sui usufono mo Faleata Sisifo.

Tofa LEALAIPEPULU RIMONI AIAFI: Lau Afioga i le Fofoga Fetalai faafetai mo le avanoa, faafetai foi i lau Afioga i le Taitaifono mo le Lipoti. Faafetai foi i le Afioga i le Minisita ma le Matagaluega i le tulaga o le tatou Matagaluega ua vaaia pea le agaigai i luma i lenei vaiata. Ua taua le fale e faaasu ai a tatou mea ia e fia ave i fafo, e pei ona ou taua sa ou i Ausetalia i le vaiaso ua tea atu, o lea e fia malamalama i lau Afioga i le Minisita i tatou mea ia e ave, aua e oo lava i sea ua faasa i Ausetalia. E le o i ai la se malamalamaaga o lou nei sui usufono aua sa mafai ona ave muamua a o lea ua faasa mai.

O lona lua, o le malaga lea na matou malaga ai ma matou toga, e avatu le certificate foi lea ua saini lelei ai le Matagaluega ua uma ona faaasu lelei toga nei ma ua faamoe lelei i tai i le mea e tatau ona moe ai, ae matou o atu ma le certificate lea e le amanaia e Brisbane. O le fesili lau Afioga i le Minisita, o vaega ia e tatau ona toe tagai i ai faava o Malo aemaise o mea ia ua uma ona faamalieina le Tulafono e pei ona i ai le vaega lea.

O le isi vaega, ua ou matauina i Vaitele i le mea lea ou te nofo ai le faatupulaia o le manu aini. Ua ova i le sefulu tausaga o ou nofo i le mea lea e i ai lou fale, faatoa ou toe vaaia lea ua toe vaaia le manu aini lea sa i ai i aso ia ua silia ma le luasefulu tausaga e le o toe vaaia i ai. Ua matua toe faatupulaia i lenei taimi. A o le laau lea ua pito sili ona aoga tele i lenei vaiata i mea o lo o taumafai i ai le tele o le atinae o le tatou atunuu. O nai fesili na lau Afioga i le tatou Lipoti. Faafetai.

FOFOGA FETALAI: O lea e maitau na pau lea o le sui usufono sa fia saunoa. Tulai mai lau Afioga i le Taitaifono.

Afioga Hon LEAUPEPE TOLEAFOA APULU FAAFISI: Lau Afioga i le Fofoga Fetalai, faafetai mo le avanoa. O finagalo ia o lea e manao le Komiti ina ia aumai i luma a o faafofoga mai le Matagaluega e aoga e luitauina ai le faatinoga o galuega aemaise le va o i tatou ma Malo i fafo.

21 APERILA 2015

P.P. 2014/2015 Nu 217, Lipoti a le Komiti o Faafoga Tau Pulega a le Malo i le P.P. 2014/2015 Nu 124, Lipoti Faaletausaga a le Komisi o Pulea Galuega a le Malo mo le Tausaga Faaletupe 2010/2011 – Iloiloga

A o faafofoga mai foi le Matagaluega ma le Pulega, o le fautuaga lea a le Komiti ua uma foi ona tuualalo, ina ia silasila totoa i ai, ina ia amanaia le itu taua lea e pei ona saunoa i ai le sui usufono. O le tulaga foi i manu ainiu tulou le faafofoga a le atunuu ma le paia o le Fonotaga, o lo o faapena ona galulue i ai le Matagaluega. Ia manatua foi e lei fauina Roma i se aso e tasi. A faga atu Aleipata ae oso le mea i o i Falelatai, ae o lo o galulue i ai. Ae aoga o la e faafofoga mai le Matagaluega, ia se i outou alolofa e vave foia le faafitauli. Ma le faaloalo lava. Faafetai.

FOFOGA FETALAI: Malo. Faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai se Lipoti e tali mai ai i le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P. 2014/2015 NU 217, LIPOTI A LE KOMITI O FAAFOEGA TAU PULEGA A LE MALO I LE P.P. 2014/2015 NU 124, LIPOTI FAALETAUSAGA A LE KOMISI O PULEA GALUEGA A LE MALO MO LE TAUSAGA FAALETUPE 2010/2011 – Iloiloga

FOFOGA FETALAI: Tulai mai lau Afioga i le Taitaifono o le Komiti o Faafoga tau Pulega a le Malo.

Tofa Hon TUUU ANASHI LEOTA: Lau Afioga i le Fofoga Fetalai ua ou tulai atu e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Vaisigano Nu 1, sui usufono mo Palauli le Falefa ma le sui usufono mo Sagaga le Falefa.

FOFOGA FETALAI: Tulai mai le Taitaifono e tolaulau ia Fautuaga ma Iugafono.

Tofa Hon TUUU ANASHI LEOTA: Lau Afioga i le Fofoga Fetalai ou te faitauina atu Fautuaga ma Iugafono e faapea:-

“FAUTUAGA.

I le faia i luga o ana Sailiiliga, e fautuaina ai e le Komiti le Malo.

21 APERILA 2015

P.P. 2014/2015 Nu 217, Lipoti a le Komiti o Faafoga Tau Pulega a le Malo i le P.P. 2014/2015 Nu 124, Lipoti Faaletausaga a le Komisi o Pulea Galuega a le Malo mo le Tausaga Faaletupe 2010/2011 – Iloiloga

1. Ia tofia ma faafaigaluegaina tagata agavaa i tomai faapitoa tau faamaumauga, data entry i totonu o Matagaluega a le Malo, o lo o i lalo o le vaaiga a le Komisi o Tagata Faigaluega a le Malo. Ua fautuaina e le Komiti lenei tulaga ina ia mautinoa ai le vave o le tuufaatasia o faamaumauga tau tagata faigaluega, ma faamauina faatekonolosi i luga o upega tafailagi, online system. E pei ona mataituina e le Komisi. E fautuaina foi e le Komiti lenei vaega mo le silafia ai, e le gata mo tagata faigaluega i totonu o Matagaluega uma a le Malo, ae faapea foi mo le silafia a le atunuu lautele. O lenei foi faiga o le a fesoasoani tele mo le faatelevaveina o le tuufatasia o lipoti faaletausaga a le Komisi.
2. Ia toe iloilo e le Komisi ana faiga faavae e faatatau i tausaga faatapulaaina mo le tautua a tagata faigaluega a le Malo, ina ia tatala pea le avanoa mo le faafaigaluegaina o i latou o lo o i ai agavaa ma tomai faapitoa i isi matata, po o se auaunaga i le atunuu lautele o lo o manaomia tele mo se faamoemoe taua. E manatu le Komiti e ao lava ona ave le faataua a le Malo ma le Komisi o Tagata Faigaluega a le Malo i le mamalu o le atunuu, o lo o i ai pea le malosi ma tomai ma agavaa e faaauau ai lo latou auaunaga mo le manuia o le atunuu lautele.
3. Ia tausisia e le Komisi ana faiga faavae mo le faasalalauina o le avanoa faigaluega o Matagaluega uma a le Malo, ina ia vave ona faatinoina faatalanoaga i Matagaluega taitasi e faatutumuina ia avanoa faigaluega. Ua maituina e le Komiti le tele o Matagaluega e lei faatutumuina avanoa faigaluega ma le faaaogaina ai vaega tupe sa faatatauina mo ia avanoa i totonu i tausaga faaletupe sa fuafua ai totogi mo nei avanoa faigaluega.

IUGAFONO.

I le maea ai o Iloiloga, e fautuaina ai e le Komiti le Fono Aoao e faapea:-

Ina ia faamaonia le P.P.2014/2015 Nu 124 Lipoti faaletausaga a le Komisi a le Malo mo le Tausaga faaletupe na Faaiuina i le aso 30 Iuni 2011.

FOFOGA FETALAI. Malo. Faafetai saunoa i lau Afioga i le Taitaifono. Tulai mai le sui mamalu mo Faleata Sisifo.

21 APERILA 2015

P.P. 2014/2015 Nu 217, Lipoti a le Komiti o Faafoga Tau Pulega a le Malo i le P.P. 2014/2015 Nu 124, Lipoti Faaletausaga a le Komisi o Pulea Galuega a le Malo mo le Tausaga Faaletupe 2010/2011 – Iloiloga

Tofa LEALAILLEPULE RIMONI AIAFI: Faafetai lava i lau Afioga mo le avanoa. Faafetai foi i le Afioga i le Taitaifono mo le lipoti. E le tele se fesili. E pau lava le fesili lau Afioga o lo o taua mai i le tou lipoti i le Aotelega o le lipoti. O lo o avea ma lui tau i le Komisi o Galuega a le Malo, ia le tofiaina o avanoa nei o Pule Sili o Matagaluega ma Pule Lagolago. Nei avea ma luitau ua faafitauli i le taimi nei. O le fesili i lau Afioga. O a tonu lava luitau ma faafitauli ia e tulai mai ai nei vaega ua mafua ai? Aua o lea na ona tau mai faapea ae ou te fia malamalama lau Afioga po o le a tonu le mafuaaga? Afai o i ai ni luitau, o le a se finagalo o le Komiti i ni auala e ono foia ai ma fesoasoani ai i le Matagaluega, pe afai o lea e tulai mai nei luitau. E le gata i lea, ua e saunoa i tausaga litaea. O le a la se tausaga ua finagalo le Komiti e ono tuu i ai, i le tou silafia e talafeagai i leni foi vaitau i le sologa lelei o le soifuaga o i ai? Ma le fesili mulimuli lau Afioga, o lea e faapea mai e tofia tagata agavaa e tomai faapitoa i tau faamaumauga. E i ai le manatu, e le o toe i ai se Matagaluega a le Malo, e le o toe i ai ia ia tomai faapea i a latou foi Matagaluega. Afai e le o i ai i le taimi nei, po o le a se mafuaaga sa leai ai? Ma le faaaloalo lava faafetai.

FOFOGA FETALAI: Masalo e pau lea o le sui usufono e fia saunoa. Tulai mai lau Afioga i le Taitaifono.

Tofa Hon TUUU ANASII LEOTA: Lau Afioga i le Fofoga Fetalai o le faafesili i tulaga i faafitauli, e pei lava ona silafia, o faafitauli masani lava. E le faapea o i ai ni tulaga foi ia e... o la lava e silafia le tulaga i le tulai mai o ni taumafaiga foi ia i avanoa e fesiligia ai leí . aua e pei o le mea lea ou te matau atu o lo o e silafia ia tulaga uma ia uaí o le faafitauli tele lava i le tulaga e pei ona silafia, na faamatuu ai i tua i Pule Sili o Matagaluega ia galuega ia e pei ona aumai ai le faafesili. O le tulaga i le matua, o na ua silafia le tulaga e faatapulaa ai ma litaea ai le tagata. O le mea lea ua fautuaina e le Komiti ina ia silasila pea i ai i tagata o lo o ua ova atu i le limasefulu, oo atu i le onosefulu onosefululima ao la lava e lelei le mafaufau ma le atamai ma le tomai e faatino ai galuega e pei o alii fomai, o tamaitai tausimai ma faiaoga. O le faafesili foi i mea ia o data, a e silasila lelei ma faitau lelei i le lipoti. O lena e aumai ai iina. Ae faafetai o lea e faafofoga mai le Pulega ma le Matagaluega, ia o le a faatino ia vaega uma ia. Atonu e sau malama ona manino lea ma malamalama. Ia o le faatulagaga lea lau Afioga i le Fofoga Fetalai.

Tofa Motuopuaa Uifagasa Aisoli Vaai: Lau Afioga i le Fofoga Fetalai, e na ona ou fia fesoasoani atu i le mataupu lea, leaga o au o le isi sui o le Komiti. I le mea lea o le responsibility, aua o lea e pei e faatatau i le CEO ma le ACEO, o le faamatalaga a le Pule o le PSC na oo atu i le Komiti, o responsibility a le ACEO ia te ia, i le CEO ma le responsibility i le isi pule. O le isi faatonuga e alu atu i le isi itu.

21 APERILA 2015**P.P. 2014/2015 Nu 217, Lipoti a le Komiti o Faafoga Tau Pulega a le Malo i le P.P. 2014/2015 Nu 124, Lipoti Faaletausaga a le Komisi o Pulea Galuega a le Malo mo le Tausaga Faaletupe 2010/2011 – Iloiloga**

E pei o le mea lena o le conflict of interest, ae le iloa o le toe tofiga a le ACEO e sau i recommendation a le CEO. E pei o le faamatalaga lea na maua i le aso lea na oo atu ai le Tamaitai Pule o le PSC. E pei o le uiga lea o le fesili a le sui usufono mo Faleata Sisifo, lea na ona ou tau piipii atu e fesoasoani atu ai. Ma le faaaloalo.

FOFOGA FETALAI: Malo faafetai.

Tofa Lealailepule Rimoni Aiafi: Lau Afioga i le Fofoga Fetalai, faafetai lava o lea ua maua se malamalamaga. O le mea lea ou te talitonu ai i ai, o le tofiga o le Pule Sili o le matafaioi lea a le Kapeneta, a o le mea lea e faamamafa i sou manatu, o Pule Lua ia, Pule Lagolago. O le mea lea ou te matauina ua tele ai le faafitauli ua tulai mai, o le malosiaga atoa lea e i le Komisi o Galuega, e leai ai se avanoa i le tagata o lo o Pule Lagolago, e i ai sona aia e mafai ai ona fesiligia pe aisea ua le toe tofia ai ia. Ae aisea foi ua le talia ai. E pei o se vala lea e toe tagatagai i ai, lea sa tupu foi muamua, tatau ona toe tagai pea i ai le Afioga i le Minisita ma le Matagaluega, ina ia i ai se aiatatau a tagata nei, ia i ai so latou avanoa e fesiligia ai se faaiuga ua le talafeagai i lona talitonuga ua mafua ai ona aveese ia ma lana galuega. Ia, pau ia o nai vaega ae faafetai tele i le Afioga i le Taitaifono aemaise lou soatau. Faafetai.

FOFOGA FETALAI: Malo. Ia, o le a tuu atu le avanoa i le Afioga i le Minisita. Tulai mai le Afioga i le Minisita mo Galuega Tau Alamanuia ma Atinae a le Malo.

Tofa Hon LAUTAFI FIO SELAFI PURCELL: Lau Afioga i le Fofoga Fetalai, ou te tulai atu atonu e i ai le avanoa o le Malo e tali atu ai nisi o fautuaga ma faamalamalama atili ai le mataupu lea e saunoa i ai le sui usufono mo Faleata Sisifo. A o le faagasologa lava ia o le Tulafono o lo o i ai ma le tofiaina o ACEOs, o lo o i ai lava le process o lo o follow ai pe afai e le faamanuiaina lana talosaga. E i ai lava le process e faamalamalama atili ai le mea ua le toe tofia ai ia a ua tofia se isi tagata. Ia o le tala atu lea lau Afioga i le Fofoga fetalai. Faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54 e ao i le Malo ona tali mai e tusa ai ma le Lipoti a le Komiti ia le i lalo ifo o le 90 aso talu ona faamaonia e le Palemene le Lipoti.

21 APERILA 2015

P.P. 2014/2015 NU.218, LIPOTI A LE KOMITI O TUPE MAUA MA TUPE TOTOGI I LE P.P.2014/2015 NU.78, LIPOTI FAALETAUSAGA A LE PULEGA O TUPE FAAVA O MALO MO LE TAUSAGA FAALETUPE 2013 - Iloiloga

FOFOGA FETALAI: Tulai mai lau Afioga i le Taitaifono Honourable Papaliitele.

Susuga Hon PAPALIITELE NIKO LEE HANG: Lau Afioga i le Fofoga Fetalai ua ou tulai atu ma le agaga faaloalo ou te faatu le lafo, *Ina ia faautagia e lenei Fono Aoa le Lipoti a le Komiti, o lo o tuuina atu ai ana Sailiiliga, Fautuaga ma Iugafono.*

Faaluaina e le Sui Fofoga Fetalai, ma se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow, ma le sui usufono mo Aleipata Itupa i Lalo.

FOFOGA FETALAI: Tulai mai lau Afioga i le Taitaifono e faitau Fautuaga ma Iugafono.

Susuga Hon PAPALIITELE NIKO LEE HANG: Lau Afioga i le Fofoga Fetalai i le maea ai o le Sailiiliga a le Komiti ua fautuaina ai le Malo e faapea:

FAUTUAGA:

1. Ia uunaia ma faalauiloa atili le manulauti a le Pulega o Tupe Faava o Malo o Samoa aua le faatosinaina mai o kamupani mai fafo mo le teuina o tupe i totonu o le tatou atunuu. E fautuaina le Pulega ma le Komiti Faafae ina ia silasila i isi auala e le o faaagaina e isi atunuu o le Pasefika ma isi atunuu o le lalolagi, o lo o maketiina atu lenei auaunaga.
2. Ia toe iloilo Faiga Faavae a le Pulega o Tupe Faava o Malo mo nonogatupe a le aufaigaluega po o le staff loan scheme, ina ia teuteuina vaega o le Tulafono o lo o faavaeina ai lenei vaega. Ua fautuaina e le Komiti lenei vaega ina ia laugatasia ai Faalapotopotoga Tumaoti uma a le Malo sa o latou faatinoina lenei faiga ae ua taofia uma ma ua le o toe faatinoina e tusa ai ma le Faaiuga a le Kapeneta.
3. Ia iloilo e le Pulega ana Faiga Faavae mo faamanuiaga mo le aufaigaluega, ina ia laugatasia ma faamanuiaga o lo o agavaa i ai Matagaluega ma Faalapotopotoga uma a le Malo e pei o aso malolo faaletausaga ma isi faamanuiaga.
4. Ia toe iloilo ma soalaupule e le Pulega ma le Komiti Faafae, po o ua talafeagai i le taimi nei ona fausia ni nofoaga tutotonu mo le Pulega o Tupe Faava o Malo o Samoa. O lenei faamoemoe sa toe faapafala e le Malo, ona o nisi o mafuaaga, ae ao lava i le Pulega ma le Komiti Faafae ona toe iloilo vaega uma o lenei poloketi ae le i faataunuina.

21 APERILA 2015**P.P. 2014/2015 Nu.218, Lipoti a le Komiti o Tupe Maua ma Tupe Totogi i le P.P.2014/2015 Nu.78, Lipoti Faaletausaga a le Pulega o Tupe Faava o Malo mo le Tausaga Faaletupe 2013 - Iloiloga**

5. Ina ia usitaia faiga faavae mo le tapenaina ma le tuina mai o Lipoti Faaletausaga i le Palemene, e tusa ai ma aiaiga faale-Tulafono o lo o faafoe ai galuega faatino a le Pulega.

IUGAFONO:

I le maea ai o iloiloga a le Komiti, sa faaiugafonoina ai e fautuaina le Fono Aoao;-

Ia faamaonia le P.P. 2014/2015 Nu. 78, Lipoti Faaletausaga a le Pulega o Tupe Faava o Malo o Samoa mo le Tausaga Faaletupe e faaiuina i le aso 30 Iuni 2013.” Faafetai.

FOFOGA FETALAI: Malo, faafetai saunoa faamalamalama i lau Afioga i le Taitaifono. Ia tulai mai le sui usufono mamalu mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, faafetai i lau Afioga i le Fofoga Fetalai, e faafetai atu foi i le Taitaifono o le Komiti mo le Lipoti.

O le vaega muamua lau Afioga i le Fofoga Fetalai, ou te fia malamalama, pe aisea ua fautua ai e le Komiti i le fautuaga muamua, auala e faaaogaina e isi atunuu o le Pasefika. O a auala ia ua outou fautuaina ai le Matagaluega o Tupe ina ia mulimulitai ai?

O le vaega lona lua, o le fautuaga lona lua lea, pe i ai se manatu foi lele o le Komiti agai i mea ia o staff loan. O lau fesili, aisea le mea ua ala ai ona outou fautua i lea vaega, pe i ai se vaega ua matuia ai le faatinoina e le Matagaluega o lea vaega?

O le vaega lona lua, o a faamanuiaga ia o lo o fesiligia i le vaega lona tolu o le fautuaga lenei? Aua o le fautuaga lenei e foliga mai a tagai i ai, pei e foliga mai e le o sao le faatinoina o ia vaega i totonu o le Matagaluega, o lea la ua i ai fautuaga ia, ou te fesili atu ai i lau Afioga i le Taitaifono, e mafai ona faamalamalama mai pe aisea le mea ua ala ai ona fai ia fautuaga e tolu? Ma le faaaloalo lava.

FOFOGA FETALAI: Malo. Ia e manatu e pau lea o le sui usufono e fia saunoa. Tulai mai lau Afioga i le Taitaifono.

Susuga Hon PAPALIITELE NIKO LEE HANG: Ia e faafetai atu i le sui usufono mamalu mo faafesili, ia e faigofie foi tali mo fesili e tolu.

21 APERILA 2015

P.P. 2014/2015 Nu.218, Lipoti a le Komiti o Tupe Maua ma Tupe Totogi i le P.P.2014/2015 Nu.78, Lipoti Faaletausaga a le Pulega o Tupe Faava o Malo mo le Tausaga Faaletupe 2013 - Iloiloga

Muamua o le fautuaga ua tuuina atu i le Pulega ma le Komiti Faafoe, ina ia silasila i nisi auala, auala la ia e silasila i ai latou, e le o faatino e nisi atunuu o lo o faaaogaina lea auunaga lea e faatino e le tatou Faalapotopotoga lea o le SIFA, ia o lea la e tuu atu le fautuaga i le Pulega e o latou e saili nisi auala, aua le faalauteleina o lenei foi auunaga aua foi le fesoasoani i tupe maua a lo tatou Malo.

O le lua o le tulaga ia o faamanuiaga i le aufaigaluega, o le fautuaga ina ia faalaugatasia uma pei ona ua i ai le FK a le Kapeneta ina ia faalaugatasia uma ia faamanuiaga i le aufaigaluega, ona o lea sa i lalo o le Tulafono o le Central Bank le faamanuiaga lea, a o lea ua toe tuu atu le fautuaga, se i toe silasila i ai i le tulaga lea pe le ua tataua ona faalaugatasia ai ia le aufaigaluega uma a le Malo.

Ma le tolu, e leai se mea o faaletonu i le tulaga lea, na pau lava le mea o la e agavaa i aso malolo e totogi ma isi ituaiga faamanuiaga, ae le o tutusa la ma isi Matagaluega ma Faalapotopotoga, a o le mea la lea e tau momoli atu ai se fautuaga, ina ia silasila i ai le Pulega ma le í ina ia tau laugatasia ma faamanuiaga foi a Ministries ma isi Faalapotopotoga a le Malo, ae leai se mea o faaletonu o la e lelei leí ..e totogi lava tagata i le tulaga, ua uma foi ona pasia e le Faalapotopotoga aua faamanuiaga ia a le aufaigaluega. Ma le faaaloalo lava.

Tofa AVEAU TUALA LEPALE NIKO PALAMO: Lau Afioga i le Fofoga Fetalaií ..

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalaií ..

FOFOGA FETALAI: Ia malie lava le sui usufono, se i avatu le avanoa i le tali atu a le Minisita le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Ona o lea ou te vaai atu o la e tutulai mai le sui usufono, o tulaga masani lava i le faalauiloa o tatou Pisinisi Faava o Malo, o mea o faigamalaga e o i fafo ma fai talanoaga faalauaitele valaau le toatele o i latou o le aufaipisinisi i vaega ia o aai tetele ia e masani ona maua mai ai i latou nei tai pei o Hong Kong e faaoga i ai ia taimi foi ia e fai i le Hong Kong Sevens. O lea la e o atu ia le aufaipisinisi e fono ai i ina ma matamata, ae o atu tatou fai foi tatou fono ma valaau foi le aufaipisinisi e o atu e matamata, e omai foi latou se i faalogologo i a tatou faasalalaua. O mea la ia o lea e masani e faifai soo lava e Papaliitele ma Faumui a o Minisita o Tupe, sa ou faia foi e au ia faasalalaua ia, o le isi ituaiga faiga e tatou te faaoga tele, o le faatalatalanoa lea ma latou foi o lo o faatinoa ia pisinisi i le unaiina o faiga fou ina ia saili mai ai seleni.

21 APERILA 2015

P.P. 2014/2015 Nu.218, Lipoti a le Komiti o Tupe Maua ma Tupe Totogi i le P.P.2014/2015 Nu.78, Lipoti Faaletausaga a le Pulega o Tupe Faava o Malo mo le Tausaga Faaletupe 2013 - Iloiloga

O le ala lea e ala ai ona suisui a tatou Tulafono, e alualu e le umi ae taunuu mai lea delegation fai mai, e i ai le mea lea ua fai e le atunuu lea e tatau ona tope le tatou Tulafono, a, ona tatou faaitaitai i ai a le faia ia e o uma pisinisi i o ae misi tatou. O auala masani lava ia o lea e faaaoga e tatou e saili ai a tatou seleni. E i ai le isi mataupu lea ou te fia faalautele atu le mea lea e saunoa i ai ia Papalii le tulaga lea o faamanuiaga o lo o maua e latou o lo o galulue i Ministries ma Corporations, e i ai lava taimi ona o le fesuisui ai o pule ma tofiga ma le fesuisui ai foi o Komiti, aemaise ia le taimi lenei o lea ua le o toe aafia ia Minisita ae o atu tagata i tua, e i ai la taimi e laaloa ai le vaai a latou o le Iuga lea a le Kapeneta a ua maea ona faataoto ia laugatasia ai le aufaigaluega atoa a le Malo, e le gata i totonu o Matagaluega ae faapena foi Faalapotopotoga.

O le mau sa masani ona tauave i aso la e tatau ona faalapotopotoga faamanuiaga e maua e Faalapotopotoga Tumaoti nai lo le aufaigaluega a le Malo i luga o le tulaga foi lele o le aufaigaluega a le Malo Ministries Matagaluega, e leai se mea e popole ai o latou ia pei o lo o tumau le security e faaauau pea o latou galuega, a o i la i Corporations e galulue faakonekarate a alu atu lava a ua uma lava lau konekarate ia ua sau le faasalalaua ua e le maua, ia ona e alu atu ai lava lea i le vasaloloa, ona faapea lea o le manatu, e sili la ona faamaualuga a latou totogi ina ia faatosina atu ai tagata i Faalapotopotoga Tumaoti, ua le o toe i ai se mea faapena i le taimi lenei, o lea ua faakonekarate uma lava i latou ia i le faatumutumuga ua tutusa uma ai lava Matagaluega ma Faalapotopotoga, e leai la se mea o le a te i ua faamaualuga ae ai ia Faalapotopotoga Tumaoti ae faamaualalo ia Ministries, o le aoga foi lena o le itutino lea o le Malo lea ua faatuina nei o latou na ua fai ma latou galuega tauave le monitor, ia silasila totoa i le vasaga o totogi aua ne i i ai se eseese tele e faatulai mai ai le o ese o le aufaigaluega mai lea mea ae o i lea mea ona i ai lea o le mea foi lea o le maa taavalevale e le pipii ai se limu. O le mea lea e i ai nei, a e taavalevale soo, na o le tele o au limu e maua, a, ua le o toe sao la lena tauga i aso nei a o le auala e taofia ai ia mataitu lelei le vasaga o totogi ia aua ne i i ai se eseese tele e tulai mai.

Tofa Aveau Tuala Lepale Niko Palamo: Lau Afioga i le Fofoga Fetalaií ..

FOFOGA FETALAI: Ia.

Tofa Aveau Tuala Lepale Niko Palamo: Faafetai, faafetai leai o lea ua malamalama foi le sui usufono e pei ona fesili, ae na ala ona ou fesili, leaga a faitau i fautuaga a le Komiti, pei e foliga mai e i ai se mea sese o lo o fai e le Matagaluega pe a faitau lelei ai lava i i i fautuaga lea, ae faafetai o lea ua faamalamalama e le Afioga i le Palemia, leai o mea lava ia e fai i totonu o Matagaluega e i ai ia faamanuiaga, e tatou te malamalama lelei i mea faapea.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

Ae ua ala ona ou fesili, ona o le fautuaga lea pei e fua foi lele o lo o i ai se mea e faaletonu o lo o tupu i totonu o le Matagaluega, ma le faaaloalo lava.

FOFOGA FETALAI: Malo faafetai.

Na faamaonia le Lipoti.

FOFOGA FETALAI: E tusa ai foi ma le tatou Tulafono Tumau 54, e ao i le Malo ona tuuina mai le Tali e le silia i le 90 aso ua pasia ai e le Fono Aoa le Lipoti a le Komiti.

P.P. 2014/2015 NU. 219, LIPOTI A LE KOMITI O MATAUPU TAU FAAMASINOAGA, LEOLEO MA FALEPUIPUI, FAAMASINOAGA O FANUA MA SUAFA I LE P.P. 2014/2015 NU. 119, LIPOTI A LE KOMISI O LE TOEFUATAIGA O TULAFONO A SAMOA I LE TULAFONO O ALII MA TAMAITAI LOIA 1976, LIPOTI 05/11 - Iloiloga

Tofa TUISA TASI PATEA (Taitaifono Komiti o Mataupu tau Faamasinoga, Leoleo ma Falepuipui ma Faamasinoga o Fanua ma Suafa): Lau Afioga i le Fofoga Fetalai ma le faaaloalo, ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Falelatai ma Samatau, sui usufono mo Palauli, sui usufono mo Gagai fomauga Nu. 2, ma se tasi o sui usufono mo Vaimauga Sisifo, Tofa Lenatai Victor Faafai Tamapua.

FOFOGA FETALAI: Ia ma le Afioga i le sui usufono mo Vaisigano Nu. 2?

Tofa Motuopuaa Uifagasa Aisoli Vaai (Vaisigano Nu. 2): Leai e fia fai se manatu lau Afioga.

FOFOGA FETALAI: Ia se i tuu atu muamua la, se i fai le fautuaga. Onosai mai le tatou Maota toe pau lava lea o le tatou Tulafono ona tatou malolo lea, one more to go. Tulai mai lau Afioga i le Taitaifono.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

Tofa TUISA TASI PATEA: Lau Afioga i le Fofoga Fetalai, e fautuaina e le Komiti le Fono Aoao, *Ina ia faamaonia le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono mo Alii ma Tamaitai Loia 1976, Lipoti 05/11 ma Fautuaga a le Komiti ua tuuina atu i lalo:*

FAUTUAGA:

I le maea ai o Fautuaga a le Komiti ua fautuaina ai le Fono Aoao e faapea:

Ina ia talia ma faautagia le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa mo le Toefuataiga o le Tulafono o Alii ma Tamaitai Loia 1976. O lea toefuataiga ma faamoemoega mo le fausiaina o le Tulafono Autu mo Loia ma le faatinoga o Galuega faa-Loia.

Peitai, ina ua maea lelei Sailiiliga ma Iloiloga a le Komiti ua matauina ai, na faamamaluina le Tulafono Autu mo Loia ma le Faatinoga o Galuega faa-Loia 2014 i le aso 28 Oketopa 2014, ae le i iloiloina e le Komiti le Lipoti a le Komisi.

I le maea ai o iloiloga a le Komiti na matauina ai, o nisi o Fautuaga na tuuina mai e le Komisi i lana Lipoti, ua mafai nei ona avea ma vaega o lea Tulafono. Peitai o nisi Fautuaga, ua molimauna e le Komiti, e le o faaaogaina i le fausiaina o lea Tulafono.

O lea faafitauli e talitonu le Komiti ona o le le mautu o le faagasologa o taualumaga o le galuega, i le amata mai o le tuufaatasia o Fautuaga a le Komisi ma tuuina mai lana Lipoti mo le faamaoniga a le Fono Aoao Faitulafono ma le toe foi atu mo le tapenaina o le Tulafono.

IUGAFONO:

O lea ua faaiugafonoina ai e faapea:-

Ia talia ma faamaonia le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa mo le Toefuataiga o le Tulafono o Alii ma Tamaitai Loia 1976 ma ana Fautuaga, vagana ai Fautuaga Nu. 5, Nu. 6, Nu. 8, Nu. 35, Nu. 36, Nu. 38 ma le Fautuaga Nu. 40. Ona o nei Fautuaga e le o faaaogaina i totonu o le Tulafono fou”.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

I le ava ma le faaaloalo lava faafetai.

FOFOGA FETALAI: Malie lava le sui usufono mo Faleata Sisifo leaga lea sa muamua tulai mai le sui usufono mo Vaisigano Nu. 2.

Tofa MOTUOPUAA UIFAGASA AISOLI VAAI: Faafetai i lau Afioga i le Fofoga Fetalai mo le avanoa. O lau fesili out e fia malamalama a ii lau Afioga i le Taitaifono, pei o lea o le aveese le upu lea o le Barristers and Solicitors e pei ona tatou masani mai ai i aso ua mavae. Po o se practice lea ua fai nei i atunuu na tatou ó ua aumai ai nei ituaiga faaupuga faapenei? A o le a foi le eseese o le Barristers ma le Solicitors e eseese a latou galuega e fai a o lea ua pei ua abuse faatasi ma ua tau a na o Loia.

O le isi mea sa i ai mea e tau o rotary public_e eseese foi, ou te le o vaai atu o sau ai i la outou recommendation pe i ai se mea faapenei pe leai?

Ma lou faaaloalo tele.

FOFOGA FETALAI: Tulai mai le sui usufono mo Faleata Sisifo ona tuu atu ai lea o le avanoa i le Taitaifono.

Tofa LEALAILEPULE RIMONI AIAFI: Faafetai lava i lau Afioga mo le avanoa. Faafetai foi i le Afioga i le Taitaifono, o lea e tau faavasega aua e le o iloa tonu po o le a le Lipoti lea e aumai, pau lava le mea e pei o lea ua toe lau mai mea sa i le Lipoti a le Law Commission, ae ui o lea lau Afioga, e fia fesiligia lau Afioga i le Taitaifono pe na i ai nisi na fesiligia e ese mai le Law Commission po o le Komisi o le Toefuataiga o Tulafono a Samoa aemaise i latou na toe tuufaatasia le Tulafono lenei a Loia, pe aisea le mafuaaga ua le amanaia ai nei Fautuaga a le Komisi Suesue. O lea ou te faitau atu o le tele o fautuaga ua le amanaia o ni fautuaga taua tele, e pei o le avanoa o le Loia Sili e avea ai ma sui tumau ona o ia vaaia le Fono Aoao a Loia ma auai i lea vaega o le Sosaiete pe aisea ua mafua ai. O le isi vaega taua o lo o tuu mai ai o le avea lea o le Minisita ma le Minisita Lagolago. E le tataua ona toe avea pe omia le tulaga faa-Loia ona e ono aafia a ii lona tulaga e avea ai o ia ma taitai po o le pulega faale Malo pe le i ai se conflict of interest pe ona o lau Afioga ó leai ou te le o fai atu aua o lau Afioga i le Minisita Lagolago, e le gata i lea o aia tataua o Loia pea molia i latou i le Tulafono. O le uiga o lau faamatalaga lau Afioga, pe na outou fesiligia i latou na tuufaatasia Tulafono ma tuuina mai. Po o le a lava se mafuaaga ogaoga ua le talia ai le tele o nei fautuaga na tuuina atu e le Komisi ina ia aafia i totonu o le Tulafono Tau Faaofi?

Ma le faaaloalo lava.

FOFOGA FETALAI: Malie lau Afioga i le Taitaifono o lea e fia saunoa le sui usufono mo Faleata Sasae.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

Tofa AVEAU TUALA LEPALE NIKO PALAMO: Lau Afioga i le Fofoga Fetalai, i le Lipoti lenei e tele lava le faafitauli o lo o tulai mai ai. A tagai i ai o le tele ia o Fautuaga e le o sau ai i totonu o le o le Lipoti. Ua saunoa le Taitaifono ua e tagai i le Lipoti e leai se 35, 36, 38, ona sau lea i lalo o lea ua saunoa mai le Taitaifono e faauai ese. O lau fesili lau Afioga i le Taitaifono, muamua i le vaega o Fautuaga o lo o i ai le Fautuaga o lo o faapea mai; õpeitai o nisi Fautuaga ua molimauina e le Komiti e le o faaaogaina i le fausiaina o le Tulafono. Masalo o Fautuaga ia ua e saunoa i ai e le o faaaogaina, ae i ai lou manatu sa tatau ona aumai i i Fautuaga nei, aua e foliga mai i le faanumeraina o la outou Lipoti o lea ua leai se 35, 36 ae sau lava i le 34 oso i le 37.

O le vaega lua o lau fesili, sei faamalamalama mai lava le vaega 37 faamolemole po o le a tonu lava le itu lea e faatatau i ai lea vaega o le Lipoti ona ua fai sina lavelave o le Tulafono ona e le o sao le faanumeraina mai totonu o fuainumera sa tatau ona faanumera ai pe aisea ua faapea ai le Lipoti? Ma lou faaaloalo lava faafetai.

FOFOGA FETALAI: Tulai mai lau Afioga i le Taitaifono.

Tofa TUISA TASI PATEA: Lau Afioga i le Fofoga Fetalai, o le a ou amata atu ia i lalo i le sui usufono lea faatoa maea atu nei. O le fesili a le sui usufono masalo a e tagatagai i le itulau 11 o le Lipoti, tagai ane i ai o lena e alu atu uma ai vaega e pei ona matou taua e le o faaaogaina e le matou Komiti. O le mafuaaga foi e pei ona avatu ona e le o aafia i totonu o le Tulafono e pei ona pasia ia Oketopa 2014. A e faitau maeaea i ai i le itulau 11 ou te talitonu o le a tali ai fesili nei e te fesilsi mai ai le sui usufono mamalu. O le mafuaaga ona e taunuu mai le Lipoti a le Komisi o Toefuataiga o Tulafono a Samoa ua pasi le tatou Tulafono, o le ala lena ua matou le taliaina ai nei fautuaga aua e le o i totonu o le Tulafono, ae sa faatalanoaina foi i le taimi na talanoa ai lenei Lipoti e la matou Komiti sa auala mai ai lenei Tulafono. Ina ua maea le faitauga lona lua, e talafeagai uma lava fuafuaga ma fautuaga e le o aafia i totonu.

E pei ona fesiligia e le sui usufono mo Faleata Sisifo, o lena e le o aafia le Loia Sili i totonu o le Fono a le Sosaiete a Loia, o le mafuaaga e pei ona silafia e i ai foi se feteenaiga. O le talitonuga foi lena o le Susuga i le Loia Sili ae auai lava ma faalogologo ae le mafai ona palota e pei ona avatu i le Fautuaga. O le tulaga e pei ona e fesiligia Minisita Lagolago po o Loia a ua avea ma Minisita, e le tatau ona toe avea ma Loia, ou te talitonu e le i aumaia lena fautuaga i le taimi na talanoaina ai e le matou Komiti le Tulafono na pasia i le 2014. E le o faaaogaina foi aua e i ai lo matou talitonuga pei lava e i ai sina faailoga lanu o lena, atonu o le mafuaaga foi lea ua ala ai ona aveese lea fautuaga mai totonu o le Tulafono ae le i oo mai totonu i le talanoaina le Tulafono e le matou Komiti.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

Ona ou oo mai lea i le sui usufono mo Vaisigano Nu. 21 .

Tofa Lealailepule Rimoni Aiafi: Lau Afioga i le Fofoga Fetalaií .

FOFOGA FETALAI: Malie lau Afioga i le Taitaifono se i toe tuu atu le avanoa i le sui usufono.

Tofa Lealailepule Rimoni Aiafi: Leai e faamalulu atu i le Taitaifono i le fesili lea. O le fia malamalama pe na toe tapa le Law Society e ana le Tulafono ma toe ave i ai Fautuaga nei ua tuuina mai e le Komisi Suesue e toe tagai i ai, pe le tatau ona toe tuu i totonu o le Tulafono Autu lea ua aumai. Sa ou faapea o la outou Lipoti lea na aumai i le taimi na fausia ai le Tulafono ina ia mafai ona tuu ai i totonu, afai na le mafai ona tuu ai i totonu i le taimi na pasia ai, o lea ou te vaai atu e i aim ea na tuu ai totonu ae i ai mea e le i tuuina i totonu. O le mea lene sa ou faapea ai i lau Afioga aua o lea ua process i le faatinoga o a tatou galuega faa-Komiti e ala i le faatalatalanoa o i latou sa faia nei mea consolidation. O le mea lene out e fia fesili atu ai pe na toe tapa i latou e ou le Tulafono po o le Law Society ma toe ave i ai nei fautuaga, pe le ono talafeagai ai ona tuu i totonu. Ae pe na toe fesiligia la le Ofisa o le Loia Sili o lea ou te vaai atu na o le Ofisa lava o le Law Commission sa feiloai ma la outou Komiti, ae afai ua faamalieina lau Afioga i le Taitaifono ma le Komiti o le tulaga lene. O le popolega o lou sui usufono ona e tele taimi na alu i le tapenaina o nei mea, tele taimi ae afai e aumai ma le faaaogaina o le tulaga faanoanoa lene.

Ma lou faaaloalo lava.

Tofa Aveau Tuala Lepale Niko Palamo: Lau Afioga i le Fofoga Fetalai, e auga lou manatu i le manatu o le sui usufono mo Faleata Sisifo, a tagai i lenei Lipoti e 44 Fautuaga o lo o outou fautua ai i le Tulafono. E pei ona saunoa le sui usufono faatoa mavae atu, po o le a se vaega ua oo i ai a outou Fautuaga nei 44 nei ua ave i totonu o le Tulafono, pe fia ni vaega o nei vaega 44 o lo o talia e le Tulafono? Ma le faaaloalo lava.

FOFOGA FETALAI: E manatu e manino pe a tali mai le Malo, o le faasaoga lene, ae tulai mai e faaiu mai le tali lau Afioga i le Taitaifono.

Tofa TUISA TASI PATEA: Lau Afioga i le Fofoga Fetalai, e pei lava ona fesiligia e sui usufono e toalua faatoa uma atu nei, sa aiaia uma ai nei tulaga e le matou Komiti i totonu o le taimi na faatalanoaina ai lenei Tulafono. E leai ma se vaega o Fautuaga nei ua aveese e la matou Komiti i le taimi na faatalanoaina ai le Tulafono. Na fesiligia sa i ai le Sosiaete o Loia pei o i latou ia e autu i ai le Tulafono aemaise o le Ofisa o le Loia Sili ma nisi o Loia sa faaali o latou submissions i lenei Tulafono.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

O fuafuaga uma nei sa faatalanoa i le taimi na talanoaina ai lenei Tulafono i lenei a o le i pasia ia Oketopa o le 2014.

O le tali atu i le fesili a le sui usufono mo Vaisigano Nu. 2, o le Barristers ma le Solicitors masalo o lena e te silafia ae sa ou faapea e te fesiligia le sui usufono po o le uso a Loia o lo o i ou autafa o le Susuga Papalii o se tasi o sui usufono o la matou Komiti. O le Barristers ma le Solicitors e tasi a o le Loia a o le Barristers e alu i le Faamasinoga a o le Solicitors e i le Ofisa. O le rotary public out e talitonu ua feoloolo foi nai a tatou ó ou te le iloa po o le a le upu e faa-Samoa ai upu nei a o le Loia lava ae ese foi le isi level. E i ai qualifications e mafai ai ona apply ona maua ai lea o le rotary public e pei ona fesiligia ae masalo e tasi lava le upu e ave i ai o le Loia.

Ou te talitonu o le a faamalamalama atili atu!

Tofa Motuopuaa Uifagasa Aisoli Vaai: Lau Afioga i le Fofoga Fetalai, e ala ona ou tutu umi atu i le amataga foi lea na e fesili mai ai pe ou te faaluaina, e leai, ou te manao e tetee le Lipoti leaga e le o sainsi uma le Komiti i lenei Lipoti. E pei o le mea lena, ae faafetai lava mo le faamalamalama, e i ai loia e o i le faamasinoga, e i ai foi loia e nofonofo i le Ofisa. Faafetai tele lava mo le faamalamalama. Faafetai.

Tofa Lealailepule Rimoni Aiafi: Lau Afioga i le Fofoga Fetalai ma le faaaloalo lava, na pau lava le mea lau Afioga, ne i te i ua faapea ona o lea e avatu manatu i le tou Lipoti lea e aumai, e leai ma ni lisi molimau pei o Lipoti uma ia e aumai. O Lipoti ia na uma atu nei, e sau uma ai lava ma le lisi o Matagaluega ma i latou e o atu e molimau. Na pau lava le lisi lea e i le tou Lipoti, na o le Komisi e ona le Lipoti, Tulafono a Samoa.

O le ala lea na fesiligia ai lau Afioga, aua afai e toute fesiligia i latou e ou le Lipoti, el e mafai la ona talia e au nei e ana le Lipoti e toe iloilo lava e i latou e au le Lipoti sa tataua ona fesiligia i latou ua aafia i le Lipoti. Ma lou faaaloalo lava faafetai.

FOFOGA FETALAI: E i ai se isi fesili o totoe lau Afioga i le Taitaifono?

Tofa Tuisa Tasi Patea: O lena lava ua toe tali ia i lana fesili. Faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i fautuaga na tuuina mai e le Malo ma le Lipoti a le Komiti ia le silia le 90 aso talu ona faamaonia e le Fono Aoao le Lipoti.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

Ia, ona tatou taunuu ai lea i le taunuuga o le tatou Cue Paper i le aso. E manatu o lea ua matua tau tonu pa tau i le ave tusa ma le tatou fuafuaga i lenei aso, sa tatou nanau i ai, na faapea o le a toe faatu se isi lafo e faaauau i le afiafi lenei seia maea, a o lea ua maea lelei ae toe asi le itula atoa tatou taunuu i le tatou taimi malolo.

Ma le agaga faaaloalo, e momoli atu le faafetai ma le faamalo i le paia o le tatou Maota i lenei vaega o le afiafi, e talitonu le faamoemoe o lea ua taunuu tonu i le mea sa tatou manaonao i ai, aemaise le faatulagaina o tatou Lipoti ma galuega uma pei ona faataatia mai i le tatou Pepa o Galuega i le taeao analeila, aemaise foi o le faaumiumi ma le soalaupuleinai le tele ma le anoanoai o tatou Tulafono Faanatinati, aemaise o Lipoti na lauiliuina nei, Lipoti a Komiti pei ona saunoa i ai Taitaifono. Ma le agaga faaaloalo, e momoli atu le faafetai i le tatou Maota, e talitonu ua faaaaogagase foi i lenei itula afiafi lau Afioga i le Palemia ma lau Kapeneta, aemaise foi lea tala na atoa i lau Afioga i le Taitai o le Itu Agai ma sui usufono mamalu uma o le tatou Maota, faamalo atu le onosai. O le aso a taeao o le a tatou mataitu, pei lava ona faatuina e le Afioga i le Palemia le tatou lafo, ae manatu ma le agaga maualuga i lenei afiafi, ua tuumamaina le tatou galuega.

O lo o i ai nisi o tatou sauniga faapitoa mo le silafia e le tatou Maota, o lea ua ou taulimaina nei le Tusi Faamaonia ua tuuina mai e le Afioga i le Sui Komesina o Faiga Palota e faailoa mai ai le iuga o le Faiga Palota Aloaia a le itumalo o Sagaga le Usoga sa feagai ai i le Aso Faraile na maea nei, ma o lea foi ua ou taulimaina le Tusi Faamaonia mai le Afioga Mamalu o le Ao o le Malo. Ou te manatu ua tataua ona tatou faatinoina lea sauniga i le aso a taeao i le sui usufono ua manumalo mai le faiga filifiliga a le itumalo, le Afioga ia Seiuli Ueligitone Seiuli, ou te manatu o le taeao a taeao o le a faatinoina ai lana tautoga i le tulaga o tu ma aga masani, ma tatou faafeiloai aloaia ai le Afioga i le sui usufono. O se taimi auliuli fai foi lea o faaaloaloga masani a le tatou Maota. Ae faasilasila ma le aloaia i le tatou Maota Fono, o le aso a taeao o le a faatautaina aloaia ai le sui usufono fou o le tatou Maota. Afai o faafofoga mai Aiga ma le itumalo, e valaaulia foi le auai ina ia i ai le faamalumaluga ma faamanuiaga mo le aso a taeao, ona ou manatu lea, a maea loa le tulaga lea ona tatou faagasolo lea i nisi o Tulafono ua faataatia ai le lafo e faataatiaese le Tulafono Tumau ae agai le faitauga faalua seia oo ina pasia, o lea lava le tulaga o le a i ai, ona po ai foi lea o le tatou aso a taeao.

Faafetai atu Samoa i lau tapuaiga i le tuneva o le po i lenei itula afiafi, faafetai lava le onosai mai. E pei lava ona matou oo atu i le taimi ua sola i le taeao aena ia, e leai se faiva e aunoa ma se maumau. O le a foi sau faafofoga i lenei afiafi ma le suaga o le vaatele, i le aumai avatu o finagalo ma le tofa sasaa ma le tofa molimoli i le paia ma le mamalu o sui usufono, e mapu atu i ina le nafaifi o le aso ma taualumaga o le faaaliga o finagalo ma manatu ma lagona.

21 APERILA 2015

P.P. 2014/2015 Nu. 219, Lipoti a le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11 - Iloiloga

E faamuli ma le ai se faafetai i le paia ma le mamalu o le aufai tatalo a le tatou atunuu i le paia i Faafeagaiga Taulagi i so o se fatafaitaulaga, e talitonu e leai se mea e taunuu pe a le au le Atua, ae mafua le aufaatasi mai o le Atua ona o la outou tatalo faamanuia ma la outou tatalo leleoa ua ae manuia ai faiva o lou Palemene i lenei aso. Tatou tatalo i le Alii ia maua se faiga malologa fiafia ma le manuia i lenei po, tatou tatalo ia taitai lo tatou ola ia mafai ona tatou toe fesilafai i le taeao o muamua.

E faafetai atu foi i le faaaaogagase mai pea o Faauluuluga o Matagaluega ma Faalapotopotoga a le tatou Malo, lau Afioga i le Loia Sili aemaise Faauluuluga o Matagaluega taitasi, faafetai faatasi ma ii lenei itula afiafi. Ua maua foi le au tusitala o le atunuu, malo fai o le faiva. O manu na o le tatou galuega, tatou feiloa i le aso a taeao.

A o le i tolopoina le tatou Fono, e valaau atu i lau Afioga i le sui usufono mo Faasaleleaga Nu.3, Tofa Tuileutu Alavaa Voi e fai se tatou taulaga e faaiu ai le tatou po ona tatou malolo ai lea.

Na tolopo Taulumaga a le Fono Aoao i le itula e 10:15 i le po seia aulia le itula e 9:00 i le taeao o le Aso Lulu, 22 Aperila 2015.